

# ICOA LIBAKETEDI LIIGEXEDI ANEOTEDOGOJI

Lucas me idí nagadi notaganagaxi didikotacibige nigica goneleegiwa anida nagatetigi ane liboonagadi Teófilo. (Awini miditaga Lucas 1.1-4). Maditaga nagadi notaganagaxi Lucas iditedi icoatawece nigicoa ane loenataka nigijo anodiotibece Jesus nigijo nogopitedibigimece ditibigimedi. Yalagata nigica anodaagee Aneotedogoji Liwigo nogodibatege me iige lewiga nigijo liigexedi Aneotedogoji, odaa nigijo nogoyatematitedibece nibodicetedi anele, odaa eliodi oko jogoyiwagadi Jesus me Nigijaa Aneotedogoji ane niige me Gonewikatogodi. Lucas yalagata nigijoa nibodicetedi anele aneetece Jesus me dinatemati digoida Jerusalém, codaa miditawece niigo Judéia, nipodigi Samaria, codaa yalagata milaagitelogo inoatawece ane iigotedi. Lucas eetece nigicoa ane libaketedi Pedro ijaa Filipe. Codaa aagaga yalagata Paulo mijo me lakapetegi Jesus, codaa eetece anodaagee naga dakapetege Jesus, codaa yalagata anodaagee Paulo naga diniigi lewiga, odaa ja liigexegi Jesus. Aagaga yalagata judeutedi meliodi mowo Paulo me dawikode leegodi me yatematitedibece nibodicetedi anele. Yalagata anodaageeteda nigicoa niwijahegeco Paulo migotece owidi iigotedi me yelogoditedibece nibodicetedi anele, codaa me niigaxitiniwace nigijo anoyiwagadi Goniotagodi. Odaa ijoatawece nipodaga anigotece Paulo, idioka limedi moiatetibece. Negepaagicoti moniwilo Paulo, odaa jogoyadeegiticogi nigotaga Roma.

Odaa jigidaagee Lucas me yalagatiogi nigijoa liigexedi Jesus modigotece eletidi iigotedi moyelogoditedibece nibodicetedi anele aneetece Jesus, codaa owote godoxicegetedi oibake notoetiigi Liwigo Aneotedogoji.

---

## Lucas didikotibige Teófilo

(Lucas 1.1-2)

**1** <sup>1</sup>Jidikotacibigagaji, iniotagodi Teófilo. Nigijo naga jidi nagajo odoeje notaganagaxi, jiditini anodaageeteda Jesus, ijoatawece ane loenataka codaa me liigaxinaganageco maleeka dinojogotedini meote ane libakedi. <sup>2</sup>Jiditedini notaga aneetece libaketedi Jesus negepaa nigijo noko Aneotedogoji naga yadeegitedibigimece ditibigimedi. Maleedigicatibige dogopitedibigimece ditibigimedi Jesus ibake loniciwaga Aneotedogoji Liwigo me iige nigijoa liigexedi, nigijoa goneleegiwadi ane iolatedicoace. <sup>3</sup>Yeleo pida nigidiaagadi ja yewigatace, odaa icoatigilo cwareenta nokododi elioditibece me dinikeetediogi

nigijoa goneleegiwadi, dinikeetediogi mewi naga yewigatace. Onadi odaa agalee yakadi me nawienatakanaga naga yewigatace. Niigaxitediniwace anodaagee Aneotedogoji me iige laalegenali oko. <sup>4</sup>Ica me yatecogo, odaa Jesus ja imonya, meetediogi, “Jinogotace anotiticoace we nigotaga Jerusalém, pida aliitegetiwaji ane ligegitedagawa Eiodi me yajigotedagawa, nigijjo baanigijjo mejitagawatiwaji. <sup>5</sup>João Batista nilegetiniwace oko datika ninyogodi eotibige me ikee nogodinilaatece libeyacegeco, codaa moyemaa Aneotedogoji me iige laalegenali. Pida nige ixomagatedijo onatecigidiwa nokododi Aneotedogoji Liwigo dakatiwece gadaalegenali, odaa ja gadiigenitiwaji.”

**Aneotedogoji yadeegitedibigimece Jesus ditibigimedi**

*(Marcos 16.19-20; Lucas 24.50-53).*

<sup>6</sup>Ica me yatecogo nigijjoa liigexedi Jesus, odaa jonogoige, moditalo, “Goniotagodi, domige naga natigide ica me godogaagegitice mejonagateloco loniciwaga romaanotedi, odaa jagawii okomaga goninionigi-eliodi?”

<sup>7</sup>Naga ninigodi Jesus, odaa meetediogi, “Aneotedogoji ibake nagatetigi mepaa nibikota noko codaa me lakata nigeote nigida anenita, pida agakatitiwaji mowoogoti nigica noko nigicota. <sup>8</sup>Pida nige dinikatini Aneotedogoji Liwigo me dakatiwagajitiwaji, odaa yajigotagawa gadoniciwaga. Odaa akaamitiwaji jagakamagakaami nakataganadi codaa me enitici. Odaa jegeniticitiwaji digoina nigotaga Jerusalém, digoida nipodigi Judéia, nipodigi Samaria, codaa me niginoa eletidi nipodaga ane dagaxa me leegitalo.” <sup>9</sup>Igaanaga nigotedini nigijjoa Jesus lotaga, odaa Aneotedogoji ja yadeegitedibigimece ditibigimedi. Odaa ja dakatediwece ica lolaadi, odaa agaleegicoa monadi.

<sup>10</sup>Egidaa diiticogi Jesus migo ditibigimedi, idiaagidi idokee moiwitibigimece ditibigimedi, codaagonida nogonadi icoa itoataale goneleegiwadi ja dinikeetiogi. Nigicoa goneleegiwadi one odinixotinigilo nowoodi lapacogogoli, dabiditiniwace liwai nigijjoa liigexedi Jesus. <sup>11</sup>Odaa modi, “Akaamitiwaji, goneleegiwadi anicogoticogi nipodigi Galiléia, igame leegodi maleeginaagoni awinitibigimece ditibigimedi? Aneotedogoji ja yadeegi Jesus digoida ditibigimedi, odaa jiginaa gadoyaatetiwaji digoina. Pida nigijjoa Jesus icota me dopitedijo digo anodaageeteda mopitedibigimece ditibigimedi.”

**Nigijjoa liigexedi Jesus oiomagaditice Matias me waxodi limedi Judas**

<sup>12</sup>Odaa nigijjoa liigexedi Jesus naga dopitiniwace moicogotibigimece lojotagadi ane liboonagadi “Lojotagadi Oliveira”, odaa jigigotibeci nigotaga Jerusalém one onadateci ciloomito me yototice nigijjo lojotagadi. <sup>13</sup>Nogodakatiwece nigotaga, odaa jigigotibeci minitaga ica dalagate diimigi ane lotokagadi. Nigicoa goneleegiwadi anidiaagiticoace one: Pedro, João, Tiago, André, Filipe, Tomé, Bartolomeu, Mateus, Tiago ane lionigi ica Alfeu, Simão nigijjo ane domaga idelege romaanotedi, icaagica Judas ane lionigi



(Atos 1.9)

ica eledi Tiago. <sup>14</sup>Elioditibece me yatecogo moyotaganene Aneotedogoji awatege nigijo nioxoadipi Jesus, ajo eliodo, ijaagijo eledi iwaalepodi.

<sup>15</sup>Nigijoa nokododi yatecogo ejime onaniteci taalia nigigo viinte anoyiwagadi Goniotagodi. Odaa Pedro ja dabiditini liwigotigi, odaa jegee, <sup>16</sup>“Inioxoadipi, leeditibige micota nigijo aneeta Aneotedogoji lotaganagaxi aneetece analee ninyaagi Judas. Aneotedogoji Liwigo eo inionigi-eliodi Davi me eetece analee ninyaagi Judas nigijo jotigide. Nigijo me ikeetiogi

nelogododipi ane digetedigi Jesus eotibige moyakadi moniwilo Jesus. <sup>17</sup>Judas eledi ijo me godokaagedi me jiwagatibece Goniotagodi, aagaga iomagaditedice meo libakedi digo mokotaga idokida gobakedi.”

<sup>18</sup>Judas dinoojeteta nipodigi. Ibake nigijoa dinyeelo ane dinigaanyetece me yajigo Jesus modibatalo nelogododipi. Odaa miditaga nigidi nipodigi, jigidiaa lemagadi, datope le, icoa liwenadi daxoitedice igotinigi iigo.

<sup>19</sup>Iditawece nigeladimigipitigi nigotaga Jerusalém oyowoogodi ane ninyaagi Judas. Joanigidaa leegodi mowo me liboonagadi nigidi nipodigi, “Aceldama”, nioladi hebraico, amina anejinagata “Nipodigi godawodi”. <sup>20</sup>Pedro egidaagee me dotaga, odaa jegee, “Nigida ane ninyaagi Judas diniditelo Aneotedogoji lotaganagaxi, digoida liwai nigijoa enaco, mee nigijo nidigo,

‘Leeditibige ligeladi nigini goneleegiwa micota me dinaladi, codaa agaleegica anigo digeladetigi.’

Codaa eledi diniditelo nigijo liwai lotaganagaxi Aneotedogoji,

‘Leeditibige eledi oko me waxodi limedi, codaa meo nigijo ane libakedi.’

<sup>21-22</sup>Enice leeditibige me jiolaagatice eledi oko me waxodi limedi Judas me nakataganaga me naga yewigatace Goniotagodi Jesus. Leeditibige me jixipenagatice oko minoataga niginoa goneleegiwadi ane akaagina mokotaga nigijoa nokododi Goniotagodi Jesus maleeginiwa mokotaga, nigijoa nokododi naga nilegetiniwace João Batista nigijo oko, negepaagicota nigijo noko Aneotedogoji naga yadeegitedibigimece Jesus ditibigimedi.”

<sup>23</sup>Odaa jogoniboonagateetiniwace itoataale goneleegiwadi, José anoyatigi me Barsabás, codaa nikoxeedi me “Nigijo ane igenaga”, ijaagijo eledi goneleegiwa ane liboonagadi Matias. <sup>24-25</sup>Nigidiaagidi nigijo lapo jogoyotaganee Aneotedogoji, moditalo, “Goniotagodi Aneotedogoji, owoogotitiwece laalegena okanicodaagica oko. Enice natigide anikeenitogowa anigepidigica nigidoa itoataale goneleegiwadi ane aolaatice meote libakedi me gadiigexegi, me waxodi limedi Judas me liigexegi Goniotagodi, leegodi Judas jigigo miditaga anepaa limedi.” <sup>26</sup>Odaa jogoiwi anepaga dinete modibateloco liboonagadi, odaa jogodibateloco liboonagadi Matias. Odaa Matias ja dinawanagaditege me lokaagetedi nigijoa oonze goneleegiwadi liigexedi Goniotagodi.

### Lanokegi Aneotedogoji Liwigo

**2** <sup>1</sup>Nigijo naga nakatio ica noko anoyatigi “Pentecostes”, ijoatawece nigijoa liigexedi Goniotagodi yatecogo ijaagijo nigijo aneiticoace. <sup>2</sup>Codaagida nogowajipata ica nayaagegegi ane igedi digoida ditibigimedi micataga nigina niocodi ane dagaxa me yoniciwadi. Codaa owajipata nigijo nayaagegegi catiwedi idiwatawece letiidi nigijo diimigi anei me nicotiniwace. <sup>3</sup>Odaa jogonadi ica ane liciagi galewaga ane ilaagitice, odaa nigijo galewaga jigiteloco lacilo oninitecibeci nigijoa liigexedi Goniotagodi. <sup>4</sup>Odaa Liwigo Aneotedogoji ja dakatiogi oninitecibeci, odaa iditawece jogodotagatigilo eletidi



(Atos 2.1-4)

iolatedi, oninotecibeci dotagatigi eledi ioladi ane digica me dotagatigi. Leegodi Aneotedogoji Liwigo yajigotiogi lixakedi modotagatigilo eletidi iolatedi.

<sup>5</sup>Digoida nigotaga Jerusalém jigidiwa anicotiobece judeutedi anele, anoyemaa modogetetalo Aneotedogoji. Oicogoticogi inoatawece eletidi iigotedi. <sup>6</sup>Nigijjo nogowajipata nigijjo layaagegegi ditibigimedi, ica lapo-nelegi nigijjo noiigi ja dinatecogotee. Eliodi me nawelatibigiwaji leegodi oninotecibeci yakadi me yowoogodi nigijjo iolatedi anodotagatigilo nigijjo liigexedi Goniotagodi. <sup>7</sup>Eliodi moyopo, oada modi, “Digawinitiwaji! Idiwatawece nigidiwa goneleegiwadi ane notaganaga elatibige nipodigi Galiléia. <sup>8</sup>Enige, igamodaagee ina me jakataga mokotawece jajipaaagatiogi modotagatigilo goniolatedi ane digica moyowoogodi modotagatigi? <sup>9</sup>Nigida moko anejilapodaga inatecibece oicogoticogi niigotedi Pártia, Média, Elão, Mesopotâmia, niigotedi Judéia, Capadócia, Ponto, codaa me Ásia. <sup>10</sup>Codaa ina eledi ane jawanagatege oicogoticogi niigotedi Frígia, Panflia, Egito, inaageledi oicogoticogi nipodaga Líbia anipegitege nigotaga Cirene. Idiaageledi бага awaligegegipi oicogoticogi nigotaga Roma. <sup>11</sup>Inatecibece nigina oko judeutedi, inaageledi baadaga judeutedi, pida onakato Aneotedogoji. Idi eledi oicogoticogi Creta, inaageledi bogoicogoticogi Arábia. Pida okotawece jajipaaagata modotagatigilo goniolatedi, modotagatigi nigidiwa goneleegiwadi, moditece niginoa Aneotedogoji loenataka libinienaga, godoxicegetedi!” <sup>12</sup>Oada

nigica lapo-nelegi jogoyopo codaa nogowikomataaga, odaa dinigetiwage, modi, “Amiida ica ane diitigi ida niciagi ane jinataga?”

<sup>13</sup>Pida ica eledi бага namenaganaga, modi, “Nigidiwa goneleegiwadi ejime nemága!”

### Pedro yotaganege noiigi-nelegi

<sup>14</sup>Odaa Pedro anidiaagi miditaga nigijoa eletidi oonze liigexedi Goniotagodi ja dabiditi, odaa dinigetagatee me yotaganege nigijo noiigi-nelegi. Meetiogi, “Akaami goneleegiwadi judeutedi, codaa makaamitawecetiwaji ane gadigeladi nigotaga Jerusalém, atacolitecetiwaji yotaga, jelogoditagawatiwaji anodaa diitigi nigida niciagi ananati. <sup>15</sup>Aleetibigetiwaji nigidiwa goneleegiwadi daga nemága, pida anemága. Igaataga eka noove lakata me nigoitijo. (Odaa nagani lakata anigica ane yemága.) <sup>16</sup>Pida nigida analee jinataga nigijo aneeta Joel nigijo jotigide, nigijo ane yelogoditedibece Aneotedogoji lowooko, nigijo negee,

<sup>17</sup> ‘Mee Aneotedogoji,

“Nigicotalo owidijedi nokododi digawini ane jao.

Jimonya Iwigo me dakatiogi codaa me iige inoatawece ane latopaco oko.

Gadionigipi icota moyelogoditedibece yowooko.

Jaote niginoa lionekadi minoa lakataga micataga daga ligeedi,

codaa nigina ganaxokodipi jao me nigeega me jikeetiogi ane jema.

<sup>18</sup> Jimonya Iwigo me dakatiogi niginoa iotaka,

goneleegiwadi codaa me iwaalepodi.

Odaa jogoyatematitedibece yowooko nigicoatigilo owidijedi nokododi.

<sup>19</sup> Jaote yoenataka libinienaga ane jopooga digoida ditibigimedi,

codaa digoina iigo jaote godoxicegetedi.

Jaو micota monadi godawodi,

noledi codaa me gocilagadi ane nigexaka.

<sup>20</sup> Aligege icota me nexogoteloco,

epenai icota me ixagodi micoataga godawodi

maleedigicatibige digicota nigica Noko Goniotagodi Aneotedogoji,

nigica Noko gonegegi codaa me dagaxa libinienigi

nige limedi me iwi anigote nigina oko.

<sup>21</sup> Odaa inatawece nigina oko ane dipokotalo Goniotagodi

Aneotedogoji me iwikode,

jiginiaa aneote Goniotagodi me yewigatace.” ”

<sup>22</sup> Pedro egidaagee me dotaga, odaa mee, “Akaami noiigitigi Israel, atacolitece yotaga! Aneotedogoji ikeetedagawatiwaji negepaa niige Jesus anelatedibige nigotaga Nazaré, odaa ja yajigote ane libakeco. Igenaga mowoogotitiwaji codaa ayakadi dagawienatakani me Aneotedogoji niige, igaataga Aneotedogoji ibake Jesus meote loenataka libinienaga codaa me godoxicegetedi gadiwigotigitiwaji, codaa me niginoa anetigodawelagadi.

<sup>23</sup> Aneotedogoji yowoogodi inoatawece niginoa anicota micotece, odaa jigida

me lowoogo me ika Jesus me dinajigotedagawatiwaji. Odaa jegeloatitetiwaji, leegodi maniwoititema majici midywa goneleegiwadi abeyacagaga moyeloadi nigijo nogoyototedeloco nicenaganagate. <sup>24</sup>Pida Aneotedogoji yewikatititace Jesus. Nogatedice me dawikodetetema némaga, leegodi némaga agica loniciwagatologo Jesus. <sup>25</sup>Igaataga Davi meetece Jesus, nigijo mee,

‘Idioka limedi me jinadi Goniotagodi me ideite yodoe.

Codaa ideite iwai ibaagadi me idaxawa,  
odaa jigidaagee agica ane idogowikomata.

<sup>26</sup>Joanigidaa leegodi me ninitibece yaalegena,  
codaa mejitece notaga aneo godinikegi.

Odaa jakadi me inibeotege Aneotedogoji meote yolaadi me yewigatace.

<sup>27</sup>Igaataga nigida makaami agikani iwigo digidiaagi aneite liwicidi émagaga.  
Codaa nigida makaami agikani yolaadi daga neladi,  
lolaadi gaotagi anakamokakaami me dibatagadomi.

<sup>28</sup>Jaagakamaga awii me jowoogodi naigi ane yadeegi oko midioka  
limedi me yewiga,

codaa eliodi me idinitibeci leegodi makaami meetaga.”

<sup>29</sup>Odaa Pedro egidaagee me dotaga, odaa mee, “Akaami, inioxoadipi judeutedi, gadotaganegenitiwaji jaotibige makaamitawece owoogoti anejatigi igegi. Nigijo gonelokodi gonegegi, inionigi-eliodi Davi yeleo, odaa jogonaligitini. Anei monaligitini jipecagatege codaa nigina noko. <sup>30</sup>Davi inaagina nigina ane yelogoditedibece Aneotedogoji lowooko, codaa yowoogodi nigijo Aneotedogoji ane ligegiteta. Aneotedogoji ligegi meote dibate oko anida aneetege licogegi Davi me inionigi-eliodi, digo mijotaga Davi me inionigi-eliodi. <sup>31</sup>Davi yowoogodi nigica Aneotedogoji anicota meote, odaa jegeetece Jesus. Eetece Aneotedogoji meote me yewigatace Nigijoa ane nimonya aneote me godewigatace. Jigidaa ane diitigi nigijo ligegi mee,

‘Aneotedogoji aika liwigo midiaagi aneiticoace émagaga.

Codaa lolaadi aneladi.’

<sup>32</sup>Aneotedogoji eote Jesus me yewigatace, odaa oko nakataganadi naga yewigatace Jesus. <sup>33</sup>Odaa Aneotedogoji ja yadeegi Jesus me ideite liwai libaagadi, miditaga nimeri gonegegi. Odaa Aneotedogoji jegeote micota nigijo ane ligegite Jesus, odaa Aneotedogoji yajigote Jesus me yakadi me iige Liwigo. Odaa Liwigo Aneotedogoji enagi me dakatiogoji. Natigide jaganatitiwaji, codaa majipaatiibece anodaageeta loenatagi Aneotedogoji Liwigo. <sup>34-35</sup>Igaataga Davi agopitibigimece ditibigimedi, pida ijaagijo mee,

‘Goniotagodi Aneotedogoji meeteta Iniotagodi,

“Anicooti iwai ibaagadi miditaga nimeri gonegegi

nigepaagicota mejateloco gadoniciwaga nigina ganelogododipi.” ’

<sup>36</sup>Enice inatawece godoiigi Israel, leeditibige moyowogodi. Nigijoa Jesus ane iigenatakanitalotiwaji moyototedeloco nicenaganagate, Aneotedogoji eote me Goniotagodi, codaa iomagaditedice meote Nigijoa aneote magaga godewigatace.”

<sup>37</sup>Nigijo noiigi-nelegi nogowajipatalo nigijoa lotaga Pedro, odaa eliodi me nogowikomataaga, odaa modita Pedro ijaagijoa eletidi liigexedi Aneotedogoji, “Akaami inioxoadipi judeutedi, amiida ica ane jakataga me gonimawenegegi me godiwoko Aneotedogoji lelaga?”

<sup>38</sup>Odaa Pedro jegeetiogi, “Akaamitawecetiwaji leeditibige madinilaanitece gabeyacegeco, codaa me leeditibige moibake Liboonagadi Jesus Cristo metigadinilegeni amaleegaga ixomagateetedice Aneotedogoji niginoa gabeyacegeco. Odaa Aneotedogoji ja yajigotedagawatiwaji Liwigo, anakaagida me ligegi me yajigotedagawa. <sup>39</sup>Eote me ligegi me yajigotedagawatiwaji Liwigo, codaa yajigotediogi gadionigipi, codaa me nigina oko ane ligeladi niginoa nipodaga ditigedi. Yajigotediogi Liwigo inatawece nigina oko Goniotagodi Aneotedogoji aneniditediogi menagitibeci midoataga.”

<sup>40</sup>Pedro egidaagee me dotaga, odaa ja najoitiniwace, meetiogi, “Adinenyagatitiwaji amaleegaga gadiwokoni nigica noko Aneotedogoji nige ilokatidi nigina noiigi abeyacagaga!” <sup>41</sup>Eliodi oko oyiwaagadi nigijoa Pedro lotaga, odaa ja dinilegetibigiwaji. Ejinaga domaga iniwatadagani miili oko odinawanagaditege nigijo lapo anoyiwaagadi Goniotagodi ijokijo nigijo noko.

### Ica anodaagee lewiga nigica anoyiwaagadi Goniotagodi

<sup>42</sup>Odaa ijotawece nigijo anoyiwaagadi Goniotagodi idapaga diiticogi modeemitetigilo nigijoa liigaxinaganegeco nigijoa liigexedi Goniotagodi, codaa oikée me dinemaatiwage, codaa idioka limedi me dinatecogotee nigina me niodaga codaa moyotaganeege Aneotedogoji. <sup>43</sup>Nigijoa liigexedi Aneotedogoji owote owidi godoxicegetedi, codaa me niginoa ane libinienaga, joanigidaa leegodi ijotawece oko nigijo lapo-nelegi odeemitetibige loniciwaga Aneotedogoji. <sup>44</sup>Ijotawece nigijo anonakato Goniotagodi idioka limedi midi me yatecogotibece, codaa idioka limedi modinawalacetigi okanicodaagica anoyakadi. <sup>45</sup>Nigina midi lagalanigi, odaa jogoyaa niginoa lidiimaga, inoa ane nepilidi, odaa jogodinawalacetigilo dinyeelo iditawece nigidi anoyopotibige. <sup>46</sup>Inoatawece nokododi yatecogo minitaga ligeladi Aneotedogoji. Dinodetiwage me niodaga inoa ligelatedi, ninitibigiwaji, codaaeledi ninitibigiwaji nigina modinawalacetigilo niginoa anoyakadi. <sup>47</sup>Idioka limedi modogetetalo Aneotedogoji, odaa niginaeledi noiigi jogodeemitetibige codaa moyemaatibigo. Inoatawece nokododi Goniotagodi yatecogoteeeledi oko yawanagaditetege nigijo lapo oko bagakaa eniwagatakanaga, nigidi oko Goniotagodi yemaa meote me newigatace.

### Ica alejaado anoicilatidi

**3** <sup>1</sup>Ica noko Pedro ijaa João igotibeci minitaga Aneotedogoji ligeladi ica naga iniwatadagani lakata me gocidi, nagaca lakata migotibeci oko oyotaganeege Aneotedogoji. <sup>2</sup>Onini ica goneleegiwa ane beyagi laxace, ayakadi mewaligi one leelotagi nigica maleekenitini. Odaa inoatawece nokododi icoa lokaagetedipi oyadeegiticogi ica aneitibiga midataga ica epoagi-nelegi anodita



“Epoagi libinienigi”, owotibige me yakadi me dipokotiogi dinyeelo nigina oko ane dakatiobece Aneotedogoji ligeladi. <sup>3</sup>Nigijjo beyagi laxace naga naditege Pedro ijaa João me dakatiobece Aneotedogoji ligeladi, oada ja domaga dipokotiogi anigetigidi nogeedi. <sup>4</sup>Oada Pedro ijaa João jogoiwita, oada Pedro meeta, “Dige godiwinegegi!” <sup>5</sup>Oada ja iwitiogi, ja domaga nibeotege digica nogeedi anigetigidi. <sup>6</sup>Oada Pedro meeta, “Agaca ininyeelo, otegexaagaga inioolo, otegexaagaga inibeexo, pida jajigotagawa anida meetaga. Jatika loniciwaga Liboonagadi Jesus Cristo anelatedibige nigotaga Nazaré me gadiigeni madabititini, odaagawaligi!” <sup>7</sup>Oada Pedro ja dibatigi libaagadi nigijjo goneleegiwa, oada ja yaxawa me dabiditini. Agica daga leegi oada logonaka codaa me liwayagaxiidi ja yoniciwadi. <sup>8</sup>Oada nigijjo goneleegiwa ja waxoditibece negepaanaga dabiditini, oada jigidaa diiticogi mewaligi. Nigidiaagidi ja dakatiwece Aneotedogoji ligeladi, lixigagawa Pedro ijaa João, daxoditibece mewaligi, codaa me dogetetibigimece Aneotedogoji. <sup>9</sup>Ijtawece nigijjo noiigi-nelegi onadi nigijjo goneleegiwa negewaligi, codaa me dogetetibigimece Aneotedogoji. <sup>10</sup>Oyowoogodi nigijjo goneleegiwa nigijjaagijjo nigijjo aninoatawece nokododi nicotinece midataga lapoagi Aneotedogoji ligeladi, dipokotibece midataga epoagi-nelegi anodita “Epoagi Libinienigi”. Nigijjo noiigi-nelegi anonadi eliodi me nawelatibigiwaji, codaa moyopo anee nigijjo goneleegiwa.

### Pedro notaganagetiniwace noiigi yalagatalo Jesus

<sup>11</sup>Nigijjo goneleegiwa anoicilatidi ilokadita Pedro ijaa João. Eliodi oko walediticogi miditaga, oada ja yatecogo minitaga le Aneotedogoji ligeladi anowo me liboonagadi “Liwalagaxi Salomão”. Oada nigijjo noiigi-nelegi eliodi moyopo nigida niciagi. <sup>12</sup>Nigijjo Pedro naga nadi nigijjo noiigi-nelegi, oada jegeetiogi, “Akaamitiwaji godoiigi, loigi Israel, igame leegodi mopootiwaji nigida niciagi? Igame leegodi ina me godiwinegegi? Aleetibigetiwaji daga jaoga nigida goneleegiwa mewaligi daga leegodi okomaga gonimawenegegi, ogoa, domigetaga leegodi Aneotedogoji daga yakadi me dagaxa moko ele? Pida anigidaa leegodi!” <sup>13</sup>Aneotedogoji Noenogodi Abraão, Noenogodi Isaque, Noenogodi Jacó codaa me ijotawece nigijjo eledi jotigide godaamipi. Iniaaginiwa jiginiaa iwenigide Jesus ane Liotagi. Pida akamagakaami jagajicitetiwaji Jesus midiwataga lacilodi romaanotedi, oada agica degemaani manienaganegeni lodoe Pilatos nigijjo naga domaga doletibige me ikatedice Jesus. <sup>14</sup>Pida nigida makaamitiwaji agemaani Nigijjoa anele, ane yewigatetema inikiiniwateda Aneotedogoji, Nigijjoa ane igenaga. Pida jigipokita Pilatos me ikatice nigijjo gonematagodi, ijaagijjoa agemaani moikatedice. <sup>15</sup>Oada jigidaagee negeloatitiwaji Nigijjoa aneote oko me newiga. Pida nigidiaagidi Aneotedogoji jegeote Jesus me yewigatace, oada nigida moko jogoko nakataganadi. <sup>16</sup>Nigijjo naga jinakatonaga, oada Aneotedogoji ja najigotodogowa loniciwaga me jicilatitaga nigida goneleegiwa ananatitiwaji, codaa gadowoogotagi. Aneotedogoji ibake loniciwaga Liboonagadi Jesus me icilatidi nigida goneleegiwa. Jaganatitiwaji codaa mowoogoti me Aneotedogoji icilatidi

leegodi me jinakatonaga Liboonagadi Jesus. Leegodi me jinakatonaga Jesus odaa nigida goneleegiwa jejele codaa me icilegegi mida gadiwigotigitiwaji natigide.

<sup>17</sup>Digawini, akaami inioxoadipi judeutedi, jowoogodi nigida makaamitiwaji ijaagijoa gadacilodi mawiitiwaji Jesus me dawikode leegodi agowoogoti anijoa. <sup>18</sup>Pida Aneotedogoji ibake ijotawece nigijjo anoyelogoditedibece lowooko nigijjo jotigide modi me leeditibige me dawikode Nigijjo Aneotedogoji ane nimonya meote me godewigatace. Natigide Aneotedogoji jegeote micota nigijjo ane ligegi nigijjo liotaka nigijjo jotigide. <sup>19-20</sup>Enice oleetibigetiwaji madinilaanitibece, opilitalo Aneotedogoji amaleegaga gadiwilecitetema gabeyacegeco, odaa Goniotagodi Aneotedogoji ja niwakatee Liwigo me iwetagadi gadiwiciditiwaji nigicoa nokododi nigoleetibige, codaa icota me nimonyatace Jesus, Nigijjo Aneotedogoji ane iomagaditedice meote me godewigatacetiwaji. <sup>21</sup>Leeditibige Jesus midiaagitedice digoida ditibigimedi nigepaagicota nigica noko Aneotedogoji nige igelagatidi inoatawece niginoa aninoa. Nigina meote Aneotedogoji nigida ligegi ibake nigijjo anoyelogoditedibece lowooko nigijjo jotigide. <sup>22</sup>Igaataga nigijjo jotigide mee Moisés, ‘Goniotagodi Aneotedogoji eote ixipetedice goneleegiwa nigina akaamitiwaji, odaa ja iige me yelogoditedibece lowooko, digo meetaga. Odaa ele majipaataloti waji inoatawece ane lotaga. <sup>23</sup>Nigica oko ane daga watacotece niginoa lotaga, nigini oko oyawalacetege loiigi Aneotedogoji, codaa oyelodi.’ <sup>24</sup>Codaa nigijjo jotigide mee Samuel ijaagijjo nigijjo eledi anoyelogoditedibece Aneotedogoji lowooko anidi me newiga nigidiaagidi naga yeleo Samuel, ijotawece inoa latematiko moditece analeegicotece niginoa nokododi. <sup>25</sup>Akaamitiwaji ida anenitege licogegi nigijjo anoyelogoditedibece Aneotedogoji lowooko, codaa nigijjo naga dinilakidetetege Aneotedogoji jotigide godaamipi, micataga dagaga dinilakidetetogoji. Eote ligegitetege Abraão, meeteta, ‘Jao jibake oko anida aneetege gadicogegi me jibinie inatawece noiigi nigina iigo.’ <sup>26</sup>Aneotedogoji ixipetedice Jesus me Liotagi, jagakamagakaamitiwaji odoejedipi me imonyatedagawa eotedibige mikani niginoa ganaicoli ane beyagi, odaa jigidaa me gadibinienitetiwaji.”

### Icoa lacilodi judeutedi oige Pedro ijaa João

**4** <sup>1</sup>Nigijjo Pedro ijaa João maleegidaagee monotaganegetiniwace nigijjo noiigi minitaga Aneotedogoji ligeladi, odaa nigijjo sacerdotitedi ijaagijjo lacilo nigijjo iodagawadi anoyowie diimigi icaagicoa saduceutedi jigicotibece miditaga. <sup>2</sup>Odaa neligideega leegodi nigijjo itoataale liigexedi Aneotedogoji modii gaxinagatece icoa émagaga micota me newigatace leegodi naga yewigatace Jesus. <sup>3</sup>Odaa jogoniwilo Pedro ijaa João, oixotiwece niwilogonagaxi negepaa eledi nigoi, leegodi jona gocidi dagalee yatecogo icoa seteenta lacilodi noiigi. <sup>4</sup>Pida eliodi nigijjo oko anowajipatalo nigijjo Pedro lotaga ijaa João oyi wagadi Goniotagodi, odaa ane liwokodi nigica ane eni wagatakanaga ejinaga domaga iwida me ciinco miili goneleegi wadi.

<sup>5</sup>Negeledi noko ja dinatēcogotee digoida nigotaga Jerusalém nigijo anoiige sacerdotitedi, ijaagijoa laxokodipi lacilodi nigidi noiigi, ijaagijoa niigaxinaganadi anodiigaxinagatece lajoinaganēgeco Moisés. <sup>6</sup>Miditaga eledi ini ica Anás ane lacilo-sacerdotitedi, Caifás, João, Alexandre icaagicoa eletidi goneleegiwadi litacepodi nigini lacilo-sacerdotitedi. <sup>7</sup>Odaa jogodienagata Pedro ijaa João menagitibeci lodoe nigijo ane niigenatakanaga, odaa jogonigetiniwace, moditiogi, “Igame ganotoetiigi micilatiti ida anijo me beyagi laxace? Amijjo ane yajigotagawa gadoniciwaga? Igame liboonagadi anabakenitiwaji micilatiti nigida goneleegiwa?”

<sup>8-9</sup>Odaa Liwigo Aneotedogoji jegeo Pedro me dotaga, odaa jegee, “Nigida makaamitiwaji anakaami lacilodi noiigi, codaa makaamitiwaji anakaami laxokodipi ane iigenatakani. Nigida makaamitiwaji jagawini anemiitogowa, codaa me godigeegēgitece nigijo niciagi aneletema nigida anijo me beyagi laxace, codaa nigica anodaagee me icí. <sup>10</sup>Pida akaamitawecetiwaji codaa me inatawece godoiigi, loiigi Israel leeditibige mowoogotitiwaji nigini goneleegiwa me jicilatitaga jatikanaga Liboonagadi Jesus Cristo anelatedibige nigotaga Nazaré. Nigida makaamitiwaji jagakamaga iigenatakanitalo moyototedeloco nicenaganagate moyeloadi, pida nigidiaagidi Aneotedogoji ja yewikatitidace. Odaa loniciwaga Jesus icilatidi nigida goneleegiwa anijo me beyagi laxace, pida natigide etida dabiditini gadodoetiwaji, jegele.

<sup>11</sup>Lotaganagaxi Aneotedogoji yalagatalo Jesus, nigijo mee,

‘Nagajo wetiga notana ane dogoyemaa moibake,  
nigijo anoyoe diimigi,

nagani wetiga jegeo me dagaxa me gonege minitaga nigini diimigi  
anoyoe.’

<sup>12</sup>Odaa ajokajo nagajo wetiga mele. Joanigidaa leegodi agica ini eledi oko ane yakadi daga Gonewikatitogodi. Aneotedogoji ayajigote nagatetigi anigetigini eledi oko digoina iigo degeo me godewigatace. Pida iniokiniwateda Jesus me yakadi meote me godewigatace, codaa leeditibige me jagagata Liboonagadi nigina me joleegatibige me godewigatace.”

<sup>13</sup>Odaa icoa lacilodi nigidi noiigi jogonadi Pedro ijaa João mabo laalegena. Odaa jogonowi Pedro ijaa João me digica degeliodi me nidikonaga, otegeaxagaga gonegegipi. Joanigidaa moyopo leegodi anodaagee me nigitatakanaga. Codaa jogoyowoogodi Pedro ijaa João me lokaagetedipi Jesus. <sup>14</sup>Agoyakadi digica ligegi modakapetege Pedro ijaa João leegodi nigijo goneleegiwa anoicilatidi ida me dabiditi midataga Pedro ijaa João. <sup>15</sup>Odaa nigidiaagidi jogoiige Pedro ijaa João me noditicoaci we, odaa nigijoa lacilodi jigidiaa dinotigimadetiwage. <sup>16</sup>Modi, “Igame inigatiogi ijoo goneleegiwadi? Igaataga inatawece nigeladimigipitigi nigotaga Jerusalém jogoyowoogodi nigidiwa goneleegiwadi mowo godoxicegedi nelegi, odaa ajakataga degejinaga me dogowo nigida godoxicegedi anowo. <sup>17</sup>Pida ajemaanaga digidokee milaagitice nigida nibodigi ane yalagata nigida niciagi. Odaa ele me idoiēnaga, codaa joliigatema me dagadiaa onotaganēgetiniwace nigina noiigi, codaa dogoibake Liboonagadi Jesus.”

<sup>18</sup>Odaa jogodienagatace Pedro ijaa João, odaa jogoiige me dagadiaagoibake Liboonagadi Jesus nigina me notaganaga codaa me niigaxinaganaga. <sup>19</sup>Pida Pedro ijaa João jogoigidi, moditiogi, “Yakadi me enitecetiwaji nigica Aneotedogoji ane yakadi me igenaga me jaoga. Pida domige igenaga me gadadiwagategegitiwaji, ogoa domige mejiwagataga Aneotedogoji? <sup>20</sup>Igaataga ajakataga daga jikanaga mejinagatece nigijo ane jinataga, codaa ane jajipaagata.” <sup>21</sup>Odaa nigijoa lacilodi jogodoietaciniwace odaa jokoikaticoace nigijoa itoataale mopitibeci. Agica anoyakaditece ane leegodi dogoiloikatidi leegodi ijotawece nigijo noiigi odogetetibigimece Aneotedogoji leegodi nigijo loenatagi godoxicegedi. <sup>22</sup>Odaa nigijo goneleegiwa anocilatidi jonigidiwa caticedi me cwareenta nicaagape.

### **Nigijo anoyiwagadi Goniotagodi odipokotalo me yeloodagatee laalegena**

<sup>23</sup>Nigijoa lacilodi noiigi nogoikatice Pedro ijaa João, odaa Pedro ijaa João jigigotacibece minitaga nigijo lapo loiigi Goniotagodi, odaa jogoyatematitiogi ijoatawece nigijoa ane lotaga nigijo anoiige sacerdotitedi ijaagijoa laxokodi goneleegiwadi ane lacilodi loiigi Israel. <sup>24</sup>Odaa nigijo anoyiwagadi Goniotagodi noḡowajipatalo nigijoa lotaga nigijoa itoataale liigexedi Goniotagodi, odaa iditawece ja yatecogo moyotaganege Aneotedogoji, moditalo, “Goniotagodi Aneotedogoji anida gadoniciwagateloco inoatawece, alawini mawiite ditibigimedi, iigo, codaa me akiidi-eliodi, codaa minoatawece niginoa aninoa me jinataga. <sup>25</sup>Nigijo jotigide gonelokodi Davi ane gaotagi. Gadiwigo eo mee, ‘Igaamee ina me neligideega ina noiigi ane daga etigadowoogoti? Codaa igame leegodi ina noiigi moyowo nigina ane digicata ane jaoga? <sup>26</sup>Niginoa inionaga-eloodoli digoina iigo ja dinenyagaditibigiwaji, inaaginao aninoa nagatetico ja dinatecogotee, odaa jogodakapetege Goniotagodi Aneotedogoji codaa aagaga odakapetege Nigijoa ane nimonya meote me godewigatace.’ <sup>27</sup>Igaataga ewi inionigi-eliodi Herodes, ijaa nigijo lacilo romaanotedi anodita Pôncio Pilatos, ijaagijo ane daga judeutedi ijaagijo loiigi Israel, iditawece dinatecogotee modakapetege Jesus, Gaotagi aninokeote anemaani, Gaotagi anixipenedice meote me godewigatace. <sup>28</sup>Dinatecogotee mowo nigijo anakaa gadowoogo mawii nigijo jotigide, odaa jagabakeni gadoniciwaga mawii micota nigijoa ane gadowooko. <sup>29</sup>Natigide, Goniotagodi, digawini etigodoietice, odaa awii nigida moko anoko gaotaka me jakataga mabo godaalegena mejinagatece gadatematigo. <sup>30</sup>Odaa ikeeni gadoniciwaga makati micilatiti eelotaginadi, awiite godoxicegetedi codaa me libinienaga nigina me jibakenaga Liboonagadi Jesus, Nigijoa ane Gaotagi anakamokakaami me yewigatedagadomi.”

<sup>31</sup>Nigijo naga nigotiniwace moyotaganege Aneotedogoji, nigijo diimigi aneite me yatecogo ja digike. Odaa Liwigo Aneotedogoji ja yoniciwagaditibigiwaji iditawece, odaa jagabo laalegenali moyatematitedibece latematiko Goniotagodi.

### Nigijo anonakato Goniotagodi odinawalacetigilo inoatawece ane nepilidi

<sup>32</sup>Iditawece nigijo anonakato Goniotagodi idokida ane lowoogo, codaa idokida anee. Agica anee mepoka nepilidi niginoa ane nepilidi, pida iditawece odinawalacetibige inoatawece anoyakadi. <sup>33</sup>Nigijoa liigexedi Aneotedogoji ida eliodi loniciwaga moyatematitedibece Goniotagodi Jesus naga yewigatace, codaa Aneotedogoji meliodi meletetema iditawece loiigi Goniotagodi. <sup>34</sup>Agica ini oko liwigotigi anida anigetigida lemagamatiigi, igaataga nigina aninoa ligelatedi, inoa aninoa nipodaga oyaa niginoa ligelatedi inaaginao nipodaga, oadaa jogonadeegi dinyeelo lojetedi nigijoa anoyaa. <sup>35</sup>Odaa jogoyajigotigi dinyeelo nigijoa liigexedi Aneotedogoji, oadaa nigijoa liigexedi Goniotagodi jogoyawalace nigijoa dinyeelo onediatiniwace nigijo anepaga oyopotibige, oadaa nigijo anenegegi yopotibige owidi dinyeelo anoyajigota.

<sup>36</sup>Onini ica goneleegiwa ane liboonagadi José. Nigijoa liigexedi Goniotagodi owote me liboonagadi Barnabé amina anejinagata “Nigijo aneo mabo godaalegena.” Nigijo goneleegiwa one levita icogoticogi ica lidelogo ane liboonagadi Chipre. <sup>37</sup>José negeyaa nipodigi, oadaa ja nadeegi dinyeelo ane loojedi me etaanaga, oadaa nigijoa dinyeelo ja yajigotigi nigijoa liigexedi Goniotagodi.

### Ananias aniaa Safira

**5** <sup>1</sup>Onini ica goneleegiwa ane liboonagadi Ananias, acaagaca lodawa ane liboonagadi Safira. Ananias eyaa ica nipodigi. <sup>2</sup>Odaa Ananias acaagaca lodawa ja dinilakidetiwage midiokiditiwage me digidiwatawece dinyeelo oyajigotigi nigijoa liigexedi Goniotagodi, oadaa onatecigijoa oyajigotigi, pida icoa eletidi bogowote nepilidi. <sup>3</sup>Odaa Pedro jegeeta Ananias, “Igame leegodi madinikanitece Satanás me gadiigeni? Jegeo manakeni minaaleni Liwigo Aneotedogoji nigijo me digijoaatawece anajici nigijoa dinyeelo lojetedi me aani ganipodigi. <sup>4</sup>Nigijo maleedaga aani nigijo ganipodigi, bagalee ganebi. Codaa nigidiaagidi nagaani, oadaa nigijoa dinyeelo ganepilidi. Odaa igame leegodi mawii ida gadowoogo catiwedi gadaalegena? Nigida makaami aginaaleni oko, pida domaga adineenitalo minaaleni Aneotedogoji.” <sup>5</sup>Nigijo Ananias naga wajipatalo nigijoa notaga, oadaa jegenitini, ja yeleo. Odaa ijotawece nigijo anowajipata moyalagata nigijo ane ninyaagi Ananias eliodi me doitibigiwaji. <sup>6</sup>Odaa icoa lionekadi jigigotibeci oilipadi lolaadi Ananias. Nogoyadeegiticogi we, oadaa jogonaligitini.

<sup>7</sup>Igaanaga ixomagatedijo icoa iniwatadagani lakata, oadaa jagagicotio nagajo lodawa Ananias. Nagajo iwaalo ayowoogodi nigijo ane ninyaagi Ananias. <sup>8</sup>Odaa Pedro jegee, “Jemaa manelogotitiwa! Idiwa dinyeelo ane jibatege, idiwatawece icoa dinyeelo anabaategetiwaji me aani ganipodigi?” Naga ninigodi, oadaa jegeeta, “Jigidiwatawece!”

<sup>9</sup>Odaa Pedro jegeeta, “Igame leegodi akaami ijaagijo gadodawa madinilakidenitiwagetiwaji me domaga anakeni minaaleni Aneotedogoji

Liwigo? Natigide etina jegenotibeci nigijoa lionekadi anonaligitini gadodawa. Odaa natigide jagagetigadadeegi.”<sup>10</sup> Odaa aniaagani lakata Safira jagagenitini, ja yeleo lodoe Pedro. Odaa nigijoa lionekadi naga dakatiobece, jogototeloce nagajo iwaalo émege. Odaa jagagoyadeegi lolaadi, jogonaligitini liwai nigijo lodawa. <sup>11</sup> Ijtawece nigijo lapo loiigi Goniotagodi codaa me ijotawece nigijo eledi oko anodibodiceta nigida niciagi eliodi me doitibaigiwaji.

**Nigijoa liigexedi Aneotedogoji owote godoxicegetedi  
codaa niginoa loenataka ane libinienaga**

<sup>12</sup> Aneotedogoji ibake nigijoa liigexedi mowote owidi godoxicegetedi codaa me loenataka libinienaga miditaga nigijo noiigi. Ijtawece nigijo anonakato Goniotagodi yatecogotibece minitaga le Aneotedogoji ligeladi anoyatigi me “Liwalagaxi Salomão”. <sup>13</sup> Agica anigetigijo nigijo ane dogonakatoteda Goniotagodi anabo laalegena me dinawanagaditiogi nigijo lapo loiigi Goniotagodi. Pida nigijo nigeladimigipitigi nigotaga Jerusalém eliodi mele modotagatibige loiigi Goniotagodi. <sup>14</sup> Odaa eliodi goneleegiwadi codaa me iwaalepodi anonakato Goniotagodi, odaa jogodinawanagaditege nigijo lapo loiigi Goniotagodi. <sup>15</sup> Nigijo nogonadi loniciwaga nigijoa liigexedi Aneotedogoji, odaa nigica oko jogoyadeegi inoa neelotaginadi midiwataga icoa ladicotiidi. Odaagidiaagoyate minoataga inoa limetiidi codaa midiwataga icoa ligelatedi lipegetege. Owotibige liwa Pedro me yakadi me ixomagateloce nigina me ixomagatijo, minaagigotece miditaga. <sup>16</sup> Eliodi oko oicogoticoigi midiwataga icoa nigotadawanaga anipegetege nigotaga Jerusalém, oyadeegi icoa neelotaginadi, inaaginoa anodakatiogi niwicidi abeyacagaga. Odaa ijotawece nigijo ane neelotikanaga ja nicilaga.

**Icoa lacilodi judeutedi jogodoletibige mowo  
anodigotiogi nigijoa liigexedi Goniotagodi**

<sup>17</sup> Odaa nigijo lacilo-sacerdotitidi ijaagijoa lokaagetedi anida aneetege nigijo lapo saduceutedi eliodi monocetema nigijoa liigexedi Aneotedogoji, odaa jogodoletibige mowo anodigotiogi. <sup>18</sup> Odaa jogoniwilotiniwace nigijoa liigexedi Aneotedogoji, oixotiwece niwilogonagaxi manitaga nigotaga. <sup>19</sup> Pida negenoale ica niaanjo Goniotagodi ja yomoke icoa lapoaco niwilogonagaxi, naga ixoticoace, odaa jegeetiogi, <sup>20</sup> “Emiitacetiwaji minitaga Aneotedogoji ligeladi, odaagidiaagoni atematiitiogi nigidi noiigi inoatawece ane eetece lewiga gela ane yemaa Aneotedogoji me yajigotediogi.” <sup>21</sup> Odaa nigijoa liigexedi Goniotagodi jogoyiwagadi nigijo aanjo. Igaanaga yelogotibige, odaa ja dakataciobece minitaga Aneotedogoji ligeladi, odaa jigidaa dinanatacigi moniigaxitiniwace nigijo noiigi.

Nigijo lacilo-sacerdotitidi jigigo minitaga eledi le Aneotedogoji ligeladi lixigagawepodi ijoa eletidi lokaagetedi, odaa jegeniditiogi nigijoa seteenta laxokodipi lacilodi nigijo noiigi. Odaa jogoiige icoa iodagawadi anoyowie Aneotedogoji ligeladi migotibeci manitaga niwilogonagaxi me domogodigotiogi nigijoa liigexedi Goniotagodi. <sup>22</sup> Pida nogotota niwilogonagaxi, agaleegicoa

moyakadi nigijoa liigexedi Goniotagodi. Odaa jogopitiobeci, oyatematitiogi nigijoa lacilodi, modi, <sup>23</sup>“Ja jicogojogoticogi, ejogota niwilogonagaxi me dinoxoco codaa me dotete. Codaa idiwa iodagawadi anoyowie midoataga epoaco. Pida naga jomokenaga epoaco, agaleegica jakataga oko catiwedi.” <sup>24</sup>Igaanaga owajipatalo nigijoa notaga, odaa nigijoa lacilo-sacerdotitedi, ijo lacilo iodagawadi anoyowie Aneotedogoji ligeladi, ijaagijoo nigijoo anoiige sacerdotitedi, iditawece agoyowoogodi nigica anodaa diitigi nigida niciagi. <sup>25</sup>Nigidiaagidi jigijoo oko anicotio, odaa jegeetiogi, “Digawinitiwaji! Nigijoo goneleegiwadi gawillogojedi etiditace digoida Aneotedogoji ligeladi, codaa jogoniigaxitiniwace noiiigi.” <sup>26</sup>Odaa nigijoo lacilo nigijoo iodagawadi anoyowie ligeladi Aneotedogoji ja lixigagawepodi ijoa niodagawadi, odaa jogonadeegitace nigijoo liigexedi Aneotedogoji, pida jogoyoe monadeegi leegodi modoitiogi nigijoo noiiigi dogonigidatiniwace.

<sup>27</sup>Nigijoo iodagawadi jogonadeegi nigijoo liigexedi Goniotagodi, odaa jogodoyaticoace lodoe nigijoo lacilodi me yatecogo moiwi ica anodigotiogi. Odaa nigijoo lacilo-sacerdotitedi jegeetiogi liigexedi Goniotagodi, <sup>28</sup>“Genaga gadajonegegitiwaji codaa me gadiigenegegi me dagadiaa iigaxinaganitece loniciwaga liboonagadi nigijoo goneleegiwa. Pida digawini anenitiwaji! Ja ganiigaxinitiniwace inatawece nigeladimigipitigi nigotaga Jerusalém codaa me leedi moko galaagetedipi leegodi lemegegi nigijoo goneleegiwa.”

<sup>29</sup>Odaa Pedro ijaagijoo eletidi liigexedi Aneotedogoji jogoninigodi, moditiogi, “Leeditibige mejiwagataga Aneotedogoji ane niigetedogowa, idigida agele degejiwagataga ane ligegi oko ane dakapetege Aneotedogoji. <sup>30</sup>Aneotedogoji ane Noenogodi jotigide godaamipi eote Jesus me yewigatace, Nigijoo ane iigenatakanitalotiwaji moyeloadi moyototedeloco nicenaganagate. <sup>31</sup>Odaa Aneotedogoji ja ideyate liwai libaagadi miditaga nimedi ane dagaxa me gonegegi eote me Godacilo codaa me Gonewikatitogodi, eotedibige loiigi Israel moyakadi modinilaatece libeyacegeco, odaa Aneotedogoji ja yakadi me ixomagateetedice libeyacegeco. <sup>32</sup>Nigida moko oko nakataganadi leegodi me jinataga nigijoo Aneotedogoji aneote, codaa iniaagini Aneotedogoji Liwigo ikee nigijoo aneote. Aneotedogoji yajigote Liwigo nigina anoyiwagadi.”

<sup>33</sup>Odaa nigijoo lacilodi nogowajipatalo nigijoo Pedro lotaga, odaa eliodi moyelatema nigijoo liigexedi Goniotagodi, codaa domogodoletibige monigodi. <sup>34</sup>Pida naga dabiditini ica lacilo nigidi noiiigi ane liboonagadi Gamaliel, one fariseu. Codaa Gamaliel one niigaxinaganaga diigaxinagatece lajoinaganegeco Moisés, codaa iditawece nigidi noiiigi odeemitibige. Odaa Gamaliel ja diigenatakatiogi nigijoo liigexedi Aneotedogoji monotagateenawaanigiticoace. <sup>35</sup>Odaa jegeetiogi nigijoo seteenta lacilodi, “Akaamitiwaji goneleegiwaditigi Israel, adowetita nigida ane domegemaani memiitiogi nigidiwa goneleegiwadi! <sup>36</sup>Igaataga anogowidi nicaagape ixomagatedijo nigijoo Teudas ane diletibige degelodi me gonegegi. Odaa ja domaga cwaatolo taalia goneleegiwadi anodioteci migo idelege romaanotedi. Pida nogoyeloadi, odaa nigijoo anodiotibeci jigilaagitibece, agigo odoe libakedi. <sup>37</sup>Igaanaga yeleo Teudas, odaa jigijoo eledi goneleegiwa ane liboonagadi Judas

ane elatibige nipodigi Galiléia. Nigijoa nokododi, nigijoa lacilodi romaanotedi me domogoyemaa monilagadi godoiigi. Judas eledi yakadi eliodi oko modioteci. Pida eledi oyelodi, odaa ijotawece nigijo anodiotibeci jagaga ilaagitibece. <sup>38</sup>Odaa jigidaa me gadiladeenitiwaji. Jinaga domagawitiwaji ane beyagitema nigidiwa goneleegiwadi. Idioki, epaagopitibece! Igaataga niginoa lowooko codaa me libaketedi nigepaa libaketedi nigina oko, odaa icota me ma. <sup>39</sup>Pida niginoa lowooko inaaginoa libaketedi nige icogotedibigimece miniwataga Aneotedogoji, odaa agakatitiwaji daga oliitege. Nigida aneni me gadakapetegipitiwaji, odaa yakadi magaga akapetege nigicoa Aneotedogoji.”

<sup>40</sup>Odaa jogodibatege nigijoa lotaga Gamaliel me niladeetiniwace. Odaa jogoniditaciogi nigijoa liigexedi Aneotedogoji, nogonalaketiniwace, odaa jogoiige me dagadiaa oibake nagatetigi Liboonagadi Jesus nigina me natematikanaga. Odaa jogoikaticoace. <sup>41</sup>Odaa nigijoa liigexedi Goniotagodi ja noditicoaci me idei lodoe nigijoa seteenta lacilodi noiigi. Odaa ja ninitibigiwaji leegodi Goniotagodi me niwenigidetediniwace nigijo me ika me nawikodeega leegodi Liboonagadi ijaagijoa Jesus, codaa me nawikodeega digo mijoataga anee mowo lawikodigi nigidiwa lacilodi noiigi. <sup>42</sup>Odaa inoatawece nokododi nigijoa liigexedi Goniotagodi iditibige ligeladi Aneotedogoji, codaa me ligelatedi nigijo anonakato Goniotagodi, codaa idioka limedi modiiixinagatece Jesus, codaa moyatematitedibece nibodicetedi anele anoditece Jesus, Nigijoa Aneotedogoji ane nimonya meote me godewigatace.

### **Oixipetedice icoa seete goneleegiwadi moyaxawa nigijoa liigexedi Aneotedogoji**

**6** <sup>1</sup>Nigijoa nokododi eliodi me ili ane liwokodi anodiotibece Goniotagodi. Odaa jigida ica notigimadigi miditaga judeutedi anodotagatigi nioladi greegotedi icaagica judeutedi anodotagatigi ioladi hebraico. Nigijo anodotagatigi ioladi greego modi ica wajekalodipi aniditigi miditaga me digica modibatege liweenigi anoyopotibige nigina modinawalacetibige niweenigi inoatawece nokododi. <sup>2</sup>Odaa nigijoa dooze liigexedi Aneotedogoji jogoyatecogotee ijotawece anonakato Goniotagodi, odaa moditioigi, “Agele daga joyaaga gobakedi me jiiixinaganagatece Aneotedogoji lotaga daga leegodi me jedianaganagatece niweenaga. <sup>3</sup>Enice, inioxoadipi, nigina natigide ixipeniticoace seete goneleegiwadi gadiwigotigitiwaji anowoogoti mini Aneotedogoji Liwigo me iige lewiga, codaa nigina aninoa lixaketedi. Odaa jajicagatiogi modowediteloco nigida nibakedi modedianagatece niweenaga. <sup>4</sup>Odaa okomogoko бага jibakenaga idatawece gonimedi me jotaganegenaga Aneotedogoji codaa me jiiixinaganagatece Aneotedogoji lotaga.”

<sup>5</sup>Ijotawece nigijo lapo loiigi Goniotagodi oyemaa nigijo lowoogo nigijoa liigexedi Goniotagodi. Odaa jogoixipetice Estêvão, goneleegiwa anelioidi eliwigatakanegegi, codaa iniokini Aneotedogoji Liwigo me iige. Odaa jagaga oixipeticoace Filipe, Prócoro, Nicanor, Timom, Pármenas, ijaa



Nicolau ane elatibige nigotaga Antioquia. Nicolau aona judeu, pida бага dioteci ane lakataga judeutedi. <sup>6</sup>Odaa nigijo noiigi jigidiaa oikeetibigiwaji nigidiwa goneleegiwadi lodoe nigijoa liigexedi Goniotagodi, odaa nigijoa liigexedi jogoyotaganegе Aneotedogoji, oipeketeloco libaagatedi nigijoa seete goneleegiwadi, odipokotalo Aneotedogoji me yaxawatediogi.

<sup>7</sup>Odaa lotaga Aneotedogoji jegepaanaga ilaagitedibece. Odaa jigidapaga diiticogi me ili ane liwokodi nigijo oko anoditece naigi Goniotagodi manitaga nigotaga Jerusalém. Codaa eliodi nigijoa sacerdotitedi jogoyiwagadi nibodicetedi anele anoditece Jesus.

### Ica nogoniwilo Estêvão nigijoa lacilodi nigijo noiigi

<sup>8</sup>Aneotedogoji eliodi me ibinie Estêvão codaa eliodi loniciwaga ane yajigoteta meote niginoa godoxicegetedi codaa me loenataka ane libinienaga liwigotigi nigidi noiigi. <sup>9</sup>Pida idi ica oko ane nakapetegi, nigidi oko anida aneetege liikanagaxi judeutedi anodita “Liikanagaxi goneleegiwadi ane daga niotagipi”. Manitaga nagani niikanagaxi idiwa judeutedi ane elatibige nigotaga Cirene, Alexandria, nipodaga Cilícia codaa me Ásia. Odaa nigica oko ane nakapetegi Estêvão jigidaa diiticogi modinotigimadetege. <sup>10</sup>Pida Liwigo Aneotedogoji yajigota Estêvão lixakedi, odaa agoyakadi moigeke nigina modinotigimadetibigege. <sup>11</sup>Odaa nigidiaagidi jogoyajigotigi dinyeelo icoa goneleegiwadi oiige me niwitakaga, modi, “Jajipaagata me beyagi me dotagatibige Moisés codaa me lakapetegi Aneotedogoji.” <sup>12</sup>Odaa jigidaa nimawenegegi mowo monigiwogotice nigijo noiigi, ijoa laxokodi goneleegiwadi lacilodi, ijaagijoa niigaxinaganadi anodiigaxinagatece lajoinaganegeco Moisés. Odaa jogodoliceta modibata Estêvão me digicata leemidi, odaa jogoyadeegiticogi lodoe nigijoa seteenta lacilodi loiigi judeutedi. <sup>13</sup>Odaa jogniditiogi nigijoa goneleegiwadi anoyedia me niwitakaga modakapetege Estêvão, odaa nigidiwa goneleegiwadi modi, “Nigida goneleegiwa anotokotini beyagi me dotagatibige Aneotedogoji ligeladi ane diigenatakate moyoe mepoka nebiteda, codaa eledi beyagi me dotagatibige lajoinaganegeco Moisés. <sup>14</sup>Codaa jajipaagata mee nigijoa Jesus ane elatedibige nigotaga Nazaré micota me yaagadi nigini Aneotedogoji ligeladi codaa one iigi niginoa godakataga Moisés ane nenyagaditema jotigide godaamipi.” <sup>15</sup>Ijotawece nigijoa seteenta lacilodi idiaagi nicotiniwace, oiwita Estêvão. Agodagaticogotece moiwita Estêvão, odaa jognadi latobi me licigi aanjo latobi.

### Estêvão yotaganegе nigijoa seteenta lacilodi judeutedi

**7** <sup>1</sup>Odaa nigijo lacilo-sacerdotitedi ja ige Estêvão, meeta, “Ijo me notaganaga ijoa goneleegiwadi modakapetagagi, domigewi ijoa lotaga?”

<sup>2</sup>Odaa ja ninigodi Estêvão, mee, “Inioxadipi noiigi judeutedi, codaa makaamitiwaji anakaami lacilodi godoiigi, atacolitece yotaga! Aneotedogoji iige inoatawece codaa eliodi me datale. Niginiwa Aneotedogoji dinikeeteta gonelokodi Abraão nigijo malee ligeladi nipodigi Mesopotâmia,

maleedigicatibige dagalatiticogi nigotaga Harã. <sup>3</sup>Odaa Aneotedogoji meeteta, ‘Anotiticogi ganiigo, alati gaditacepodi, odaagemii miditaga nipodigi ane jikeetagawa.’ <sup>4</sup>Odaa Abraão ja noditicogi niigo Caldéia, odaa jigigo ligeladi nigotaga Harã. Nigidiaagidi digoida Harã, ja yeleo eliodi Abraão, odaa Aneotedogoji ja imonyatedicogi miditaga nigidi nipodigi analee gadigeladetiwaji natigide. <sup>5</sup>Aneotedogoji agica daga yajigote Abraão otegeaagaga liwaiawaanigi nigidi nipodigi. Pida Aneotedogoji begeote ligegiteta Abraão micota me yajigoteta iditawece nigidi nipodigi me nebi anida aneetege licogegi, idaagee maleedigicata lionigi Abraão. <sup>6</sup>Odaa Aneotedogoji jigidaa ligegiteta Abraão nigijo negeteta, ‘Nigijo anida aneetege gadicogegi igotibeci ligeladi miditagaeledi nipodigi, odaa micataga daga iomigigipi. Nigidiaagidi nigidi noiigitiigi nigidi nipodigi jogoiotagetibigiwaji, odaa jogoyametibigo catiwedi cwaatolo taalia nicaagape. <sup>7</sup>Odaa Ee ane Ee Ganoenogodi icota me jiloikatidi nigidi noiigitiigi nigidi nipodigi ane oiotage nigijo noiigi anida aneetege gadicogegi. Nigidiaagidi nigica oko anida aneetege gadicogegi icota me noditicoaci nigidi nipodigi, odaa jogodogetetiwa digoina analeegonite nigina natigide.’ <sup>8</sup>Odaa Aneotedogoji ja iige Abraão me dinakagidi analee lakatigi godoiigi natigide. Aneotedogoji iige Abraão me dinakagidi eotedibige midioka limedi me nalagatibige nigijo ane ligegitetege me eotetema. Naga ixomagatedijo oito nokododi menitini Isaque, odaa Abraão idaagigota me yakagidi lolaadi lionigi liciagi anee me dinakagidi. Isaqueeledi yakagidi lolaadi Jacó ane lionigi. Odaa Jacóeledi yakagidi lolaadi nigijo dooze lionigipi, ane godaamipi.

<sup>9</sup>Nigijo godaamipi jotigide eliodi monocetema nigijo ioxoa ane liboonagadi José, odaa jogoyaa micataga daga niotagi. Odaa nigijo anodinoojeteta jogoyadeegiticogi niigo Egito. Pida Aneotedogoji idioka limedi miniwa mijotaga. <sup>10</sup>Codaa Aneotedogoji elioditibece me yaxawa nigina minoa ane dakaketema. Nigijo nogoyadeegiticogi lodoe Faraó, nigijo ninionigi-eliodi Egito, odaa Aneotedogoji ja yajigote José mele anee, odaa jegeo me ninitibece Faraó, codaa Aneotedogoji yajigote lixakedi José. Odaa Faraó ja iige José me doweditologo niigo Egito, codaa midiwatawece anidiwa catiwedi ligeladi Faraó. <sup>11</sup>Nigidiaagidi jigicota ica nigigi nelegi digoida niigo Egito codaa me nipodigi Canaã. Odaa nigica oko eliodi me nawikodeega. Codaa me jotigide godaamipi agaleegica gaantokaagidi anoyeligo. <sup>12</sup>Igaanaga dibodice Jacó mina leyeema digoida niigo Egito, odaa ja imonya jotigide godaamipi ane lionigipi. Jigijaagijotigi odoejegi noko migotibeci Egito, pida agaleegoyowoogodi José. <sup>13</sup>Nigijo nigicota mitoataale migotibeci Egito, odaa José ja dinatematitioigi me niginiaagini. Odaa Faraó ja wajipatibece moyalagatiogi loiigiwepodi José. <sup>14</sup>Odaa José ja iwakateetigi ligegi Jacó ane eliodi, odaa ja node codaa miditawece loiigiwepodi malatiticogi Egito. Nigica loiigiwepodi onidiwa seteenta ciinco oko. <sup>15</sup>Odaa Jacó jigigo midiaa ligeladi Egito. Nigidiaagidi jigidiaa lemagadi, ijo lionigipi ane godaamipi,eledi idiaagaga lemagadi. <sup>16</sup>Odaa nigijo anida aneetege licogegi jogoyadeegitedicogi ijoa libitaka manitaga nigotaga Siquém, odaa jigidiaagonaligite minitaga apiigo

ane noojedi Abraão. Akaa dinilakidetege loiigi Emor, codaa me yediatece ane lica loojedi moyaa nipodigi manitaga nigotaga Siquém.

<sup>17</sup>Nigijo naga nipegi micota nigica noko Aneotedogoji meote ane ligegiteta Abraão meotetema nigica anida aneetege licogegi. Nigijoatigilo nokododi midiaagite godoiigi Egito eliodi me ili. <sup>18</sup>Odaa digoida Egito ja diigenataka ica inionigi-eliodi ane digica me dibodicetigi ane loenataka José. <sup>19</sup>Odaa nigica inionigi-eliodi ja ninaaletiniwace godaamipi, codaa eote ane beyagitema negepaagicotata me iedege moyaladi niginoa lionaga bagalee nigaanigipawaanigi, eotibige me nigo. <sup>20</sup>Odaa nigicoa nokododi jagagenitini Moisés. One nigaanigawaanigi libinienigi. Odaa jogoiliidagadi catiwedi epaa ligeladi negepaagicotata meote iniwatadigini nepenaitedi. <sup>21</sup>Igaanaga dagadiaagoyakadi moyagaditini, odaa ja yakadi me leeditibige moyaladi, pida aca liona Faraó ja liodagi, odaa ja iliidagadi micataga degewi lionigi. <sup>22</sup>Odaa jोगoiigaxitece Moisés inoatawece ane lixaketedi noiigi Egípcio, yowoogodi me dotaga, codaa yowoogodi me diba.

<sup>23</sup>Igaanaga iwida Moisés me cwareenta nicaagape, odaa ja lowoogo migo dalitioigi loiigi, israelitatedi. <sup>24</sup>Igaanigicotiogi, odaa ja nadi ica Egípcio ane yametibigo ica goneleegiwa israelita. Odaa Moisés ja nienaganeege nigijo goneleegiwa israelita ane nalaketibige nigijo goneleegiwa Egípcio, odaa Moisés ja yeloadi nigijo Egípcio. <sup>25</sup>Moisés diletibige nigijo noiigi israelitatedi dogoyowoogodi Aneotedogoji me ibake Moisés me nogaticoace me nawikodeega, pida agoyowoogodi. <sup>26</sup>Negeledi noko, Moisés ja nadi itoataale goneleegiwadi israelitatedi ane nidelaga. Odaa ja domigigo yoxogotiogi, meetiogi, ‘Diganajipaatiwatiwaji akaami yokaagetedipi! Nigida makaami, akaami dinioxomigi. Odaa igame leegodi ina me adinidelegenitiwaji?’ <sup>27</sup>Pida nigijo anepaa icogota naga nidelaga ja yamagatice Moisés, odaa meeta, ‘Agica ane gadiigeni dagakaami gonowienogodi, ogoa, domigetagakaami goniwinogodi. <sup>28</sup>Ogoa, domogoleetibige madeloati digo mijotaga meloati nigijo Egípcio jotigi-noko?’ <sup>29</sup>Nigijo Moisés naga wajipatalo nigijoa notaga, odaa jigiale, noditicogi Egito, odaa jigigo midiwa niigotedi Midiã idiaagi iomigigitigi miditaga nigica noiigi. Jigidiaagi nigijoa itoataale lionaga.

<sup>30</sup>Igaanaga ixomagatedijo cwareenta nicaagape, odaa ica aanjo ja dinikeeta Moisés digoida miditaga nipodigi ane yadilo ane digicata nigeladimigipi ipegitege aca wetiga anodita Sinai. Nigica aanjo idiaagite liwigotigi aca nialawaana, nagada nialawaana one ídi. <sup>31</sup>Igaanaga nadi Moisés eliodi me yopo, odaa jigigo ipegitege eotibige me yenikamagatece me nadi. Odaa ja wajipatalo Goniotagodi Aneotedogoji me dotaga, meeteta, <sup>32</sup>‘Jegemegee Noenogodi jotigide gadaamipi. Ee Noenogodi Abraão, Ee Noenogodi Isaque, codaa me Ee Noenogodi Jacó.’ Moisés eliodi me doi, codaa me dawigice. Codaa agaca laalegena daga iwita nigijo lakatigi. <sup>33</sup>Odaa Goniotagodi Aneotedogoji meeteta Moisés, ‘Anogaa gawelatedi ikeeni me eemiteetibigiji, leegodi nigina nipodigi anipoditeloco jiginaa jiomagaditomi. <sup>34</sup>Eliodi me jinadi yoiigi me nawikodeega digoida Egito, codaa

jajipatiogi me natiatagateloco. Odaa ja idaxoditini me inogaticogi aneitcoace me nawikodeega. Natigide, gadiigeni memii digoida Egito.'

<sup>35</sup>Ijaagijo Moisés ane daga domogoyemaa nigijo loiigi Israel, ijo modita, 'Agica ane gadiigeni dagakaami gonowienogodi, ogoa, domigetagakaami goniwinogodi!' Aneotedogoji ibake aanjo me yotaganege Moisés, nigijo aanjo ane dinikeeta Moisés madataga nagajo nialawaana ane idi. Joanigidaagee Aneotedogoji iige ijaagijo Moisés me lacilo loiigi Israel, jigijaa nogaticoace miditaga ane lawikodadi. <sup>36</sup>Jigijaagijo Moisés ane nogaticoace loiigi Israel meite niigo Egito, codaa owidi loenataka godoxicegetedi codaa me libinienaga digoida niigo Egito, miditaga akiidi-eliodi anodita 'Lixagotegegi', codaa me digoida miditaga nipodigi ane yadilo ane digicata nigeladimigipi. Odaa jigidiaagi me iige nigidi noiigi cwareenta nicaagape. <sup>37</sup>Ijaagijo Moisés meetiogi loiigi Israel, 'Ganiotagodi Aneotedogoji nimonyatedagawatiwaji oko digo meetaga me yelogoditedibece Aneotedogoji lowooko. Nigica goneleegiwa gadoliigitiwaji, odaa leeditibige matalitecetiwaji ane lotaga.' <sup>38</sup>Ijaagijo Moisés idiaagi miditaga loiigi Israel nigijo me yatecogo digoida miditaga nipodigi ane yadilo. Awatege jotigide godaamipi, codaa idiaagitice mijotaga nigijo aanjo ane yotaganege digoida maditaga wetiga anodita Sinai. Odaa ja dibatege liigaxinaganegeco Aneotedogoji ane najigotedogowa, nigijoa niigaxinaganegeco anida loniciwaga mowo me godewigatace.

<sup>39</sup>Nigijo jotigide godaamipi adomogoyemaa moyiwagadi Moisés, nakapetegi, codaa catiwedi laalegenali domagaleegoyemaa mopitacicogi niigo Egito. <sup>40</sup>Igaanaga yajebi Moisés me dopitijo, odaa modita Arão, 'Awii oenitedogodomi goniwicidi micataga daga gonoenogododi amaleegaga jilokagateloco. Igaataga ajowoogotaga nigica analeegee Moisés ane godogaticogi niigo Egito.' <sup>41</sup>Joanigijaagijoatigilo nigijoa nokododi nogoibake oolo mowo ica wacawaanigi anowo me noenogodi, odaa jogonigoditema eijedi modogeteta nigijo wacawaanigi, codaa owo nalokegi moiwenigide nigijo niwigo anepaa loenatagi. <sup>42</sup>Pida Aneotedogoji ja ikanawaanigitedicoace, odaa ja ika modogetetalo yotetitedi. Joanigidaagee nigicotece nigijoa anoditece nigijo anoyelogoditedibece Aneotedogoji lowooko, anoidi Aneotedogoji lotaganagaxi, oiditini, mee Aneotedogoji, 'Akaami loiigi Israel, nigijo midiaagonitewaji cwareenta nicaagape miditaga nipodigi nelegi ane yadilo, anigoti eijedi, pida agoleetibigetiwaji daga ogeetetiwa manigoti nigijoa eijedi. <sup>43</sup>Oyagatitibece nigijo lopegedi niwigo anodita Moloque anenita me ganoenogoditiwaji, codaa adeegitibece nigijo niwigo ane liciagi yotedi anodita Renfā aneledi enitatiwaji me ganoenogodi. Joanigidiaagidiwa ganiwiciditiwaji gadoenataka anogeetetiogi. Joanigidaa leegodi me gadadeegiticogitiwaji caticedi nigotaga Babilônia.'

44 Jotigide godaamipi ijo miditaga nigica nopegedi ane ikee Aneotedogoji miniwa liwigotigi nigijo midiaagi miditaga nipodigi ane yadilo. Oyoe nigijo nopegedi anodaagee Aneotedogoji me iigete Moisés. Aneotedogoji ikeete Moisés ica nopegedi liwinigi. 45 Nigidiaagidi jotigide godaamipi jogodibatege mijotaga eliododipi nigijo nopegedi, odaa jogonadeegiticogi minataga nigina nipodigi. Odaa jigidaagee nigicota Josué ijaagijo jotigide godaamipi nogodinigaanyetece nigina iigo. Aneotedogoji nogatedicoace eliodi eledi noiigi, odaa ja yajigotediogi godaamipi nigidi iigo. Odaa nigijo nopegedi idiaagite miditaga negepaagicota ijoa nokododi nagaga diigenataka Davi. 46 Aneotedogoji iniwa mijotaga Davi, odaa Davi ja dipokotalo Aneotedogoji me ikatetece meo dabitegetini diimigi me ligeladi Aneotedogoji, Noenogodi Jacó. 47 Pida Salomão ane lionigi Davi jigijapaga dabitegetini nigijo diimigi, ligeladi Aneotedogoji.

48 Pida Aneotedogoji anida loniciwagatedeloco inoatawece adigeladetedigi diimigi ane loenatagi oko. Joanigidaa ane yalagata me iditini nigijo ane yelogoditedibece Aneotedogoji lowooko nigijo jotigide, nigijo naga iditini ane ligegi Aneotedogoji, mee,

49 ‘ “Digoida ditibigimedi jigidiaagejo me jiige inoatawece, odaa nigina iigo micataga daga ipodagaladi ane lajo me inipenegetedini igonaka”, mee Goniotagodi Aneotedogoji.

“Odaa ica diimigi anakati me oenitomitiwaji?

Codaa igatione me inipetini?

50 Nigida me Ee jegemaga joe inoatawece aninoa.” ”

51 Estêvão egidaagee me dotaga, mee, “Nigida makaamitiwaji eliodi me dakake gadaalegenali, codaa otegexaagaga emaanu mowoogoti Aneotedogoji, otegexaagaga ajipaata ane domaga yemaa. Gadiciagitiwaji nigijo jotigide gadaamipi igaataga idioka limedi magaga odakapetege Liwigo Aneotedogoji.

52 Liwigotigi nigijo anoyelogoditedibece Aneotedogoji lowooko agica ini ane daga oiatetibeci gadaamipi. Onigodi nigijoa Aneotedogoji ane imonya migotibeci oyelogodi lotaga, nigijo anoyatematitibece Aneotedogoji me niige Liotagi anepaga igenaga. Pida jagajicitetiwaji mijotaga nelogododipi, odaa jigidaagee negeloatitetiwaji. 53 Jagabaategetatiwaji nigijoa niigenatakanegeco nigijoa niaanjetodi Aneotedogoji anoyajigota Moisés. Pida agiwagatitetiwaji nigijoa niigenatakanegeco.”

### Estêvão oyeloadi monigidatice

54 Nigijoa seteenta lacilodi noiigi nogowajipatalo Estêvão lotaga, odaa eliodi me neligideega, codaa me oyacigice loweli, leegodi lélagatema Estêvão. 55 Pida Liwigo Aneotedogoji ja dowediteloco Estêvão, odaa naga iwitibigimece ditibigimedi, odaa jona nadi latalaga Aneotedogoji, codaa nadi Jesus me dabiditedini liwai libaagadi Aneotedogoji. 56 Odaa Estêvão jegee me dotaga, “Digawini! Jinadi ditibigimedi me domoke, codaa



(Atos 7.60)

jakadi me jinadi nigijoa Goneleegiwa ane icogotibigimece ditibigimedi, dabiditini liwai libaagadi Aneotedogoji miditaga nimedi ane gonegegi.”

<sup>57</sup>Pida nigijoa lacilodi ja dinigetagatee me napaawagateloco, onoxoco napaagatedi owotibige me dagadiaa owajipatalo lotaga. Odaa ijotawece jogowalokoditeloco. <sup>58</sup>Odaa jogoyamagaticogi we nigotaga, odaa jogoixipetedice nigijoa goneleegiwadi anakaa beyagi modotagatibige Estêvão monigidatice. Odaa nigidiwa goneleegiwadi jogoyoyato nicaapatadi ica lioneeaga ane liboonagadi Saulo me yowie. <sup>59</sup>Egidaa diiticogi monigidatice, odaa Estêvão ja yotaganeege Aneotedogoji, meetalo, “Iniotagodi Jesus, abaatege iwigo.”

<sup>60</sup>Nigidiaagidi ja yamagatedini lokotidi, odaa ja dapaawe, mee, “Iniotagodi, jipokotagawa jinaga domaga galaagetedipi nigidiwa goneleegiwadi leegodi nigida libeyacegegi.” Nigidiaagidi naga nigotini me dotaga, odaa ja yeleo.

**8**

<sup>1</sup>Saulo niwoditema nigijjo noiigi moyeloadi Estêvão.

### Saulo iatetibeci ica lapo oko anonakato Goniotagodi

Ijaagijo nigijjo noko nigijjo nogoyeloadi Estêvão, ica nelogododipi nigijjo lapo oko anonakato Goniotagodi jigidaagoiatigi moiatetibeci manitaga nigotaga Jerusalém. Odaa nigijjo anonakato Goniotagodi jigilaagiteloco nipodaga Judéia, codaa me Samaria. Ijokijoateda nigijjo dooze liigexedi Goniotagodi baadaga daleditibige. <sup>2</sup>Icoa goneleegiwadi anodeemitetibige Aneotedogoji jogonaligitini Estêvão, codaa eliodi me nacaagagateloco.

<sup>3</sup>Pida Saulo jegepaanaga doletibige me yaagadi nigijo lapo oko anonakato Goniotagodi. Igotece icoa diimaga, odaa ixigiticoace inoa goneleegiwadi codaa me iwaalepodi anonakato Goniotagodi, odaa ja diigenatakatiogi moixotiwece niwilogonagaxi.

### Filipe deleticogi nipodigi Samaria

<sup>4</sup>Nigijo anilaagitibece idiaanagadiite oyatematitedibece nibodicetedi anele aneetece Jesus. <sup>5</sup>Odaa Filipe jigigo manitaga nigotaga Samaria, odaa jigidiaagi me yatematitibece Aneotedogoji me niige Jesus meote me godewigatace.

<sup>6</sup>Odaa ijotawece nigijo oko owatacotece Filipe lotaga. Iditawece najipaaga, codaa monadi ijoa loenataka godoxicegetedi. <sup>7</sup>Igaataga niwicidi abeyacagaga anodakatiogi eliodi oko ja noditicoaci, codaa eliodi me napaawagateloce naga noditicoaci. Eliodi oko ane wayodadi inaa eledi alejaadotedi ane dagadiaa ditinege eledi nicilaga. <sup>8</sup>Odaa eliodi oko ninitibigiwaji manitaga nagani nigotaga.

<sup>9</sup>Icoa nokododi onini ica goneleegiwa ane liboonagadi Simão one akaagini me oxikonegegi, odaa iditawece nigica nigeladimigipitigi nagani nigotaga Samaria oyopo. Simão dinabaketibece, mee ica me gonegegi. <sup>10</sup>Iditawece oko owatacotece, ina ane dagaxa me gonegegipi codaa me niginoa ane dagaxa me iwikodadipi codaa moditibece, “Nigini goneleegiwa gonoenogodi ane liboonagadi ‘Nelegi loniciwaga aneotedogoji.’” <sup>11</sup>Catiwedi owidi nicaagape nigini oyopo nigini goneleegiwa leegotedi nigicoa loxikonaganegeco, codaa idioka limedi mowatacotece. <sup>12</sup>Pida nigijo Filipe naga yatematitigi nigidi noiigi nibodicetedi anele anoditece Jesus, odaa nigidi noiigi jogoyiwagadi nigijoa nibodicetedi anoditece anodaagee Aneotedogoji micota me iige laalegenali nigina oko, codaa moditece loniciwaga Liboonagadi Jesus. Odaa ja dinilegetibigiwaji, goneleegiwadi codaa me iwaalepodi. <sup>13</sup>Odaa ijaagijo Simão jagaga etiwagataka, odaa ja dinilege. Nigidiaagadi idioka limedi mipegitege Filipe, odaa eliodi me yopo naga nadi godoxicegetedi codaa me nibinico aneote Filipe.

<sup>14</sup>Nigijoa liigexedi Aneotedogoji idiaagite nigotaga Jerusalém. Igaanaga owajipata modi ica noiigitigi Samaria modibatege lotaga Aneotedogoji, odaa jogoimonya Pedro ijaa João. <sup>15</sup>Igaanigicotibece, odaa jogoyotaganee Aneotedogoji, odipokoteloce nigidi noiigi modibatege Liwigo Aneotedogoji. <sup>16</sup>Leegodi anigica otiginitece nigidi oko samaritaanotedi ane dibatege Liwigo Aneotedogoji, leegodi anaga dinikateloco nigidi oko. Pida baanaga dinilegetibigiwaji moibake Liboonagadi Jesus. <sup>17</sup>Odaa Pedro ijaa João jgoipeketeloce libaagatedi nigijo oko, odaa jogodibatege Aneotedogoji Liwigo.

<sup>18</sup>Igaanaga nadi Simão Aneotedogoji naga yajigotediogi Liwigo nigijo oko nogoipeketeloce libaagatedi nigijoa liigexedi Aneotedogoji, naga nadi, odaa ja domaga yajigotiogi dinyeelo Pedro ijaa João, meetiogi, <sup>19</sup>“Aagaga jemaa manajicitiwatiwaji nigida noniciwegegi amanagawini nigica oko ane jipeketeloce ibaagatedi, odaa nigini oko ja dibatege Liwigo Aneotedogoji.”

<sup>20</sup>Pida Pedro meeta, “Jemaa Aneotedogoji me gadimonyaatedicogi akaami idiaa ganinyeelo minitaga noledi ane daga ipe leegodi me aleetibige daga jakataga me jinoojeteega nigida loniciwaga Aneotedogoji ane najigotedogowa. <sup>21</sup>Nigida makaami agica ane enitogogi, otegexaagaga akati mawii nigida gobakeditema Aneotedogoji, leegodi gadaalegena ayapidi lodoe Aneotedogoji. <sup>22</sup>Enice oleetibige madinilaanitibece, ikani nigida gadowoogo ane beyagi, codaa ipokitalo Aneotedogoji me gadaxawani. Ijoatokaaga ixomagateetedice gadowoogo ane beyagi. <sup>23</sup>Igaataga jinadi manooceetogodomi, odaa jegeo me beyagi gadaalegena. Odaa nigida gabeyacegegi jagakaami liwilogojegi.”

<sup>24</sup>Naga ninigodi Simão, meetiogi, “Adiwikodeni, ipokitalotiwaji Goniotagodi, ipokitulo amanagawini agica idonagi nigida anenitatiwaji.”

<sup>25</sup>Odaa nigidiaagidi Pedro ijaa João jogoyatematitibece codaa me odiigaxinagatece lotaga Goniotagodi. Odaa nigidiaagidi jogopitacicogi manitaga nigotaga Jerusalém. Odaa naigitinece jogodigotece icoa owidi nigotadawaanaga samaritaanotedi, odaa idiwatawece nigidiwa nigotadawaanaga anodigotece oyatematitibece nibodicetedi anele anoditece Jesus.

### Filipe yotaganege ica lacilotigi niigo Etiópia

<sup>26</sup>Ica niaanjo Goniotagodi meeta Filipe, “Adinoeni, odaa adinikaniticogi ane icogotigi niwetaga nigepaagicootinece naigi ane icogoticogi nigotaga Jerusalém anopiticogi nigotaga Gaza, nigijo naigi oxiiigodi anigotece miditaga nipodigi ane yadilo.” <sup>27</sup>Odaa Filipe ja dinoo, jigigo. Odaa digawini, ica goneleegiwa gonegegi, ane onogodinake, jonogopiticogi ligeladi digoida niigo Etiópia, waxoditinigi aca lagaagena. Nigini goneleegiwa joniginiaa doweditelogo idiwatawece nigicoa ninyeelo aca iniona-eloodotigi nigidi niigo, nagani iniona one liboonagadi Candace. Nigini goneleegiwa icogoticogi nigotaga Jerusalém. Igo nigotaga Jerusalém me dogetetalo Aneotedogoji. <sup>28</sup>Pida nenaga dopitijo odaa one yalomegetece ligi lotaganagaxi Isaiás, nigijo ane yelogoditedibece Aneotedogoji lowooko. Odaa Filipe ja naditece nagajo lagaagena nigijo goneleegiwa digoida naigi. <sup>29</sup>Odaa Liwigo Aneotedogoji jegeeta Filipe, “Emii ipecitece nagajo nagaagena.” <sup>30</sup>Odaa Filipe ja walokoditece, jigigo majotaga nagajo nagaagena, odaa ja wajipatalo nigijoa notaga nigijo goneleegiwa gonegegi me yalomegeteloco lotaganagaxi Isaiás, nigijo ane yelogoditedibece lowooko Aneotedogoji. Odaa Filipe ja ige, meeta, “Iniotagodi, owoogoti ica ane diitigi idi analomegeniteloco?”

<sup>31</sup>Odaa nigijo goneleegiwa ja igidi Filipe, meeta, “Agica inimawenegegi daga jowoogodi ica ane jalomegeteloco nige digicata ane nelogoditiwa ane diitigi nigidiwa notaga.” Odaa ja node Filipe me nicoogowatinigi nagajo lagaagena, nicoogeti liwai. <sup>32</sup>Nigijo goneleegiwa yalomegeteloco Aneotedogoji lotaganagaxi, nigijo liwai anee,

“Nigijoa liciagi nigina waxacoco anoyadeegiticogi lodoe nematagodi, codaa liciagi nigina waxacoco me digicata layaagegegi nigina monoxotegi, jigidaagee nigijoa Goneleegiwa me notokotedini.





(Atos 8.27)

<sup>33</sup> Nigica oko oyame, codaa agica ane licaajo. Agaleegicoa me yewigatedinigi nigina iigo, odaa jigidaa leegodi me dagadiaagica ane yalagata ane licogegi, leegodi jogoyeloadi.”

<sup>34</sup>Odaa nigijjo goneleegiwa gonegegi ja ige Filipe, meeta, “Dige anelogotitiwa! Ijo ane yelogoditedibece Aneotedogoji lowooko ane yalagatalo inoa lotaga, domige eetece ijaagijjo, ogoa, domige eetece eledi oko?” <sup>35</sup>Odaa Filipe jigidaa dinanatigi me yelogodita anodaa diitigilo nigijjoa notaga ane yalomegetelogo. Yatematita nigijjoa nibodicetedi anele anoditece Jesus. <sup>36</sup>Odaa egidaa diiticogi

me wiajeega, jonogotota ica nipodigi anidi natoaga. Odaa nigijjo goneleegiwa jegee, “Digawini! Digoina idi natoaga. Ejidigica anigetigida leegodi daga adolii me idinilege.” <sup>37</sup>Naga ninigodi Filipe, odaa jegeeta, “Nigina nigewi me iwagatakani manitawece gadaalegena, odaa бага yakadi madinilegeni.” Odaa jegee nigijjo goneleegiwa, “Ejiwagadi Jesus Cristo me Lionigi Aneotedogoji.”

<sup>38</sup>Odaa nigijjo goneleegiwa ja dipoko me onicoogetini nagajo lagaagena, odaa Filipe, ijo goneleegiwa jogowaxoditini ninyogodi, odaa Filipe ja ilege nigijjo goneleegiwa. <sup>39</sup>Igaanaga daxoditicoace ninyogodi, odaa Liwigo Goniotagodi ja yadeegi Filipe mopi. Odaa nigijjo goneleegiwa gonegegi naga domaga doletibige, pida agaleegica me nadi, odaa jigidaa diitacogoci me diniwiaje, eliodi me ninitibece. <sup>40</sup>Liwigo Goniotagodi ja yadeegi Filipe, odaa jigicota nigotaga Azoto. Maleegidaa diitigi me diniwiaje Filipe, idokee me yatematitedibece nibodicetedi anele anoditece Jesus midiwataga nigotadi anigotece negepaagicota nigotaga Cesaréia.

### Anodaagee Saulo naga nakato Goniotagodi

(Atos 22.6-16; 26.12-18)

**9** <sup>1</sup>Nigijjoa nokododi, Saulo ja dibikotiogi me nigodi nigijjo anodiotibece Goniotagodi Jesus, odaa jigigo minitaga nigijjo lacilo-sacerdotitedi digoida nigotaga Jerusalém. <sup>2</sup>Odaa Saulo ja dipokota notaganagaxiidi lidietigi nigijjoa lacilodi liikanagaxiidi judeutedi digoida nigotaga Damasco. Saulo yemaa nagadi notaganagaxi me ikee mida nagatetigi eotibige digicatibece oko ane diotece Naigi Goniotagodi manitaga nagani nigotaga, odaa yakadi me niwilo goneleegiwadi codaa miwaalepodi, odaa ja yadeegi me niwilotibigiwaji digoida nigotaga Jerusalém.

<sup>3</sup>Naga yakadi notaganagaxiidi, odaa ja diniwiaje. Igaanigipegita nigotaga Damasco, codaanogonida naga nadi ica natalaga ane yoniciwadi ane icogotibigimece ditibigimedi, odaa nigica natalaga ja naloteloco anei. <sup>4</sup>Odaa Saulo jegenitiniigi, codaa wajipata ica ane dotaga, anee, “Saulo, Saulo! Igame leegodi ina madiatenitibece?” <sup>5</sup>Odaa Saulo ja ige, meeta, “Iniotagodi, amakaami?” Odaa nigijjo ane dotaga jegee, “Ee Jesus, jegemegee ane iatenitibece!” <sup>6</sup>Natigide adabititini, odaagemii, akaatiwece nigotaga Damasco. Odaa jigidiaagi nigoyelogoditagawa ane leeditibige mawii.”

<sup>7</sup>Odaa nigijjoa goneleegiwadi lixigagawepodi Saulo me diniwiaje ja dabiditiniwace, agica gaantokaagida ligegi. Owajipata nigijjo ane dotaga, pida agica gaantokaagini anonadi. <sup>8</sup>Odaa Saulo naga dabiditini, odaa ja domaga noletice, pida agalee yatetibece. Odaa nigijjoa lokaagetedipi jogodibatigi libaagadi, odaa jogoyadeegiticogoci catiwedi nigotaga Damasco. <sup>9</sup>Odaa eote itoatadigida nokododi me daga yatetibece, codaa agica ane yeligo, otegeaagaga gaantokaagini ane wacipeta.

<sup>10</sup>Onini ica goneleegiwa manitaga nigotaga Damasco ane liboonagadi Ananias, inaagina ane-diotibece Jesus. Onica ica lakatigi micataga daga ligeedi, one nadi Goniotagodi. Odaa Goniotagodi oneeteta, “Ananias!” Nogone ninigodi,

oneetalo, “Ite ee inane, Iniotagodi.” <sup>11</sup>Odaa jegeeteta Goniotagodi, “Adinoeni, odaagemii ligeladi Judas mijotaga ladigodi ane liboonagadi ‘Ladigodi ane dixoke’. Odaagoleetibige goneleegiwa ane liboonagadi Saulo, anelatibige nigotaga Tarso. Jiginiaagini digoida yotaganene Aneotedogoji. <sup>12</sup>Codaa aagaga ijo lakatigi ane micataga daga ligeedi, nadi ini goneleegiwa ane liboonagadi Ananias micota digoida aneitice, odaa naga ipekoteloco libaagatedi jegeotace me yatetacibece.”

<sup>13</sup>Odaa Ananias ja ninigodi, meetalo, “Iniotagodi, eliodi oko onatematitiwa anini nigini goneleegiwa. Oditece icoatawece nigicoa loenataka ane beyagi me dakapetege nigidi anodiotagadici digoida nigotaga Jerusalém. <sup>14</sup>Odaa natigide etini jegenotogowa, codaa idiwa anoyajigota notaganagaxiidi lidiko nigijo anoiige sacerdotitedi. Nigidiwa notaganagaxiidi oiikee mida nagatetigi me niwilotiniwace inatawece oko anoibake Gaboonagadi nigina moyotaganene Aneotedogoji.”

<sup>15</sup>Pida Goniotagodi jegeeteta Ananias, “Emii minitaga igaataga jегemegee ane jiomagaditice, codaa jao me dibatomi. Igo eetici miditaga noiigi ane daga judeutedi, minoataga inoa inionaga-eloodoli, codaa me minataga noiigi israelitatedi. <sup>16</sup>Odaa emegee jikeeta me leeditibige me dawikode leegodi me dibatomi.”

<sup>17</sup>Odaa Ananias jigigo, odaa ja dakatiwece Judas ligeladi. Naga ipekoteloco libaagatedi Saulo, odaa jegeeta, “Inioxa Saulo, Goniotagodi idiige me janagi. Jigijaagijoa Goniotagodi Jesus ane dinikeetdagawa digoida naigi naga anipectio. Odaa ja idimonya eotedibige matenitacibece, codaa eote me gadajacagati Aneotedogoji Liwigo.” <sup>18</sup>Odaa agica daga leegi jegenitedini icoa ane icogotediwece Saulo ligecooge micoataga niginoa nogojegi lexoli. Odaa Saulo ja yatetacibece. Nigidiaagidi ja dabiditini, odaa ja dinilege. <sup>19</sup>Igaanaga aniodi, odaa ja yoniciwaditace.

### **Saulo yatemati nibodicetedi anele anoditece Jesus digoida nigotaga Damasco**

Odaa Saulo jigidiaagite miditaga nigijoa anodiotibece Jesus onatecigidiwa nokododi digoida nigotaga Damasco. <sup>20</sup>Agica daga leegi odaa jigigo midiwataga liikanagaxiidi judeutedi me yatematitibece Jesus me Lionigi Aneotedogoji.

<sup>21</sup>Ijotawece nigijo anowajipata Saulo me dotaga eliodi moyopo, odaa modi, “Nigida goneleegiwa jigidaagida nigijo aneote inoatawece me domaga yaagadi oko anoibake Liboonagadi Jesus digoida nigotaga Jerusalém. Odaa natigide jegenagi digoina idoka libakedi me niwilotiniwace nigina anodiotibece nigijoa goneleegiwa, odaa yadeegiticogi midiwataga nigijo anoiige sacerdotitedi digoida nigotaga Jerusalém.” <sup>22</sup>Pida Saulo jigidapaga diiticogi mepaanigida loniciwaga me dotaga. Codaa yenikamaga me yelogodi me nigijaagijoa Jesus ane niige Aneotedogoji meote me godewigatace. Odaa nigijoa judeutedi ane ligeladi nagani nigotaga agoyakadi modiiitege, agica anoyatigi ligegi dogoigidi.

<sup>23</sup>Igaanaga owidi nokododi ixomagatedijo, odaa nigijoa judeutedi ja dinatecogotee modoletibige nimawenegegi moyeloadi Saulo. <sup>24</sup>Pida Saulo

ja dibodice modoletibige moyeloadi. Codaa ja yowoogodi me domaga onibeotibigege midoataga lapoaco-nelecoli nagani nigotaga, inoatawece nokododi, codaa minoatawece enoaleli. <sup>25</sup>Pida ica enoale nigijo anodiotibece Goniotagodi jogoyexagatinigi Saulo aca etacani eloodo, odaa jogonikatinece ijo lawimagajegi nibaloote nagani nigotaga, onikatinicogi we, odaa jogoiwoko judeutedi.

### **Saulo igo nigotaga Jerusalém**

<sup>26</sup>Saulo nigigo nigotaga Jerusalém, odaa ja doletibige me dinawanagaditege nigijo anodiotibece Goniotagodi. Pida iditawece odoita leegodi agoyiwagadi nagaga diotece Goniotagodi. <sup>27</sup>Pida Barnabé бага yaxawa, odaa ja yadeegiticogi midiwataga liigexedi Goniotagodi. Odaa Barnabé ja yatematitigi anodaagee Saulo me nadi Goniotagodi digoida naigi codaa Goniotagodi me yotaganege Saulo. Barnabé eledi yatemati anodaagee Saulo mabo laalegena me yatematitibece Liboonagadi Jesus digoida nigotaga Damasco. <sup>28</sup>Odaa Saulo jigidiaagitic miditaga, ja dinadeegitibigege midiaanaga dii manitaga nigotaga Jerusalém, codaa abo laalegena me yatematitibece loniciwaga Liboonagadi Goniotagodi. <sup>29</sup>Eleditace notaganegetiniwace codaa me dinotigimadetege nigijoa judeutedi anodotagatigi nioladi greego, pida idokee modoletibige nimawenegegi moyeloadi Saulo. <sup>30</sup>Pida nigijo gonioxoadipi nogoyowoogodi, odaa jogoyelotegeticogi Saulo digoida nigotaga Cesaréia, codaa nigidiaagidi jogoimonyaticogi nigotaga Tarso.

<sup>31</sup>Odaa jigidaagee naga wakamaga iditawece nigijoa lapoli oko anonakato Goniotagodi digoida nipodigi Judéia, nipodigi Galiléia, codaa me Samaria. Codaa eliwagatakanegegi jегeпаanaga ili, codaa odeemitetigilo Goniotagodi nigina mowote inoatawece ane loenataka. Odaa Liwigo Aneotedogoji ja yeloodagatee laalegena, codaa nigidiwa lapoli gonioxoadipi idiokaanaga limedi mepaanaga eliodi.

### **Ica Enéias naga icí me deelotika**

<sup>32</sup>Odaa Pedro midiaanagadii, jigicota aca nigotaga ane liboonagadi Lida igo me dalitigi loigi Goniotagodi anidiaa ligeladi. <sup>33</sup>Jigidiaagi Pedro nigicota ica goneleegiwa ane liboonagadi Enéias, jonegeote oito nicaagape midi miwooteloco nipe, one alejaado ane dagadiaa ditinege. <sup>34</sup>Odaa Pedro jegeeta, “Enéias, Jesus Cristo gadicilatiti nigina natigide! Adabititini, odaa anibaatine gadipe!” Odaa agica daga leegi Enéias ja dabiditini. <sup>35</sup>Odaa ijotawece nigijo nigeladimigipitigi nigotaga Lida codaa ane nigeladimigipitigi nipodigi Sarena onadi Enéias naga icí, odaa jagagonakato Goniotagodi.

### **Ica anodaagee Dorcas me yewigatace**

<sup>36</sup>Digoida nigotaga Jope onani aca iwaalo aneyiwagadi Goniotagodi. Nagani iwaalo one liboonagadi Tabita, eledi liboonagadi me Dorcas, nioladi greegotedi

amina anejinagata “Oticaganigo”. Nagajo iwaalo onidioka limedi me yaxawa nigicoa madewetedipi, codaa meote owidi eletidi loenatakatema anele nigica madewetedipi. <sup>37</sup>Icoa nokododi Dorcas ja deelotika, oada ja yeleo. Oada icoa lokaagetedipi jogonilege lolaadi, oada jigidiaagoyatice minitaga ica diimigi-le ane idei ditibigimedi. <sup>38</sup>Oada nigijo anodiotibece Jesus jogodibodicetibige Pedro minitigi manitaga nigotaga Lida, ane daga leegita me yototice nigotaga Jope. Nigijo nogodibodiceta, oada jogoiige itoataale goneleegiwadi migotibeci minitaga Pedro odipokota me yediiga migo Jope. <sup>39</sup>Oada Pedro ja dinoe, jigigo dioteci. Igaanigicoticogi digoida Dorcas ligeladi, oada jogoyadeegitibigimece Pedro minitaga nigijo diimigi-le ane idei ditibigimedi, anoyatice Dorcas lolaadi. Ijotawece nigijo wajekalodipi idiaagiticoaci oyawiile codaa me nacaagagateloco. Oikee ijoa nijayeli codaa me inoa eletidi lowoodi ane loenataka Dorcas malee yewiga. <sup>40</sup>Oada Pedro ja dipokotiogi ijotawece nigijo oko me noditicoaci, nigidiaagidi ja yamagatedini lokotidi, oada ja yotaganene Aneotedogoji. Oada naga nawiilitetege lolaadi Dorcas, oada jegeeta, “Tabita, anicootini!” Oada ja noletice. Igaanaga nadi Pedro, oada ja nicotini. <sup>41</sup>Pedro naga dibatigi libaagadi, oada ja yaxawa me dabiditini. Nigidiaagidi Pedro jegeniditioagi ijotawece nigijo lapo anoyiwagadi Goniotagodi, codaa me nigijo wajekalodipi anoyiwagadi Goniotagodi, oada ja yajigotiogi Dorcas naga yewigatace.

<sup>42</sup>Nigijo nibodigi aneetece nigida niciagi jigilaagiteloco anitawece nigotaga Jope, oada eliodi oko anoyiwagadi Goniotagodi. <sup>43</sup>Oada Pedro jigidiaagi owidi nokododi ligeladi Simão nigijo nilikenogodi ewacogo.


### Cornélio dienagata Pedro

**10** <sup>1</sup>Digoida manitaga nigotaga Cesaréia oninica goneleegiwa ane liboonagadi Cornélio. Nigini goneleegiwa one nigoloneegi niomadagawadi romaanotedi, nigica lapo anoyatigi me “Italiano”. <sup>2</sup>Cornélio goneleegiwa ane deemitetibige Aneotedogoji, codaa iditawece loigiwepodi idioka limedi modogetetalo Aneotedogoji. Codaa owidi dinyeelo ane yajigo me yaxawa madewetedi miditaga noiigi judeu, codaa idioka limedi me yotaganene Aneotedogoji. <sup>3</sup>Ica noko naga nipegi me iniwatadagani lakata me gocidi, nagajo lakata ligilegegitibece nigidi noiigi judeutedi moyotaganene Aneotedogoji. Oada Cornélio jigijo lakatigi micataga daga ligeedi, codaa yenikamagatece me nadi ica niaanjo Goniotagodi migo minitaga. Oada nigica aanjo jegeeta, “Cornélio!” <sup>4</sup>Cornélio naga iwita nigijo aanjo, eliodi me doita, naga igidi nigijo aanjo, meeta, “Amiina, iniotagodi?” Oada nigijo aanjo oneeta, “Aneotedogoji wajipatedagawa motaganegeni, codaa gadati nigina maxawani madewetedi. Oada Aneotedogoji ja lowoogo me gadibinieni. <sup>5</sup>Natigide awii ieni goneleegiwadi migotibeci nigotaga Jope odigota Simão aneledi liboonagadi me Pedro. <sup>6</sup>Nigini Pedro anejitagawa etini idiaa lotokagadi ligeladi nigijoeledi Simão ane libakedi me nilike ewacogo, ligeladi ipegitege akiidi-eliodi.”

<sup>7</sup>Nigijo nogopi nigijo aanjo ane yotaganeege Cornélio, odaa Cornélio jegeniditiogi itoataale liotaka, codaa me onijoteci nigijoa niodagawadi, eledi deemitetibige Aneotedogoji codaa idioka limeditibece me yaxawa Cornélio. <sup>8</sup>Odaa Cornélio ja yatematitioigi ijoatawece nigicoa ane nadi, odaa ja iigeticoigi nigotaga Jope.

<sup>9</sup>Negeledi noko naga yaxogo-noko jogodipegita nigotaga Jope. Nagajo lakata Pedro jagagigo ditibigimedi nigijo diimigi me yotaganeege Aneotedogoji. <sup>10</sup>Pedro ja nigicile, ja domaga yemaa maniodi. Maleegidaagee moyoe liweenigi, Pedro jigijo ica lakatigi. <sup>11</sup>Nadi me domoke nigica ditibigimedi, odaa ja dinikatini ica lakatigi liciagi nagana nigelate nelegi one dinigoe idiwatawece cwaatolo liwailidi. Odaa nagaca nigelate ja dinikatinigiigo. <sup>12</sup>Catinedi nagadi nigelate onidiwa inoatawece ane latopaco eijedi anidiwa cwaatolo logonaka, inoa eijedi anoyawaligegetinigi iigo le, codaa me ilaagaxodi. <sup>13</sup>Odaa Pedro ja wajipata ica ane dotaga, meeta, “Pedro, adabititini, anigoti nigidiwa eijedi, odaageliciteda!” <sup>14</sup>Pida Pedro jegee, “Okoo, ajakadi Iniotagodi Aneotedogoji! Agica daga jeligo otigiditece anoyolitogodomi gonajoinaganegeco me jelicaga, nigina gonajoinaganegeco anodita me napioi.”

<sup>15</sup>Odaa nigijo ane dotaga jegeetaca Pedro, “Jinagaleetibige daaditaga akati melici inoatawece aneete Aneotedogoji mele melici!” <sup>16</sup>Itoatadigida



(Atos 10.9)

meeta Pedro nigijo nigege ane icogotibigimece ditibigimedi. Odaa agica daga leegi nagajo nigelate jogopitacibigimece ditibigimedi.

<sup>17</sup>Egidaagee Pedro me yowo codaa me doletibige me yowoogodi ane diitigi nigijo lakatigi, odaa nigijoa goneleegiwadi ane iige Cornélio jigicotiobece odaa jogodigikatigi ica ane digetigi ligeladi Simão, odaa jogotota lodoe ica lapoaginelegi nigini diimigi. <sup>18</sup>Odaa jigijo onidita nigidi nigeladimigipi, odaa jogoige, modita, “Agica mina limedi ica goneleegiwa ane liboonagadi Simão Pedro?”

<sup>19</sup>Egidaagee Pedro me yowo nigijo ane nadi, odaa Liwigo Aneotedogoji jegeeta, “Digawini! Idiwa itoatadigida goneleegiwadi odoletibigagaji.

<sup>20</sup>Enice adabititini, odaagemii digoida natinedi. Emii mijotaga, codaa jinagawienatakani negemaga inimonyatagawa.” <sup>21</sup>Odaa Pedro ja dinikatini, igo midiwataga nigijoa goneleegiwadi, odaa jegeetiogi, “Jegemegee anoletibigetiwaji. Igame leegodi managitiwaji?”

<sup>22</sup>Naga oninigodi, modita, “Nigijo goloneegi anodita Cornélio godiige me janagagatagawa. Cornélio goneleegiwa ane igenaga, ane dogetetalo Aneotedogoji. Codaa inatawece judeutedi odeemitetibige. Ica aanjo ane dibatema iniokiniwateda Aneotedogoji ibodicaxi Cornélio me leeditibige meniditagawa memii digoida ligeladi eotibige me wajipatalo gadotaga.” <sup>23</sup>Odaa Pedro ja node nigijoa goneleegiwadi me dakatiobece nigijo diimigi midiaa limedi nigijo enoale.

### Pedro igo ligeladi Cornélio

Negeledi noko Pedro ja dinoe, odaa jigigo dioteci nigijoa goneleegiwadi, codaa ijo gonioxoadipi nigeladimigipitigi nigotaga Jope anodioteci. <sup>24</sup>Negeleditace noko jogotota nigotaga Cesaréia, Cornélio ja nibeotibigege micotibeci, odaa yatecogotee litacepodi inaagina ane dagaxa me lokaagetedipi. <sup>25</sup>Igaanaga icotio Pedro odaa naga domaga dakatiwece ijo diimigi, odaa Cornélio ja dakapetege, ja dakagitini lodoe Pedro me domaga dogeteta. <sup>26</sup>Pida Pedro naga nawacetibige odaa jegeeta, “Adabititi! Igaataga ee goneleegiwa digo makaamitaga.”

<sup>27</sup>Egidiaagi Pedro me notaganegetice Cornélio, pida naga dakatiwece ica diimigi, odaa jigicotiogi eliodi oko ane yatecogo. <sup>28</sup>Odaa Pedro jegeetiogi, “Jowoogodi me igenaga mowoogotitiwaji gonajoinaganegeco metigodoli anoko judeu miniga jawaligagatibecitiwaji ligeladi niginaeledi noiigi ane daga judeu, codaa etigodoli me idinawanagatagatege nigina me yatecogo. Odaa okotawece anoko judeutedi jilegatibige niginaeledi oko ane daga judeutedi daga dagaxa me napioi laalegenali, odaa agotogoyakadi mototalo Aneotedogoji. Pida Aneotedogoji ja nikeetediwa me daga igenaga me jilegatibige niginaeledi oko me dagaxa me napioi laalegena. <sup>29</sup>Joanigidaa leegodi nigijo naga ienaganitiwa me janagi, odaa ja janagi, ajotigimade. Enice jema me jowoogodi anawiitigiji maniditiwa.”

<sup>30</sup>Odaa Cornélio ja ninigodi, meeta, “Eji negeote itoatadigida nokododi nigijo me jotaganege Aneotedogoji digoina igeladi, ejime nagani lakata natigide, iniwatadagani lakata me gocidi. Codaagida ijo goneleegiwa naga dinikee yodoe, dinixotinigilo nowoodi lapacogogoli, codaa datale. <sup>31</sup>Odaa

jegeetiwa, ‘Cornélio, Aneotedogoji najipatedagawa motaganegeni. Igaataga gadati, odaa ja lowoogo me gadaxawani leegodi maxawani madewetedi. <sup>32</sup>Enice awii oko ieniticogi nigotaga Jope modigota Simão, aneledi liboonagadi me Pedro. Jiginiaagani idiaa lotokagadi ligeladi nigijoeledi Simão ane libakedi me nilike ewacogo, codaa ligeladi ipegitege akiidi-eliodi.’ <sup>33</sup>Odaa agica ane jopagadi ja jienagatagawa, odaa ja godiwikodenegegi alawini jaganagi. Odaa natigide etoko okotawece jatecogojogo lodoe Aneotedogoji me jajipaagata nigica Goniotagodi ane gadiigenite me anelogotitogowa.”

<sup>34</sup>Odaa Pedro jigidaa dinanatigi me dotaga, odaa jegee, “Nigina natigide ja jowoogodi mewi Aneotedogoji midokidata anigotediogi inatawece oko. <sup>35</sup>Aneotedogoji dibatetege inatawece nigina anodeemitetigilo codaa mowo ane igenaga, aniwiteta nigica noiigi anelatibige nigina oko. <sup>36</sup>Nigida makaami owoogotitwaji Aneotedogoji me iwakateetedibige lotaga noiigi Israel, nigijo naga oyatematitibece Aneotedogoji me daga domaga yemaateda me lakapedipi nigijoa eletidi noiika, codaa moyelogoditedibece nibodicetedi anele aneetece Jesus Nigijoa ane Goniotagodi ane iige inoatawece. <sup>37</sup>Eledi owoogotitwaji nigijo natematigo anoyelogoditedibece digoida nipodigi Judéia. Nigidiaagidi João Batista naga yelogodi nigijo latematigo, odaa ja nilegetiniwace oko, odaa jigidaa dinanatigi moyelogoditedibece nibodicetedi anele digoida nipodigi Galiléia. <sup>38</sup>Codaa owoogotitwaji Aneotedogoji me niige Liwigo me doweditelogo Jesus anelatedibige nigotaga Nazaré, codaa me yajigotalo loniciwaga. Odaa jigidaa naga diite, eote anele, codaa nicilatitidiniwace eliodi oko ane dakatiogi diaabo, leegodi Aneotedogoji miniwa mijoataga.

<sup>39</sup>Nigida moko oko nakataganadi leegodi jinataga ijoatawece Jesus ane loenataka digoida nigotaga Jerusalém, codaa me niginoa eletidi niigotedi judeutedi. Odaa idiaagidi judeutedi jogoyototedeloco nicenaganagate moyeloadi. <sup>40</sup>Pida naga ixomagatedijo itoatadigida nokododi, odaa Aneotedogoji ja yewikatititace, codaa eote me dinikeetedogowa. <sup>41</sup>Pida adinikeetediogi inatawece oko, okomokoko me dinikeetedogowa, anoko nigijo Aneotedogoji anakaa godiomagaditedice moko nakataganadi. Codaa gogiiwa me jiniodaga, codaa me jacipaga nigijo Aneotedogoji naga yewikatititace. <sup>42</sup>Codaa Jesus godimonya me jatematiigatedibece minataga nigina noiigi codaa mejinagatiogi Aneotedogoji me iomagaditedice Jesus micota me Niwinogodi oko bagalee newiga inaagina baanaga nigo. <sup>43</sup>Ijotawece nigijo anoyelogoditedibece Aneotedogoji lowooko nigijo jotigide oditece Jesus, codaa oditece Aneotedogoji micota me ixomagateetedice libeyacegeco inatawece nigina anonakato Goniotagodi Jesus leegodi loniciwaga Liboonagadi.”

### **Aneotedogoji yajigotediogi Liwigo nigijo ane daga judeutedi**

<sup>44</sup>Egidaagee Pedro me dotagatibece, odaa Liwigo Aneotedogoji ja dinikatiogi ijotawece nigijo anowajipata me datematika. <sup>45</sup>Nigijoa judeutedi anoyiwagadi Jesus lixigagawepodi Pedro ane icogoticogi Jope,



eliodi moyopo leegodi Aneotedogoji meledi yajigotediogi Liwigo nigijo ane daga judeutedi. <sup>46</sup>Leegodi mowajipata modotagatigilo eletidi iolatedi ane digica modotagatigi codaa owajipatiogi modogetetibigimece Aneotedogoji leegodi meliodi loniciwaga. Odaa Pedro jegee, <sup>47</sup>“Nigina oko jogodibatege Liwigo Aneotedogoji digo mokotaga me jibagatege. Odaa agica ane yakadi me yolitege me dinilegetinigi ninyogodi.” <sup>48</sup>Odaa Pedro ja diigenatakatiogi monilegetiniwace odatika Liboonagadi Jesus Cristo. Odaa nigidiaagidi jogodipokota Pedro midiaagi miditaga onatecigidiwa nokododi.

**Pedro yatematitioyi loiyi Goniotagodi digoida Jerusalém  
icoatawece ane ixomagateetedijo manitaga nigotaga Cesaréia**

**11** <sup>1</sup>Nigijoa eletidi liigexedi Aneotedogoji icaagica eledi gonioxoadipi ane ligeladi nipodigi Judéia odibodicetibige moyalagatiogi ane daga judeutedi modibatege lotaga Aneotedogoji. <sup>2</sup>Pida nigijo Pedro nogopitacibigimece nigotaga Jerusalém, odaa nigijo lapo judeutedi jogodinotigimadetege Pedro, leegodi odiletibige daaditagadiaa yotete lajoinaganegeco Moisés. <sup>3</sup>Odaa modita, “Nigida makaami akaatiwece ligeladi oko ane daga dinakagiditibigiwaji ane dogodioteci lakatigi godoiyi judeutedi, codaa gagiiwepodi.”

<sup>4</sup>Odaa Pedro ja yatematitioyi ijoatawece nigijoa ane ixomagateetedijo manitaga nigotaga Cesaréia, agica ane yagaditema, meetiogi, <sup>5</sup>“Idiaagejotice nigotaga Joep, egidaagee me jotaganeege Aneotedogoji, odaa jigijo yakatigi micataga daga igeedi. Jinadi ajo nigelate nelegi ane dinigoe ijoatawece cwaatolo liwailidi. Odaa nagajo nigelate ja dinikatini icogotibigimece ditibigimedi, nipegitiwa. <sup>6</sup>Naga jiwitinece, odaa ja jinadi inoatawece eijedi cwaatolo logonaka, niginoa eijedi ane doxice, inoa ane oyawaligegetinigi iigo le, codaa me ilaagaxodi. <sup>7</sup>Odaa ja jajipata ijo ane dotaga digoida ditibigimedi, aneetiwa, ‘Adabititini, Pedro! Anigoti nigidiwa eijedi, odaageliciteda!’ <sup>8</sup>Pida meji, ‘Okoo, ajakadi Iniotagodi Aneotedogoji! Ajao nigida anenita. Igaataga anigica daga jeligo niginoa aneeta gonajoinaganegeco me napioi, codaa me yolitogodomi me jelicaga.’ <sup>9</sup>Pida nigijo nigege ane icogotibigimece ditibigimedi jegeetaciwa, ‘Jinagaleetibige ganajoinaganegeco dogoyolitagadomi melici nigijo baanaga yapitagadi Aneotedogoji, odaa jegee yakadi melici.’ <sup>10</sup>Odaa jigidaagee, nigijo nigege itoatadigida me dotaga, odaa nigidiaagidi ijoatawece ane jinadi jogopitibigimece ditibigimedi. <sup>11</sup>Odaa ajaagajo nagajo lakata ijoa itoatadigida goneleegiwadi jigicotiobece nigini diimigi ane imedagadi. Ijo ica ane liigexedi icogoticogi nigotaga Cesaréia. <sup>12</sup>Odaa Liwigo Aneotedogoji ja idiige mejigo mijotaga, agica daga jawienataka. Codaa ijo me ixigagawepoditicogi nigotaga Cesaréia seis gonioxoadipi ane icogoticogi nigotaga Joep, odaa ja jakagatiwece ligeladi Cornélio. <sup>13</sup>Odaa ja natematitogowa ica anodaagee magaga nadi ica aanjo ane dinikeeta digoina ligeladi. Nigica aanjo oneeta, ‘Awii oko ane ieniticogi nigotaga Joep modigota goneleegiwa ane liboonagadi Simão, aneledi liboonagadi me Pedro. <sup>14</sup>Nigini Simão jiginiaa yelogoditagawa anodaagee Aneotedogoji meote me gadewikitace codaa me iditawece gadoiigiwepodi.’

<sup>15</sup>Odaa egidaa diiticogi me jatematikatiogi, odaa Liwigo Aneotedogoji ja dinikateloco digo mijotaga nigijo naga dinikatogoloco nigijo noko maleeka idinojocagatini me jatematiigatibece Jesus naga yewigatace. <sup>16</sup>Odaa ja nalagatibigiji nigijoa lotaga Goniotagodi nigijo meetedogowa, ‘Ewi João mepaga ibake ninyogodi me gadilegenitiwaji, pida Aneotedogoji бага ibake Liwigo me dakatiwaajitiwaji.’ <sup>17</sup>Aneotedogoji yajigotediogi nogeedi liciagi nigijo gonogeedi ane najigotedogowa nigijo nigijaanigijotigi naga jinakatonaga Goniotagodi Jesus Cristo. Odaa ajakadi daga jakapetege nigica aneote Aneotedogoji.”

<sup>18</sup>Igaanaga owajipatalo nigijoa lotaga Pedro, odaa jogoika modinotigimadetege, pida jogodogetetibigimece Aneotedogoji, codaa modi, “Aneotedogoji diceledi aagaga yaxawa nigijoa ane daga judeutedi modinilaatece libeyacegeco, odaa jagageote me newigatace.”

### Ica lapo oko anoyiwagadi Goniotagodi digoida nigotaga Antioquia

<sup>19</sup>Igaanaga yeleo Estêvão, odaa jogoiatetibeci nigijo eledi anodiotibece Jesus, odaa jigilaagitibigiwaji idiaanagadiite. Inatibece ototicogi negepaa nipodigi Fenícia, codaa me minitaga lidelogo-nelegi Chipre, codaa me manitaga nigotaga Antioquia. Odaa jogoyatematitigi idiokidi ane judeutedi nibodicetedi anele anoditece Goniotagodi Jesus. <sup>20</sup>Pida nigijo eledi anoyiwagadi Goniotagodi ane icogoticogi lidelogo Chipre aniaa nigotaga Cirene bogoyatematitigi nibodicetedi anele nigijo oko ane daga judeutedi. <sup>21</sup>Odaa Goniotagodi ja yajigotediogi loniciwaga, odaa eliodi oko jogoyiwagadi lotaga, codaa monakato Goniotagodi.

<sup>22</sup>Odaa nigijo lapo loiigi Goniotagodi ane idei digoida nigotaga Jerusalém jogodibodicetibige nigida niciagi digoida nigotaga Antioquia. Odaa jogoiige Barnabé migo nigotaga Antioquia. <sup>23</sup>Igaanigiticogi Antioquia, odaa ja nadi Aneotedogoji meliodi meletetema nigidi noiigi anidiaa ligeladi. Igaanaga nadi, odaa eliodi me ninitibece codaa meo loniciwaga nigijo oko modiotetece Goniotagodi me daga oikata eliwagatakanegegi. <sup>24</sup>Igaataga Barnabé goneleegiwa anele, codaa eliodi eliwagatakanegegi, codaa Aneotedogoji Liwigo dowediteloco. Odaa eliodi nigijo oko anoyiwagadi Goniotagodi ja dinatecogoteetege nigijo lapo loiigi Goniotagodi.

<sup>25</sup>Nigidiaagidi Barnabé jigigo nigotaga Tarso igota Saulo. <sup>26</sup>Nigijo naga dakapetege Saulo, odaa ja yadeegiticogi nigotaga Antioquia. Odaa jigidiaagiticoace onidateci nicaagabi, codaa idioka limedi modinatecogoteetege nigijo loiigi Goniotagodi, oniigaxitiniwace eliodi oko anodaagee gotiwagatakanegegi. Nigijo nigeladimigipitigi nagani nigotaga joanigidiaagidi odoejedipi moyatigi me “Loiigi Cristo” leegodi moyiwagadi Goniotagodi.

<sup>27</sup>Nigijoa nokododi ja noditicoaci nigotaga Jerusalém onatecigijo nigijo anoyelogoditedibece Aneotedogoji lowooko, odaa jigigotibeci manitaga nigotaga Antioquia. <sup>28</sup>Liwigotigi nigijo anoyelogoditedibece Aneotedogoji lowooko onini ica goneleegiwa ane liboonagadi Ágabo. Nigijo loiigi Goniotagodi me yatecogo, nogone dabiditini Ágabo me idei liwigotigi, odaa

jegeetece nigijo Aneotedogoji Liwigo ane ikeeta. Odaa jegee icota meno ica nigigi nelegi minoataga inoatawece ane nipodaga nigina iigo. Odaa icota nigica nigigi maleeginiaagini Cláudio me nioninigi-eliodi romaanotedi. <sup>29</sup>Nigijoo nogowajipatalo nigijoo lotaga Ágabo, odaa nigijoo anodiotibece Goniotagodi ja dinilakidetiwage moyaxawa eledi gonioxoadipi ane ligeladi nipodigi Judéia. Oninicebeci yajigo analogota nimawenegegi. <sup>30</sup>Igaanaga oyatecogotee icoa dinyeelo, odaa jogoiige Barnabé jaa Saulo moyadeegitiogi nigijoo laxokodi goneleegiwadi lacilodi loiigi Goniotagodi digoida nigotaga Jerusalém.

### Nigica nogoiatetacibeci nigijoo anonakato Goniotagodi

**12** <sup>1</sup>Nigijoo nokododi nigijoo inioninigi-eliodi Herodes jigidaageyatigi me iatetibeci onatecigidi nigijoo loiigi Goniotagodi. <sup>2</sup>Odaa ja diigenatakata moyeloadi Tiago nigijoo nioxoa João, oyatita nodaajocagataga moyeloadi. <sup>3</sup>Odaa nigidiaagidi Herodes ja nadi judeutedi moyemaatibigo nigijoo me diigenatakata Tiago moyeloadi. Igaanaga nadi moyemaatibigo, odaa ja diigenatakata Pedro moniwilo. Pida nigijoo nokododi ja nakatio ica nalokegi anodita “Paon ane digica labookojegi” naga niwilo Pedro. <sup>4</sup>Igaanogodibata Pedro, odaa jogoixotiwece niwilogonagaxi, odaa Herodes jegeote cwaatolo lapoli iodagawadi anoyowie Pedro. Oninicebeci nigidiwa lapoli idiwa cwaatolo iodagawadi. Herodes one domaga lowoogo me iwi anigota Pedro lodoe judeutedi, daga ixomagatice nalokegi Páscoa. <sup>5</sup>Odaa jigidaagee Pedro nogoniwilo, pida nigijoo loiigi Goniotagodi eliodi modipokoteloco nigina moyotaganeege Aneotedogoji.

### Aneotedogoji nogatedice Pedro me diniwilo

<sup>6</sup>Nigijoo enoale maleedigicatibige Herodes daga yadeegiticogi Pedro lodoe loiigi judeutedi me iwi anigota, Pedro moniwilo odoyatice liwigotigi itoataale iodagawadi, codaa oigoetece itoataale galeenatedi. Pida Pedro diote nigijoo aneitece. Midiwataga lapoaco niwilogonagaxi idiwa eletidi iodagawadi nowienogododi. <sup>7</sup>Pida codaanogonida nogone dinikee ica niaanjo Goniotagodi idiaa dabitite liwai Pedro. Codaa ica natalaga jona nalotigi le niwilogonagaxi. Odaa nigijoo aanjo ja yojogo Pedro liwai me yojieteloco, meeta, “Adinageni madabititini!” Odaa nigijoo galeenatedi ja nakagi, dapocetedice me ideite Pedro libaagatedi. <sup>8</sup>Odaa nigijoo aanjo jegeeta, “Ipiciati ganigoenagadi, adinixomitinigi gawelatedi!” Odaagidaagee Pedro, odaa nigijoo aanjo jegeeta, “Adinixomitinigi ganicaapa, odaaganagi, aniwitici!” <sup>9</sup>Pedro naga diotece, odaa ja noditice niwilogonagaxi. Pida ayowoogodi mewi nigijoo aanjo naga ikatice, diletibige dogoka ligeedi. <sup>10</sup>Odaa jogonagaxateloco nigica odoejegi lapo iodagawadi, nogonagaxateloco nigica eledi lapo iodagawadi, odaa jogotota nigica epoagi-nelegi gapilecege, ane diigeteege ladigodi nigotaga. Nigica epoagi-nelegi epaa domoke, agica ane yomoke, odaa ja noditicoaci we. Odaa jogoyakagiditeloco ica ladigodi, pida codaagida nigijoo aanjo nogopi, odaa jigidiaa yaladite Pedro.



(Atos 12.6)

<sup>11</sup>Odaa Pedro nagaleeka yowoogodi mewi naga dinikatice, odaa mee mepaa dinotaganeege, “Nigina natigide ja jowoogodi mewi Goniotagodi me niwakatee niaanjo me idogatice mejoteloco loniciwaga Herodes, odaa aika meote anigotiwa nigijo ane domogoyemaa modigotiwa judeutedi.”

<sup>12</sup>Igaanaga yowoogodi Pedro mewi naga dinikatice, odaa jigigo ligeladi Maria, eliido João Marcos. Nigini diimigi idiaagite eliodi oko yatecogo moyotaganeege Aneotedogoji. <sup>13</sup>Pedro naga yatoke epoagi, odaa aca niota ane liboonagadi Rode jigigo iwi ica ane natoketice epoagi. <sup>14</sup>Nigijo naga yowoogoditege Pedro lotaganeegegi, odaa eliodi me ninitibece, odaa jigigo dakatacio walokodi, pida agica daga yomoketema epoagi. Odaa ja yatematitigi nigijo oko Pedro mida digoida we. <sup>15</sup>Pida modita nagajo awicije, “Nigida makaami jagakaami yetole!” Pida dotigimade idokee mee me Pedro nigijo anidiaa dabidite we. Odaa modita, “Ejime niaanjo ane dowediteloco.”

<sup>16</sup>Egidaa diitigi me dinotaganeege, idaa Pedro malee natoketice epoagi. Odaa nogoyomoke epoagi, jogonadi Pedro, odaa eliodi moyopo nigida niciagi. <sup>17</sup>Pida Pedro ja yatitigi libaagadi iige me notokotiniwace, odaa ja yelogoditigi anodaagee Goniotagodi me nogatedice me ide i niwilogonagaxi. Odaa jegeetiogi, “Atematiitatiwaji Tiago ijaagijo eledi gonioxoadipi nigida aneji.” Igaanaga noditice, odaa jegeledi ane diiticogi.

<sup>18</sup>Igaanaga yelogotibige, ja dibatotitigi nigijoa iodagawadi, eliodi me dinotigimade, leegodi agoyowoogodi nigica anodaagee Pedro. <sup>19</sup>Nigidiaagidi Herodes ja domaga diigenataka modoletibige, pida agica moyakadi. Odaa ja nigetiniwace nigijoa iodagawadi, odaa nigidiaagidi ja

diigenatakatiogi monigodi. Nigidiaagidi Herodes naga noditicogi nipodigi Judéia, oada jigigo nigotaga Cesaréia. Oada jigidiaagi.

### Lemegegi Herodes

<sup>20</sup>Herodes, nigijo ninionigi-eliodi judeutedi eliodi me yelatema nigeladimigipitigi nigotaga Tiro codaa me Sidom. Oada ica lapo nigidi noiigi jigigotibeci oyotaganene Herodes. Pida odoejegi oyakadi Blasto me nicaajo. Nigica Blasto joniginiaa nowienogodi ica diimigi-nelegi Herodes ligeladi. Oada jigigotibeci minitaga Herodes, igotibeci modoletibige modinilakidetege domogoyemaa me nokaagedi, leegodi nigidi noiigi idioka limedi modinooneteta anoyeligo digoida niigotedi Herodes.

<sup>21</sup>Igaanigicota nigijo noko lakatagi nigijo noiigi, oada Herodes ja dinixotinigilo lowoodi me ikee me gonegegi, oada ja nicoteloco aca nibaanco gonege. Oada jegego ligegitiogi nigijo noiigi. <sup>22</sup>Oada nigijo noiigi ja napaawagateloco, modi, “Nigini ane dotaga gonoenogodi, idigida agoneleegiwa!” <sup>23</sup>Agica daga leegi niaanjo Goniotagodi jegeote anigota Herodes, oada icoa nigojokodi jogoyeliotigi le, oada Herodes ja yeleo, leegodi me daga iwenigideteda Aneotedogoji. Pida yemaatibige nigijo noiigi miniaagini odogeteta.

<sup>24</sup>Pida lotaga Aneotedogoji idapaga diitedicogi milaagitedibeci, codaa nigijoa lapoli loiigi Goniotagodi jagaga ili. <sup>25</sup>Barnabé ijaa Saulo nogoigodi libakedi moyadeegi dinyeelo digoida nigotaga Jerusalém, oada ja noditicoaci Jerusalém, oada jogoyadeegi João Marcos me lixigagawepodi.

### Oixipetice Barnabé ijaa Saulo oada jogoimonyatibigiwaji mowote libaketedi Goniotagodi

**13** <sup>1</sup>Onidiwa icoa goneleegiwadi anoyelogoditedibece Aneotedogoji lowooko, icoa eletidi bogone niigaxinaganadi anodiigaxinagatece anodaagee gotiwagatakanegegi. Nigidiwa goneleegiwadi idi liwigotigi loiigi Goniotagodi digoida nigotaga Antioquia. Ini ica ane liboonagadi Barnabé, ica eledi Simão anoyatigi me “Nabidegegi”, ica Lúcio anelatibige nigotaga Cirene, ica Manaém ane niliidagatagiwa nigijo inionigi-eliodi Herodes, ijaa Saulo. <sup>2</sup>Ica noko jonogoikanawaanigi me niodaga, agica anoyeligo gaantokaagini owotibige mepaanaga yoniciwaditibigiwaji moyotaganene Goniotagodi. Nogodogetetalo Goniotagodi, oada Liwigo Aneotedogoji jegeetiogi, “Tomagatitomi Barnabé ijaa Saulo mowote ibakedi ane leegodi me jiniditioigi.” <sup>3</sup>Oada jogoikatace me niodaga me digicata gaantokaagicata anoyeligo, oada jogoyotaganeegetace Aneotedogoji, oipeketeloco libaagatedi Barnabé ijaa Saulo, oada jogoibodetibigiwaji.

### Barnabé ijaa Saulo owote libakedi Goniotagodi digoida Chipre, lidelogo-nelegi

<sup>4</sup>Oada Liwigo Aneotedogoji ja imonya Barnabé ijaa Saulo, aneledi liboonagadi me Paulo. Oada jigigotibeci nigotaga Selêucia, oada jigidiaagite

nogowaxoditinigi aca etogo-nelegi, odaa jigigotibeci minitaga lidelogo-nelegi anodita Chipre. <sup>5</sup>Igaanogotota nigotaga Salamina ane ideí minitaga lidelogo, odaa jogoyatematitedibece lotaga Aneotedogoji midiwataga liikanagaxiidi judeutedi. Odaa João Marcos ini miditaga me yaxawatiogi.

<sup>6</sup>Igaanaga nogototociogi eledi liwai nigijo lidelogo-nelegi, odaa jogotota aca nigotaga Pafos. Odaa digoida nigotaga Pafos jigidiaagotota ica judeu ane liboonagadi Barjesus, nigini goneleegiwa one oxikonegegi. Odaa oneetibece ica minaagina ane yelogoditedibece Aneotedogoji lowooko, pida diwitaka. Codaa eledi liboonagadi me Elimas me diboanagatedetigi ioladi greego. <sup>7</sup>Nigini goneleegiwa lokaagedi nigijo lacilo-nelegi romaanotedi ane iige nigini lidelogo-nelegi. Nigini lacilo romaanotedi liboonagadi Sérgio Paulo, goneleegiwa anowidi lixaketedi. Nigini lacilo romaanotedi ja dienagata Barnabé ijaa Paulo, leegodi yemaa me wajipatalo lotaga Aneotedogoji. <sup>8</sup>Pida Elimas nigijo oxikonegegi eliodi me lakapetegi Barnabé ijaa Paulo, odaa adomaga yemaa nigijo lacilo romaanotedi daga dibatege niigaxinaganegeco anoditece anodaagee gotiwagatakanegegi. <sup>9</sup>Odaa Liwigo Aneotedogoji ja iige Paulo, naga iwita Elimas, odaa jegeeta, <sup>10</sup>“Nigida makaami akaami lionigi diaabo, codaa akaami lakapetegi inoatawece niginoa ane igenaga. Nigida makaami inokoleetibige maninaalenitiniwace oko abakeni gadoxikonegeco. Awitakatibece, codaa idioka limedi moleetibige me iigi niginoa niigaxinaganegeco anewi anoditece Goniotagodi. <sup>11</sup>Natigide Goniotagodi ibake loniciwaga meote anigotedagawa. Eote makaami golaga, odaa owidi nokododi me dagakati manati aligege!” Agica daga leegi odaa Elimas ja deemiteta ica nexocaga ane yapogoditedini ligecoogeli, odaa agalee yatetibece. Odaa jigidiaanagadii dawakadetibece domaga doletibige oko ane dibatigi libaagadi me nibatege. <sup>12</sup>Odaa nigijo lacilo romaanotedi naga nadi ane ninyaagi Elimas, eliodi me yopo leegodi loniciwaga nigijo niigaxinaganegegi aneetece Goniotagodi, odaa jegeyiwagadi lotaga Aneotedogoji.

### **Paulo idiaa libakadi nigotaga Antioquia aneite nipodigi Pisidia**

<sup>13</sup>Odaa Paulo ijaagijoa lokaagetedi jogowaxoditinigi aca etogo-nelegi, odaa jogoyaladi nigotaga Pafos. Odaa jigigotibeci nigotaga Perge aneite nipodigi Panfília. Pida jigidiaagi João Marcos naga dawalacetege, odaa jogopiticogi nigotaga Jerusalém. <sup>14</sup>Odaa Paulo ijaagijoa lokaagetedi nogoyaladi nigotaga Perge, odaa jogotota nigotaga Antioquia digoida nipodigi Pisidia. Odaa naga saabado jigigotibeci odakatiwece aca liikanagaxi judeutedi, odaa jigidiaagi nicotiniwace. <sup>15</sup>Odaa jigijo ica goneleegiwa ane yalomegeteloco lotaganagaxi Aneotedogoji, one yalomegeteloco ica liwai notaganagaxiidi ane idí Moisés nigijo naga iditedini najoinaganegeco, ijaagijoa liwailidi lotaganagaxiidi nigijo anoyelogoditedibece Aneotedogoji lowooko nigijo jotigide. Igaanaga nigotini me yalomegeteloco, odaa nigijoa lacilodi niikanagaxi jogonidita Paulo ijaagijoa lokaagetedi onodetiogi mowote ligegi, moditiogi, “Akaami gonioxoadipi, nigemaani motagani mawii godoiigi loniciwaga, yakadi

motaganitiwaji.”<sup>16</sup> Odaa Paulo naga dabiditini, ja yatitiogi libaagadi eotibige me watacotibigiwaji, odaa jigidaa diiticogi me dotaga, mee,

“Akaami yoiigi goneleegiwaditigi Israel, inaagina anakaami eledi noiigi anoheetetalo Aneotedogoji, jemaata matalitece yotaga!<sup>17</sup> Aneotedogoji ane Noenogodi godoiigi Israel iomagaditedice godaamipi me loiigi nigijojotigide. Iomagaditedicoace nigijoj malee ligeladi digoida niigo Egito, iomigigipi midiaagi nigidi nipodigi. Odaa jegeote me noiigi-nelegi codaa me ibake loniciwaga nigijoj naga nogatedicoace me ideiticoace nipodaga Egito.<sup>18</sup> Aneotedogoji eliodi me dinatitediogi nigijoj midiaagi midi nipodigi ane yadilo ane digicata nigeladimigipi. Idiaagi nigicoatigilo cwareenta nicaagape me doweditedeloco.<sup>19</sup> Odaa Aneotedogoji yaagadi seete noiika digoida niigotedi Canaã, nawalacetedigi nigidi iigo, odaa ja yajigoteta loiigi me nebi nigicoa iigotedi. Odaa jigidaagee moixomagateetedijo 450 nicaagape.<sup>20</sup> Nigidiaagidi Aneotedogoji jegeote ninionaga anoigeke nigica laxakawepodi negepaa nigicoa nokododi nagaajijo Samuel, nigijoj ane yelogoditedibece Aneotedogoji lowooko.<sup>21</sup> Nigijoj Samuel malee yewiga, loiigi Israel jogodipokota meo ane dibata oko meo me inionigi-eliodi. Odaa Aneotedogoji ja yajigotediogi Saul me ninionigi-eliodi, nigijoj lionigi Quis, anida aneetege licogegi loiigiwepodi Benjamim. Odaa cwareenta nicaagape Saul mijo me inionigi-eliodi.<sup>22</sup> Nigidiaagidi Aneotedogoji ja nogatedice Saul, odaa ja ixotedio Davi. Aneotedogoji akaajijoj me eetece Davi nigijoj mee, ‘Idioka limedi me jakadi Davi, lionigi Jessé, me nigina oko aneo me idinitibeci, codaa jiginiaageote inoatawece ane jemaata.’<sup>23</sup> Jesus eledi ida aneetegege licogegi Davi. Odaa Aneotedogoji jegeote Jesus me Newikatitogodi godoiigi Israel, codaa akaa ligegi meote.<sup>24</sup> Maleedigicatibige Jesus meote nigijoj libakedi Aneotedogoji ane iigete, João Batista ja yatematitiogi godoiigi Israel me leeditibige me odinilaatece libeyacegeco, codaa me leeditibige me dinilegetibigiwaji moiikee nogoika libeyacegeco.<sup>25</sup> Nigijoj João naga niipegi me igodi nigijoj libakedi ane yajigote Aneotedogoji, odaa jegeetiogi nigijoj noiigi, ‘Ame eni me eetiwaji? Anegemegee Nigijoj Aneotedogoji anicota me niige aneote me godewigatace, analiitibigegetetiwaji. Pida digawini! Etinoa jegenagi nige jigodi ibake. Dagaxa me gonegegi, codaa ajakadi daga jipegitege otegegaagaga daga jowileceteda liwelatedi.’”

<sup>26</sup>Odaa Paulo egidaagee me dotaga, odaa jegee, “Inioxoadipi, anida anenitege licogegi Abraão, codaa akaamitiwaji anakaami eletidi noiika, anoheetetalo Aneotedogoji. Aneotedogoji niwakateetedibigogoji okotawece nigida natematigo, niginoalotaga aneetece Aneotedogoji anodaagee meote me gadewikitace.

<sup>27</sup>Nigijoj nigeladimigipitigi nigotaga Jerusalém, ijaajijoj lacilodi agoyowoogodi Jesus nijaajijoj ane nimonya Aneotedogoji meote me godewigatace. Codaa agoyowoogodi ane diitigilo nigijoj lotaga nigijoj anoyelogoditedibece Aneotedogoji lowooko nigijoj jotigide, nigijoj moditece Jesus, idaagida melioditibece moyalomegetelogo nigidiwa notaga inoatawece saabadotedi catiwedi niikanagaxiidi. Pida agoyowoogodi nogowote micotece nigijoj ane lotaga nigijoj

anoyelogoditedibece Aneotedogoji lowooko, nigijjo modi me leeditibige moyeloadi Jesus. <sup>28</sup>Odaa idaagida me digicata anoyakaditece Jesus loenatagi ane beyagi, pida idokee modipokota Pilatos nigijjo lacilo romaanotedi me diigenatakatalo moyeloadi Jesus. <sup>29</sup>Odaa jogowo micotece ijoatawece nigijjo aneeta Aneotedogoji lotaganagaxi, nigijjo meetece ane lawikodico Jesus. Nigidiaagidi jogonikatini lolaadi me dinototeloco nicenaganagate, odaa jogoixotiwewece lolaadi nigijjo wetiga-lawimagajegi. <sup>30</sup>Pida nigidiaagidi Aneotedogoji ja yewikatiditace. <sup>31</sup>Odaa nigijjoatigilo owidi nokododi Jesus me dinikeetediogi nigijjo oko ane lixigagawepodi me icogotedicogi nipodigi Galiléia odaa jigigotibeci nigotaga Jerusalém maleedigicatibige dogoyeloadi. Odaa natigide nigijjo oko jigidiaa nakataganadi moikeetiogi godoiigi naga yewigatace Goniotagodi.

<sup>32-33</sup>Odaa oko jagaga jatematiigatagawatiwaji niginoa nibodicetedi ane anoditece Jesus. Natigide Aneotedogoji jegeote micotece nigijjo ane ligegitediogi godaamipi nigijjo jotigide, negeote Jesus me yewigatace. Jigidiaa ane iditeloco Aneotedogoji lotaganagaxi, nigijjo liwai midiwataga Enaco. Nigijjo nigitiwataale liwai nagajo lotaganagaxi Enaco iwoteloco ane ligegi Aneotedogoji, nigijjo mee, 'Tonigi.

Nigina noko jao me Ee Gadiodi.'

<sup>34</sup>Aneotedogoji eote Jesus me yewigatace, codaa lolaadi agica daga neladi. Joanigidaa aneeteta Aneotedogoji nigijjo jotigide, mee, 'Jaotagadomi ane dagaxa mele ane emokee me jakadi me jao.

Joanigidaa ane igegita Davi anijo mejita me jao.'

<sup>35</sup>Miditagaeledi Enaagi, Davi meetalo Aneotedogoji, 'Nigida makaami agikani daga neladi lolaadi gaotagi nigijjo anakamokakaami me dibatagadomi.'"

<sup>36</sup>Odaa Paulo egidaagee me datematika, odaa jegee, "Nigidiaagidi Davi naga igodi ijoatawece libaketedi, Aneotedogoji ane yajigoteta meote me yaxawa godaamipi nigijjoa nokododi, odaa ja yeleo. Odaa jogonaligitini miditaga anonaligite laamipi, odaa lolaadi ja neladi. <sup>37</sup>Pida Nigijjoa ane yewikatiditace Aneotedogoji baadaga neladi lolaadi.

<sup>38-39</sup>Inioxoadipi, jemaa makaamitawecetiwaji owoogoti, codaa ajemaa dagawienatakani, me jatematiigatagawa Aneotedogoji me yakadi me ixomagateedice gabeyacegeco leegodi nigijjo Jesus aneote. Odaa Aneotedogoji yakadi me igenaga nigina oko ane nakato. Igaataga nigijjoa lajoinaganegeco Moisés baadigica loniciwaga mowo me igenaga nigina oko. <sup>40</sup>Adinowetitiwaji adigicaa ganinyaagi, digicotece nigijjo ane ligegi nigijjo anoyelogoditedibece Aneotedogoji lowooko nigijjo jotigide, nigijjo moditece lotaga Aneotedogoji, negee,

<sup>41</sup> 'Digawini,

akaamitiwaji ane amenaganitibece!

Icota manawelatiwaji,

codaa makaami ma!

Igaataga niginoatigilo ganokododi jao yoenatagi ane daga iwagatitiwaji,



icaagica digica oko aneo gadeemidi micota nigida ganinyaagi.”

<sup>42</sup>Nigijo Paulo ijaa Barnabé naga noditicoaci niakanagaxi, onatecigijo nigijo oko odipokotiogi migotacibeci nigeledi saabado moditacece ijaagijo nigijo baanaga oyelogodi. <sup>43</sup>Igaanaga ilaagitibece me yatecogo, odaa eliodi judeutedi inaagina ane daga judeutedi anodioteci ane lakataga judeutedi, nigidi noiigi jogodioteci Paulo ijaa Barnabé. Odaa nigijoa itoataale liigexedi Aneotedogoji jogonotaganeegetiniwace nigijo noiigi, owo loniciwaga me dogoika moyiwagadi Aneotedogoji aneliodi meletetema.

<sup>44</sup>Igaanaga nakatio eledi saabado, odaa jona domaga iditawece nigeladimigipitigi nagani nigotaga yatecogo mowajipatalo Aneotedogoji lotaga.

<sup>45</sup>Pida nigijoa judeutedi noganadi nigijo lapo-nelegi me yatecogo, odaa eliodi monocetema Paulo, codaa me notaganagateloce modakapetege lotaga, codaa me beyagi modotagatibige. <sup>46</sup>Odaa Paulo ijaa Barnabé jogoyeloodagatee laalegena, odaa moditiogi nigijoa judeutedi, “Mina leeditibige makaami odoejedipi me jelogotagatagawa Aneotedogoji lotaga. Pida agemaanitiwaji me iwagati niginoa notaga, odaa jigidaagee mikeenitiwaji Aneotedogoji me dagadiaageote makatitiwaji midioka limedi me gadewiki miniwataga. Enice digawinitiwaji! Natigide jatematigatiogi nigina ane daga judeutedi niginoa nibodicetedi anele. <sup>47</sup>Igaataga Goniotagodi godimonya, codaa meetedogowa, ‘Ee gadixomitio makaami macataga lokokena miditaga noiigi ane daga judeutedi jao me jakadi me gadibakeni amaleegaga ikeenitiogi inatawece ane noiigitigi nigina iigo anodaagejigotiogi oko me jao me newigatace.”

<sup>48</sup>Odaa nigijo ane daga judeutedi nogowajipatalo niginoa notaga, odaa eliodi me ninitibigiwaji, codaa moiwenigide lotaga Goniotagodi. Odaa jogonakato Goniotagodi ijotawece nigijo Aneotedogoji ane ixipetedicoace meote me newigatace.

<sup>49</sup>Odaa lotaga Goniotagodi jigilaagiteloco iditawece nigidi nipodigi. <sup>50</sup>Pida idiwa icoa judeutedi jogodeletio ijo iwaalepodi liicotedi anodogetetalo Aneotedogoji, ijaagijoa lacilodi nigidi noiigi, jogodoletibige mowo lacilo. Odaa jогоiatetibeci Paulo ijaa Barnabé, odaa jогоiticoiticoaci me noditicoaci nigidi nipodigi. <sup>51</sup>Odaa Paulo ijaa Barnabé jогоitico i liwelatedi monoga amogo oiike me dagadiaagica aneetege nigijoa judeutedi. Odaa jigigotibeci nigotaga Icônio. <sup>52</sup>Odaa nigijo anodiotibece Goniotagodi digoida nigotaga Antioquia eliodi me ninitibigiwaji, codaa Liwigo Aneotedogoji ja yoniciwagaditibigiwaji.

**Paulo ijaa Barnabé oyelogoditedibece nibodicetedi  
anele digoida nigotaga Icônio**

**14** <sup>1</sup>Digoida nigotaga Icônio Paulo ijaa Barnabé igotibeci manitaga aca liikanagaxi judeutedi ane ligilegegitibece. Eliodi loniciwaga nigina me natematikanaga, odaa eliodi judeutedi codaa ina ane daga judeutedi anonakato Goniotagodi. <sup>2-3</sup>Odaa nigijoa liigexedi Goniotagodi owidi nokododi

midiaagiticoace, odaa Goniotagodi ja yajigotediogi mabo laalegena nigina me natematikanaga. Codaa Goniotagodi yajigotediogi loniciwaga mowote loenataka godoxicegetedi codaa me libinienaga anoikee Paulo ijaa Barnabé moditece anewi nigina moyelogoditibece Goniotagodi meliodi meletetema inatawece oko. Pida nigijo judeutedi ane dogoyemaa meniwigatakanaga joanigidiaagowo lacilo nigijo ane daga judeutedi owotibige modakapetege Paulo ijaa Barnabé, codaa owotibige mowo ane beyagitema. <sup>4</sup>Pida nigijo nigeladimigipitigi nagani nigotaga ja dawalace. Ica lapo one licaajepodi judeutedi, ica eledi lapo бага licaajepodi nigijoa liigexedi Goniotagodi.

<sup>5</sup>Odaa nigijoa judeutedi ijaagijo ane daga judeutedi jogodinilakidetege nigijoa lacilodi me lowoogo mowote ane beyagi modakapetege nigijoa liigexedi Goniotagodi, codaa monigidatiniwace oyatitioyi wetiadi. <sup>6</sup>Pida Paulo ijaa Barnabé nogodibodice nigida lowoogo, odaa ja daleditigi ialeticogi midiwataga nigotadi Listra aniaa Derbe aneiteloce nipodigi Licaônia codaa minoataga inoa nipodaga anodipegege nigidiwa nigotadi. <sup>7</sup>Odaa jigidiaagiticoace nogoyelogoditacedibece nibodicetedi anele anoditece Jesus.

#### **Paulo ijaa Barnabé natematikanaga midiwataga nigotadi Listra aniaa Derbe**

<sup>8</sup>Digoida nigotaga Listra onini ica goneleegiwa alejaado ane degewaligi, idioka limedi me nicotini. Nigini goneleegiwa nigica maleekoka enitini naga alejaado, agica degewaligi. <sup>9-10</sup>Nigini goneleegiwa wajipata Paulo naga datematika. Odaa Paulo ja nadi nigijo goneleegiwa meyiwigadi nigijoa lotaga, odaa joanigidaa leegodi me yakadi me icilatidi. Odaa Paulo ja iwita, odaa jegeeta, “Adabititini!” Odaa nigijo goneleegiwa ja dabiditini, odaa jigidaa diiticogi mewaligi. <sup>11</sup>Odaa nigijo noiigi-nelegi nogonadi nigijo loenatagi Paulo, odaa ja napaawagateloco, odaa jogodotagatigi epaa nioladi, ioladi anodotagatigi nigidi okotigi nigidi nipodigi, modi me notaganaga, “Niginoa gonoenogododi odinanatigi me goneleegiwadi, odaa ja dinikatiniwace mokotaga!” <sup>12</sup>Odaa Barnabé jogowo me liboonagadi me Júpiter, ijaa Paulo bogonowo me liboonagadi me Mercúrio. (Ica Júpiter icaagica Mercúrio one noenogododi greegotedi.) Oyatigi Paulo me Mercúrio leegodi Paulo jigijaa datematikatiogi. <sup>13</sup>Ica ligeladi ica niwigo Júpiter one ideitice we nigotaga, ipegitege ica lapoagi-nelegi nagani nigotaga. Odaa ica sacerdoti ane dibatigi nigini diimigi ja nadeegi godinadi icaagicoa niale-lawogo anonanyoketinece nigidiwa godinadi. Odaa nigijo goneleegiwa ijaagijo noiigi ja domaga onigodi nigijoa godinadi me domogoiwenigide Paulo ijaa Barnabé.

<sup>14</sup>Odaa Barnabé ijaa Paulo nigijoa liigexedi Goniotagodi nogowajipata nigica ane domogowote nigidi noiigi, odaa jogoyaagadi inoa lowoodi moikee me agecagalodipi, odaa ja waleditiobece miditaga ica noiigi-nelegi, odaa jona napaawaga, modi, <sup>15</sup>“Akaami iniotagodepodi, igaamee ina me gadeeditiwaji me godiwenigidenegegi? Nigida moko oko goneleegiwadi digo makaamitagatiwaji, codaa ja jatematiigatagawatiwaji me leeditibige mikani manakatoni niginoa eletidi ane eni me ganoenogododi, odaaganakatoniteda Aneotedogoji ane

yewiḡa, Niḡiḡoa aneote ditibigimedi, iigo, codaa me akiidi-eliodi, codaa me inoatawece aninoa. <sup>16</sup>Niḡiḡo jotigide Aneotedogoḡi ikatetece inatawece ane noiḡi modioteci anepaa lakataga. <sup>17</sup>Pida idioka limedi me ikee mewi miniwa, niḡina meote aneletema inatawece oko, niḡina me niwakateetedibigogoḡi ebici, odaa jeḡeote me inopilagatagatedio ḡodawodigijedi niḡina micota limedi. Yajigotedagawatiwaji anelici, codaa meote me aniniitibecitiwaji.”

<sup>18</sup>Idaagee moditece niḡinoa notaga, Paulo ijaa Barnabé oyakadi me dakake mowote niḡidi noiḡi me dogonigodi ḡodinadi moiwenigidetibigiwaji micataga daga noenogododi.

<sup>19</sup>Pida ḡiḡiḡo onateciḡiḡoa judeutedi anicotiobece oicogoticogi nigotadi Antioquia aniaa Icônio. Odaa joḡoyakapagateetaceḡe niḡiḡo noiḡi Paulo ijaa Barnabé. Odaa joḡonigidatice Paulo, oyatita wetiadi, niḡidiaagidi joḡoixigitice neḡepaa we nigotaga, leegodi odiletibige daantaga yeleo. <sup>20</sup>Pida oyawiile Paulo niḡiḡo anoyiwagadi Goniotagodi, odaa ja dabiditini, codaa ja dakataciwece nigotaga. Igaaneḡeledi noko Paulo ijaa Barnabé ja noditicoaci naḡani nigotaga, odaa ḡiḡotibeci nigotaga Derbe.

#### **Paulo ijaa Barnabé igotacibece nigotaga Antioquia ane idei nipodigi Síria**

<sup>21</sup>Paulo ijaa Barnabé oyelogditedibece nibodicetedi anele anoditece Jesus digoida nigotaga Derbe. Odaa joḡoyakadi mowo eliodi oko monakato Jesus. Niḡidiaagidi niḡiḡo itoataale ḡiḡigotacibece midiwataga nigotadi Listra, Icônio, codaa me Antioquia digoida nipodigi Pisídia. <sup>22</sup>Odaa inoatawece nigotadi anototalo oyaxawa niḡiḡo anonakato Goniotagodi me ili eliwagatakanaga codaa mowo loniciwaga midioka limedi monakato Goniotagodi, moditiogi, “Niḡida moko leeditibige me jixomagateenagatediḡo owidi nawikodico digoina jaogatiḡe me niḡidiaagidi jakagatiwece ninioxadi Aneotedogoḡi digoida ditibigimedi.” <sup>23</sup>Odaa joḡoixipeticoace icoa ḡoneleegiwadi laxokodi me lacilodi odowediteloco inoatawece lapo anoyiwagadi Goniotagodi. Codaa Paulo ijaa Barnabé odinatita niḡiḡi mowotiḡe mepaanaga oyakadi meliodi moyotaganee Goniotagodi, odaa niḡidiaagidi nogoyotaganee Goniotagodi, odipokotalo me doweditedeloco niḡiḡo anidioka limedi monakato.

<sup>24</sup>Odaa ḡiḡidiaagigotece nipodigi Pisídia, niḡidiaagidi joḡotota nipodigi Panfília. <sup>25</sup>Oyatematitedibece nibodicetedi anele digoida nigotaga Perge, niḡidiaagidi ḡiḡigotibeci nigotaga Atália. <sup>26</sup>ḡiḡidiaagi nogodibata aca etogo-nelegi, odaa joḡopiticogi nigotaga Antioquia, aneiticoace niḡiḡo anonakato Goniotagodi anoimonya Paulo ijaa Barnabé, codaa odipokotalo Aneotedogoḡi me doweditedeloco Paulo ijaa Barnabé, codaa me yaxawatetece mowote libaketedi Goniotagodi analeegoigodi.

<sup>27</sup>Niḡiḡo nogototicogi nigotaga Antioquia, Paulo ijaa Barnabé joḡoyatecogotee niḡiḡo lapo loiḡi Goniotagodi, odaa joḡoyatematita niḡiḡo lapo ijoatawece ane libaketedi Aneotedogoḡi ane iḡete mowote, codaa oyatematitiogi anodaagee Aneotedogoḡi me dibateteḡe niḡiḡo ane daga

judeutedi anonakato Goniotagodi, micataga daga yomoketetege epoagi odaa ja dakatiobece. <sup>28</sup>Odaa Paulo ijaa Barnabé owidi nokododi midiaagiticoace miditaga nigijjo anonakato Goniotagodi manitaga nigotaga Antioquia.

### Ica me yatecogo lacilodi loiigi Goniotagodi digoida nigotaga Jerusalém

**15** <sup>1</sup>Odaa onatecigijjo goneleegiwadi ja noditicoaci nipodigi Judéia, odaa jigigotibeci nigotaga Antioquia. Odaa jigidiaagite naga dinogogotiniwace moniigaxitini loiigi Goniotagodi, odaa moditiogi, “Aneotedogoji ageote me gadewikitacetiwaji nige daga iwitece ane lakatigi judeutedi me dinakagiditibigiwaji ane liigenatakanegegi lajoinaganegeco Moisés.” <sup>2</sup>Odaa Paulo ijaa Barnabé agoniwoditema nigijjo lotaga, odaa eliodi me odinotigimadetege. Codaa nigijjo loiigi Goniotagodi ja dinotaganeege, ja dinilakidetiwage me oimonya Paulo ijaa Barnabé ijaagijjo eletidi ane ligeladi nigotaga Antioquia migotibeci nigotaga Jerusalém moyotaganeege nigijjo liigexedi Goniotagodi ijaagijjo laxokodi goneleegiwadi lacilodi loiigi Goniotagodi digoida Jerusalém odoletibige moyowoogodi domige leeditibige me dinakagiditibigiwaji ane lakatigi judeutedi.

<sup>3</sup>Odaa nigijjo lapo loiigi Goniotagodi digoida nigotaga Antioquia jogoibode Paulo ijaa Barnabé ijaagijjo eledi lixigagawepodi, odaa jogodigotece nipodaga Fenícia aniaa Samaria. Odaa jigidiaagi moyatemati Aneotedogoji me dibatetege nigidi ane daga judeutedi meote me loiigi. Igaanaga owajipata nigida nibodigi, iditawece nigijjo gonioxoadipi eliodi me ninitibigiwaji. <sup>4</sup>Nigijjo Paulo ijaa Barnabé ijaagijjo lokaagetedi nogotota nigotaga Jerusalém, odaa nigijjo loiigi Goniotagodi anidiaagi, ijoo liigexedi Goniotagodi, ijaagijjo laxokodi goneleegiwadi lacilodi loiigi Goniotagodi jogodibatege Paulo ijaa Barnabé ijaagijjo lixigagawepodi. Nigidiaagidi jogoyatematiogi ijoatawece nigijjo aneote Aneotedogoji nigijjo naga ibake mowo libakedi Goniotagodi. <sup>5</sup>Pida naga dabiditiniwace onatecigijjo nigijjo anida aneetege fariseutedi baanogonakato Goniotagodi, odaa modi, “Leeditibige nigina ane daga judeutedi me dinakagiditibigiwaji ane lakatigi godoiigi, codaa leeditibige me jiigenaga moyotete lajoinaganegeco Moisés.”

<sup>6</sup>Odaa ja yatecogo nigijjo liigexedi Goniotagodi ijaagijjo laxokodi goneleegiwadi lacilodi loiigi. Yatecogo mowo lowoogo domige leeditibige inoa ane daga judeutedi me dinakagiditibigiwaji. <sup>7</sup>Nigidiaagidi naga dinotaganeege codaa jegeliodi me dinotigimadetiwwage, odaa ja dabiditini Pedro, meetiogi, “Akaami inioxoadipi, owoogotitiwaji Aneotedogoji me idiomagaditedice mejote gadiwigotigi, me jatematitedibece nibodicetedi anele minataga nigina ane daga judeutedi jaotibige moyakadi monakato Goniotagodi. Ja jotigide me idiomagaditedice Aneotedogoji. <sup>8</sup>Aneotedogoji yowoogoditidewece inoatawece godaalegenali. Odaa ja ikee me dibatetege nigijjo ane daga judeutedi nigijjo nagaga yajigotediogi Liwigo digo anejinaga me najigotedogowa Liwigo. <sup>9</sup>Aneotedogoji idaagigotediogi digo anigotedogowa. Yapitagadi laalegenali nigijjo nogonakato. <sup>10</sup>Pida natigide nigida anenitiwaji jaganiweenigeni Aneotedogoji nigina moleetibige me iigenitiwaji nigina ane

daga judeutedi mowo ane dagaxa me dakaketema, nigijoa niigaxinaganegeco okomogokota ajakataga me jaogate, otegexaagaga nigijo jotigide godaamipi agoyakadi mowote. Ja micataga dagawii nigina lotoinagatiyegi ane iwaagadi nigidi ane daga judeutedi. <sup>11</sup>Pida nigida moko ejiwagataga Aneotedogoji micota meote me godewigatace codaa meledi eote nigijo ane daga judeutedi me newigatace leegodi Goniotagodi Jesus Cristo meliodi meletedogodomi.”

<sup>12</sup>Odaa ijotawece nigijo ane yatecogo daxixetiogi codaa watacotibigiwaji nigijo Barnabé ijaa Paulo nogoyatematiyogi Aneotedogoji me ibake mowote loenataka godoxicegetedi codaa me libinienaga liwigotigi noiigi ane daga judeutedi.

<sup>13</sup>Igaanaga nigotiniwace me notaganaga, odaa Tiago ja ninigodi, meetiogi, “Inioxoadipi, diganajipaatiwa! <sup>14</sup>Simão ja natematitogowa anodaagee Aneotedogoji maleekoka ikeeteda me iwikode nigijo ane daga judeutedi nigina naga iolatedice meote me loiigi. <sup>15</sup>Odaa joanigidaageledi anodita nigijo anoyelogoditedibece Aneotedogoji lowooko nigijo jotigide, nigijo nogoiditeloco lotaganagaxi Aneotedogoji ane ligegi, nigijo negee,

<sup>16</sup> ‘Nigidiaagidi idopitijo,

oda inawacetacibige ligeladi Aneotedogoji baanegenitini.

Inioda inoa liwailidi nigini diimigi,

oda ja idabitegetacini.

<sup>17</sup>Odaa ina eledi noiigi jogodoletibige Goniotagodi Aneotedogoji, odaa inatawece ane daga judeutedi ane jiniditiogi me inepilidi, iditawece odoletibigiji.’

<sup>18</sup>Jigidaa ligegi Goniotagodi Aneotedogoji me ikee nigijo jotigide nigica ane yemaa meote.”

<sup>19</sup>Tiago egidaagee me dotaga, odaa jeege, “Ee jakadi me igenaga me daga jalomegenaga nigina ane daga judeutedi baanogonakato Goniotagodi.

<sup>20</sup>Pida jaoga godidietibige me jajoinaga me dogoyeligo nigina niweenigi nigina eledi oko anoiboota niwigo, aneeteta Aneotedogoji me daga yakadi me jelicaga. Codaa ele me jajoinagatece me dogoyeligo eijeegagi anoigiwoola otegexaagaga lawodi eijeegagi, codaa me daga noomatewa niginoa ane daga lodawadi. <sup>21</sup>Igaataga eliodi oko oyowoogodi nigijoa lajoinaganegeco Moisés, leegodi inoatawece nigotadi oyalomegetelogo codaa moyelogodi ane diitigilo nigidiwa najoinaganegeco minoataga niiakanagaxiidi inoatawece saabado.”

### **Oiditibige notaganagaxi gonioxoadipi ane daga judeutedi**

<sup>22</sup>Odaa nigijoa liigexedi Aneotedogoji ijaagijoa lacilodi loiigi Goniotagodi codaa me ijotawece lapo oko anonakato Goniotagodi digoida nigotaga Jerusalém, iditawece odinotaganegetigi mowote oixipetedice goneleegiwadi miditaga, owotibige moimonya me lixigagawepodi Paulo ijaa Barnabé digoida nigotaga Antioquia. Odaa jogoiolatice Judas Barsabás ijaa Silas, ane lacilodi gonioxoadipi. <sup>23</sup>Odaa jogoidi notaganagaxi anee,

“Oko anoko liigexedi Goniotagodi inaagina laxokodi goneleegiwadi lacilodi loiigi Goniotagodi, anoko ganioxoadipitiwaji, godecoaditibigagaji akaamitawece gonioxoadipi ane dagakaami judeutedi ane gadigeladitiwaji nigotaga Antioquia codaa ane gadigeladi midiwa nipodaga Síria codaa me Cilícia. <sup>24</sup>Jibodicaga mica ganigepidigidi nigina aninaa me jawanagatege migotibeci makaamitagatiwaji, etigadalomegeni leegodi liigaxinaganegeco, codaa etigadibeyacagati. Pida nigica oko agica daga jiigenaga migotibeci etigadiigaxinitiawaji. <sup>25</sup>Pida nigina natigide okotawece ja idinatecogoteenaga, odaa idokida ane godowoogo. Codaa ja idinilakidenagatiwage me jaoga jixipenagatedice goneleegiwadi, odaa ja jimonyaagatagawatiwaji me lixigagawepodi gonioxoadipi godemaanigipi Barnabé iniaa Paulo. <sup>26</sup>Nigidi itoataale goneleegiwadi ja domaga nigo nigijo mowo libakedi Goniotagodi Jesus Cristo. <sup>27</sup>Odaa natigide jimonyaagatagawa Judas iniaa Silas, odaa jogoyelogoditagawatiwaji nigijo ane jidiigateloco godiwakatetibigagaji. <sup>28</sup>Aneotedogoji Liwigo yakadi mele codaa oko eledi jakataga mele me daga gadiigenegegi mawiitiwaji ane dagaxa me dakaketagadomi, pida jakataga mele mawii inokina nigina anenegegi leeditibige mawii. <sup>29</sup>Enice ja jiwakateenagatibigagajitiwaji godipoketeditagawa me degelici nigina niweenigi baanaga oiboota niwigo otegexaagaga eijeegagi lawodi, migetaga nigina eijeegagi anoigiwoola moyeloadi. Eledi gadajoinitecetiawaji me daga gadoomatewepodi ane daga gadodawadi. Nigida makaamitiwaji akati mawii ane igenaga nigina nige adinowetitema nigina ane beyagi. Jigidaa liwokodi godotaga.”

<sup>30</sup>Odaa jogoimonya nigijo anoixipeticoace, odaa jigigotibeci nigotaga Antioquia. Jigidiaagi nogoyatecogotee iditawece nigica anonakato Goniotagodi, odaa jogoyajigotiogi nagajo niwakate notaganagaxi. <sup>31</sup>Odaa nigica lapo gonioxoadipi nogoyalomegeteloco nagajo notaganagaxi, eliodi me ninitibigiwaji leegotedi nigijoa notaga, codaa meliodi meo loniciwaga. <sup>32</sup>Judas ijaa Silas inaagina anoyelogoditedibece lowooko Goniotagodi leegi midiaagi Antioquia onotaganegetiniwace gonioxoadipi, owo me yoniciwaditibigiwaji, codaa moyaxawa me ili eliwagakanenegegi. <sup>33</sup>Naga leegi midiaagi, odaa gonioxoadipi jogonibodetiniwace mopitacicogi miditaga nigijo lapo ane ieticogi digoida nigotaga Antioquia. Odaa jogodipokotalo Aneotedogoji meote mele me wiajeega. <sup>34</sup>Pida Silas jegeledi lowoogo, odaa agaleegigo nigotaga Jerusalém, ja nenyagati.

<sup>35</sup>Paulo ijaa Barnabé idiaagiticoaci Antioquia. Nigijo iniwataale awatege eliodi gonioxoadipi odiigaxinagatece lotaga Goniotagodi codaa moyatematitedibece nibodicetedi anele.

### Paulo ijaa Barnabé naga dawalacetiwage

<sup>36</sup>Nigidiaagidi naga ixomagatedijo owidi nokododi, odaa Paulo jegeeta Barnabé, “Inigatace idaliigataciogi gonioxoadipi idiwatawece nigotadi baaniginigatece me jelogotagatedibece lotaga Goniotagodi, codaa me jiwina anodaagee

gonioxoadipi, domigeletibigiwaji, domigalee datiteteloco eliwagatakanegegi.”  
<sup>37</sup>Barnabé domaga yemaa me yadeegi João Marcos me lixigagawepodi. <sup>38</sup>Pida Paulo agalee yemaa me yadeegi leegodi João Marcos mijo me dopitege lowidi, agalee dioteci nigijo nigigotibeci nipodigi Panflia, odaa agalee yaxawatece nigijo libakedi digoida Panflia. <sup>39</sup>Odaa eliodi me dinotigimade, odaa ja dawalacetiwage. Odaa Barnabé ja yadeegi João Marcos me lixigagawa, odaa jogodibata aca etogonelegi, odaa jigigotibeci minitaga lidelogo-nelegi Chipre. <sup>40</sup>Pida Paulo ixipetice Silas me lixigagawa. Odaa nigijo gonioxoadipi nogodipokotalo Aneotedogoji me doweditedeloco, odaa Paulo ijaa Silas ja noditicoaci. <sup>41</sup>Odaa ja diigetitacicoace idiwatawece nipodaga Síria codaa me Cilícia, odaa jogoyaxawa loiigi Goniotagodi modatiteteloco eliwagatakanegegi.

### Timóteo igo lixigagawa Paulo ijaa Silas

**16** <sup>1</sup>Paulo egidaa diiticogi me diniwiaje, odaa jigicota nigotaga Derbe aniaa Listra. Digoida nigotaga Listra onini ica nigeladimigi aneyiwagadi Goniotagodi, liboonagadi Timóteo. Aca eliodo onida aneetege noiigi judeutedi, pida nigica eliodi bigida aneetege noiigi greegotedi. <sup>2</sup>Ijtawece gonioxoadipi ane ligelatedi nigotadi Listra codaa me Icônio ele moyalagatibige Timóteo. <sup>3</sup>Paulo ja yemaa me yadeegi Timóteo me lixigagawa. Odaa ja yakagidi lolaadi Timóteo ane lakatigi judeutedi, eotibige nigijoa judeutedi ane ligeladi nigidi nipodigi modibatege Timóteo, igaataga iditawece nigidi oko oyowoogodi nigijo eliodi Timóteo me greego. <sup>4</sup>Nigina modigotece nigidiwa nigotadi nigidi nipodigi, oyajigotiogi nigidiwa lapoli loiigi Goniotagodi nigijoa liigenatakanegeco anoyajoitece moyotete nigijoa liigexedi Goniotagodi ijaagijoa laxokodi goneleegiwadi lacilodi loiigi digoida nigotaga Jerusalém. <sup>5</sup>Odaa nigijoa lapoli loiigi Goniotagodi ja ili eliwagatakanegegi codaa inoatawece nokododi jegepaanegeliiodi anonakato Goniotagodi, odaa jogodinawanagaditege nigijo anakaa oyiwigadi Goniotagodi.

### Aneotedogoji ikeeteta Paulo me yemaa me ibake digoida nipodigi Macedônia

<sup>6</sup>Paulo ijaagijoa lokaagetedi ja diigetitacicoace nipodigi Frígia aneite niigotedi Galácia. Pida Liwigo Aneotedogoji aika me natematikanaga digoida nipodigi Ásia. <sup>7</sup>Igaanaga odipegita nipodigi Mísia, odaa jogodoletibige me dakatiobece nipodigi Bitínia, pida Liwigo Jesus aika me dakatiobece. <sup>8</sup>Odaa ja diigetita nipodigi Mísia, odaa jogotota nigotaga Trôade. <sup>9</sup>Nigijoa enoale Paulo jigijo lakatigi micataga daga ligeedi, nadi ica goneleegiwa anelatibige nipodigi Macedônia. Nigica goneleegiwa one dabiditi, odaa ja dipokota Paulo, meeta, “Anagi Macedônia godaxawanegegi.” <sup>10</sup>(Odaa ee, Lucas ane jidi nagadi notaganagaxi idiaagejote miditaga nigijo noko.) Igaanaga nadi Paulo nigijoa goneleegiwa, agica ane jopagataga, odaa ja joleegatibige gonimawenegegi miniga Macedônia, leegodi ja jowoogotaga Aneotedogoji meniditedogowa miniga jatematigatedibece nibodicetedi anele anoditece Jesus.

**Aca iwaalo ane liboonagadi Lídia nakato Goniotagodi  
manitaga nigotaga ane liboonagadi Filipos**

<sup>11</sup>Odaa ja jibagata ajo etogo-nelegi, odaa ja gododitice nigotaga Trôade, odaa ja godegenagaticogi minitaga ijo lidelogo-nelegi ane liboonagadi Samotrácia. Negeledi noko ja jipecagata nigotaga Neápolis aneite liniogotibece akiidi-eliodi. <sup>12</sup>Igaanaga jalataga Neápolis, odaa jiginiga Filipos, nigotaga ane dagaxa me gonegetigi nipodigi Macedônia. Nagani nigotaga nebi romaanotedi. Joanigidiaagejonaga onateciçijjoa nokododi. <sup>13</sup>Igaanaga saabado ja gododiticogi nigotaga, odaa jiginiga liniogotibece akiidi aneitibige nigijjo oko me yatecogo moyotaganeege Aneotedogoji. Jigidiaa godicote inotaganegenagatiniwace ijo iwaalepodi anidiaa latecagadi. <sup>14</sup>Liwigotigi nigijjo iwaalepodi anonajipatogowa ajo nagajo ane liboonagadi Lídia. Nagajo iwaalo nanaanogodo lipegetege ane lolaadagawa nolidigo-lawogo, nagaca lipegetege ane dagaxa me dakake loojedi. Lídia dogetetibigalo Aneotedogoji, odaa Goniotagodi eliodi me yaxawa me yowoogodi ane diitigilo codaa me dibatege Paulo lotaga. <sup>15</sup>Lídia codaa me loiigiwepodi ja dinilegetibigiwaji. Odaa nigidiaagidi Lídia ja godode midiaagejonaga ligeladi, meetogowa, “Anagitiwaji, inaago-oonite içe-eeladi nigakatitiwaji mewi me jinakato Goniwa-aagodi.” Odaa jigidaa nimawenegegi me godiedege miniga ligeladi.

**Paulo ijaa Silas oniwilotiniwace**

<sup>16</sup>Ijo noko miniga liniogotibece akiidi me jotaganegenaga Aneotedogoji, odaa ja jakapagatege ajo awicije ane dakatiogi ica niwigo abeyacegegi aneote me nadi nigica anicota me jinataga. Nagani awicije niota, odaa nigijjo niotagodepodi odinigaanyetece owidi dinyeelo leegotedi niginoa lotaga nagajo awicije. <sup>17</sup>Odaa nagajo awicije ja nitece godowidi nilokotogoloco, odaa nagajo awicije ja dapaawetibece, mee, “Nigijjoa aaginadi liotaka Aneotedogoji ane i-iige inoatawece, codaa oye-eematitibece anodaagee Aneotedogoji meote me gadewikitacetiwaji.” <sup>18</sup>Odaa owidi nokododi meo nigida anee yopilagaditibigeloco nigijjo ligegi, odaa Paulo eliodi me igecagalege, naga nilokota, odaa jegeeta nigica niwigo abeyacegegi ane dakatiogi, “Jibake loniciwaga Liboonagadi Jesus Cristo me gadiigeni manotitice nagada awicije.” Odaa agica daga leegi nigica niwigo abeyacegegi ja noditice.

<sup>19</sup>Odaa nigijjo niotagodepodi nagajo awicije nogoyowoogodi me dagadiaagoyakadi monibeotege modibatege dinyeelo leegodi notoetiigi nagajo awicije, odaa jogodibata Paulo ijaa Silas, odaa jogoixigiticogi miditaga ane licoogadi oko liwigotigi nigotaga, odaa jigidiaagoyate lodoe nigijjoa lacilodi nagani nigotaga. <sup>20</sup>Odaa jogoyadeegiticogi midiwataga goniwinogododi romaanotedi, moditiogi, “Niginoa goneleegiwadi judeutedi, codaa eliodi mowo ligecagalogo nigeladimigipitigi nagana gonigotaga. <sup>21</sup>Niginoa goneleegiwadi odiigaxinagatece lakataga loiigi anodakapetege gonajoinaganegeco, odaa



ajakataga daga jaoga ane liigaxinaganegegi, leegodi oko romaanotedi.”<sup>22</sup>Odaa ja yatecogo ijo noiigi-nelegi, odaa jigidiaagite miditaga jogodakapetege Paulo ijaa Silas. Odaa nigijoa goniwinogododi jogodiigenatakatalo moyaagadi lowoodi Paulo ijaa Silas, odaa jogonalaketiniwace oyatitioigi niale-libiwe.<sup>23</sup>Odaa eliodi monalaketibige Paulo ijaa Silas, nigidiaagidi jogoixotiwece niwilogonagaxi. Odaa jogoiige nigijio nowienogodi niwilogonagaxi me yowietibigiwaji, codaa me dowediteloco.<sup>24</sup>Nigijio nowienogodi niwilogonagaxi naga dibatege nigege, odaa ja yadeegi Paulo ijaa Silas naxogetio niwilogonagaxi, odaa ja niwilo logonaka, oyaxapetiwage itiwataale lagaagetedi niale nigina ane iwaagadi.

<sup>25</sup>Igaanaga nipegiteloco me liwigo-enoale, Paulo ijaa Silas idiaagite oyotaganege Aneotedogoji, codaa me nigaanaganaga, odogetetibigimece Aneotedogoji. Odaa icoa eletidi niwilogojedi jogowajipatiogi.<sup>26</sup>Codaanogonida naga datalale iigo, odaa lipodagaladi nagani niwilogonagaxi ja digike. Odaa agica daga leegi ijoatawece nigicoa lapoaco niwilogonagaxi ja domoke. Odaa nigicoa galeenatedi anoigoetece nigijoa niwilogojedi ja nakagi.<sup>27</sup>Odaa nigijio nowienogodi niwilogonagaxi ja niwodi, odaa ja nadi nigijoa lapoaco niwilogonagaxi me domoke. Odaa ja diletibige nigijoa niwilogojedi daantaga ialetibigiwaji, odaa ja nixigitice lodaajo-ocagataga me domaga dineloadi.<sup>28</sup>Pida Paulo ja dapaaweta, meeta, “Jinaga adineloati, okotawece, etoko digoina!”



(Atos 16.24)

<sup>29</sup>Odaa nigijjo nowienogodi niwilogonagaxi ja dienagata monadeegita noledagaxi, odaa ja dinage me dakatiwece niwilogonagaxi. Dawigice leegodi me doi, odaa ja dinaxogotiniigi loe Paulo ijaa Silas. <sup>30</sup>Odaa ja yadeegiticogi we, naga nigetiniwace, meetiogi, “Akaami iniotagodepodi, amiini ica ane leeditibige me jao me jakadi meote Aneotedogoji me idewigatace?”

<sup>31</sup>Nogoninigodi, modita, “Anakatoni Goniotagodi Jesus, odaa Aneotedogoji jegeote me gadewikitace akaami codaa miditawece gadoigiwepodi.” <sup>32</sup>Odaa jogoyatematita lotaga Goniotagodi nigijjo nowienogodi niwilogonagaxi, codaa me iditawece oko ane idei ligeladi. <sup>33</sup>Ijaagijjo nigijjo enoale codaa me ajaagajo nagajo lakata nigijjo goneleegiwa ja yadeegi Paulo ijaa Silas me iwilegi elaciledi. Odaa agica daga leegi jogoilege nigijjo goneleegiwa codaa me iditawece loigiwepodi. <sup>34</sup>Odaa nigijjo nowienogodi niwilogonagaxi ja yadeegi Paulo ijaa Silas digoida ligeladi, odaa ja ligiwepodi me niodaga. Odaa nigijjo goneleegiwa codaa me iditawece loigiwepodi eliodi me ninitibigiwaji leegodi nogonakato Aneotedogoji.

<sup>35</sup>Igaanaga yelogotibige, icoa goniwinogododi romaanotedi jogoiige iodagawadi modita nigijjo nowienogodi niwilogonagaxi, “Ikaniticoace nigijjoo itoa goneleegiwadi.” <sup>36</sup>Odaa nigijjo nowienogodi niwilogonagaxi jegeeta Paulo, “Nigijjoo goniwinogododi etidiige me gadikaniticoace. Enice ja yakadi manotiticoace natigide. Jemaa Aneotedogoji midioka limedi me ideite makaamitagatiwaji niganotiticoace!”

<sup>37</sup>Pida Paulo jegeetiogi nigijjoo iodagawadi, “Nigijjoo goniwinogododi odiigenatakatogowa metigodalaketibige loe eliodi oko nagana nigotaga, pida agecogotace oiwi migica gobatiigi, igaataga godiciagi romaanotedi. Pida agododigotogowa digo minoataga niginoa romaanotedi. Odaa jogodiigenatakatogowa metigodokoletawece niwilogonagaxi. Odaa natigide ja leedi metigodiige me gododitice, me digica ane yowoogodi. Pida ayakadi! Leeditibige mijaagijjo enagitibeci etigodikatice.”

<sup>38</sup>Odaa nigijjoo iodagawadi jigigotibeci midiwataga nigijjoo goniwinogododi, odaa jogoyelogoditiogi aneyatigi Paulo ligegi. Igaanogoyowoogodi Paulo ijaa Silas me liciagi romaanotedi, odaa nigijjoo goniwinogododi ja doitibigiwaji. <sup>39</sup>Odaa jigigotibeci jogodipokota Paulo ijaa Silas moixomagateetice nigijjo libatiigi. Odaa jogonixoticoace we niwilogonagaxi, codaa odipokotiogi me noditicoaci nagani nigotaga. <sup>40</sup>Paulo ijaa Silas naga noditicoaci niwilogonagaxi, odaa jigigotibeci ligeladi Lídia. Jigidiaagi nogodakapetege gonioxoadipi, codaa onotaganegetiniwace mowo loniciwaga, odaa nigidiaagidi ja noditicoaci nagani nigotaga.

### Ica libakedi Paulo ijaa Silas manitaga nigotaga Tessalônica

**17** <sup>1</sup>Paulo ijaagijjoo lokaagetedi egidaa diiticogi me wiajeega, odaa jogodigotece nigotadi Anfípolis aniaa Apolônia, odaa jogotota nigotaga Tessalônica. Jigidiaagi aca liiakanagaxi judeutedi. <sup>2</sup>Paulo mina ligilegegi migo minoataga inoa niikanagaxiidi, odaa jigigo. Nigijjoatigilo itoatadigida

saabadotedi Paulo igo niakanagaxi, odaa ja dinotigimadetege nigijo oko nigijo negeetece ane diitigilo Aneotedogoji lotaga. <sup>3</sup>Paulo diigaxinagatece codaa me ikeetiogi me leeditibige nigijoa goneleegiwa me dawikode, yeleo, odaa yewigatace, nigijoa goneleegiwa ane niige Aneotedogoji meote me godewigatace. Odaa Paulo jegeetiogi, “Jatematitagawatiwaji, mejitece Jesus. Jiginiaaginiwa Jesus nigijoa goneleegiwa Aneotedogoji ane niige meote me godewigatace.”

<sup>4</sup>Onatecigijo nigijo oko anowajipatalo lotaga Paulo ijaa Silas eniwagatakanaga, odaa jogodinawanagaditege. Liwigotigi nigidi aneniwagatakanaga idi eliodi greegotedi anodogetetalo Aneotedogoji, codaa meliodi iwaalepodi gonegaga.

<sup>5</sup>Pida icoa judeutedi ja nocetibigiwaji, odaa jogoyatecogotee ica lapo goneleegiwadi agopeloaga anidiaagitibiga miditaga ane licoogadi oko nagani nigotaga. Odaa nigini lapo jigigotibeci oibatoogodi nagani nigotaga. Odaa jognipoditice Jasão ligeladi, odoletibige me dakatiobece, domigigotibeci odoletibige Paulo ijaa Silas, domogodoletibige moyadeegiticogi lodoe nigijo noiigi. <sup>6</sup>Igaanaga digicata moyakadi Paulo ijaa Silas, odaa jogoixigitijo Jasão ijaagijo eledi gonioxoadipi, odaa jogoyadeegiticogi lodoe nigijoa lacilodi nagani nigotaga. Odaa ja napaawagateloco, modi, “Natigide etina jognotogowa nigijoa goneleegiwadi anowo ligecagalogo nigeladimigipitigi inoatawece nigotadi. <sup>7</sup>Codaa Jasão nodetibigiwaji nigidiwa goneleegiwadi midiaagi ligeladi. Nigidiwa goneleegiwadi agoyiwagadi lajoinaganegeco César, ninionigi-eliodi romaanotedi ane diigenataka digoina Tessalônica, leegodi modi mini epaa ninionigi-eliodi ane liboonagadi Jesus.” <sup>8</sup>Nigijo nogowajipatalo lotaga nigijo goneleegiwadi abeyacagaga, odaa nigijoa lacilodi ijaagijo nigeladimigipitigi nagani nigotaga eliodi me nogowikomataaga, codaa agaleegoyowoogodi nigica anowo. <sup>9</sup>Odaa nigijoa lacilodi jogoiige Jasão ijaagijoa lokaagetedi moyajigo dinyeelo, micataga daga loojedi meo Paulo ijaa Silas me dagaleegowo anodi me beyagi. Odaa nigidiaagidi jogoikaticoace.

### **Paulo ijaa Silas idiaa libakadi manitaga nigotaga Beréia**


<sup>10</sup>Igaanaga enoale, agica anoyopagadi nigijo gonioxoadipi jogoiige Paulo ijaa Silas migotibeci nigotaga Beréia. Nogototicogi Beréia, odaa jigigotibeci manitaga liakanagaxi judeutedi. <sup>11</sup>Nigidi oko digoida Beréia baanaga nigomaga mowajipata anewi aliciagi nigijo nigeladimigipitigi nigotaga Tessalônica. Codaa oyemaa meliodi mowajipatalo Paulo lotaga. Inoatawece nokododi oiwitelogo lotaga Aneotedogoji owotibige moyowoogodi domigewi ica Paulo ane diigaxinagatece. <sup>12</sup>Odaa eliodi nigijo oko jognakato Goniotagodi. Liwigotigi nigijo aneniwagatakanaga ijo eliodi greegotedi codaa me iwaalepodi anida aneetege licogegi ane gonegaga. <sup>13</sup>Pida nigijoa judeutedi ane ligeladi nigotaga Tessalônica nogodibodicetibige Paulo me yelagoditedibece Aneotedogoji lotaga digoida nigotaga Beréia, odaa jagagigotibeci moyetigi lacilo nigidi noiigi modakapetege Paulo ijaa Silas. <sup>14</sup>Odaa agica anoyopagadi gonioxoadipi jogoimonya Paulo migo liniogotibece

akiidi-eliodi, pida Silas ijaa Timóteo bigidiaa nenyagate nigotaga Beréia. <sup>15</sup>Odaa nigijoa eletidi lokaagetedi jogoilaajo Paulo negepaa nigotaga Atenas. Nigidiaagidi ja dopitijo manitaga nigotaga Beréia, odaa Paulo ja dajoinagatigi moibodicaxi Silas ijaa Timóteo me daga dinopagadi migotibeci minitaga.

### Paulo datematika digoida nigotaga Atenas

<sup>16</sup>Nigijjo Paulo midiaagite nigotaga Atenas, nibeotibigege Silas ijaa Timóteo motota. Nigijjo midiaagi me nibeotibige, odaa ja nadi nagani nigotaga Atenas minoa niwicidi. Odaa eliodi me agecagalo, codaa me ilee laalegena. <sup>17</sup>Odaa jigigo manitaga lliakanagaxi judeutedi, odaa ja dinotigimadetege icoa judeutedi icaagica ane daga judeutedi pida odioteci lakataga judeutedi, codaaeledi dinotigimadetege nigijjo oko ane dakapetibigiwage inoatawece nokododi miditaga ane licoogadi oko me yatecogo. <sup>18</sup>Codaaeledi dakapetege icoa niigaxinaganadi epicureutedi ijaagijoa estóicotedi,eledi odinotigimadetege. Odaa dinigetiwage, modi, “Amiini ini yetole ane leedi me godiigaxi?” Icaagicaeledi modi, “Icaa mina daga yalagatiogi noenogododi eletidi noiika.” Odaa jiginaa lotaga leegodi Paulo me yalagatalo Jesus codaa me yalagata Aneotedogoji meote Jesus me yewigatace nigijjo moyeloadi. <sup>19</sup>Odaa jogoyadeegiticogi Paulo miditaga nigijjo aneitibige me yatecogo icoa lilokagawadi niigaxinaganadi, ane liboonagadi Areópago, nigidi aneitibige amina ite oko me yatecogo, me diniigaxitibigiwaji. Odaa jogodita Paulo, “Jemaanaga me jowoogotaga amigida ica gela gadiigaxinaganagegi anelogotitibece. <sup>20</sup>Igaataga nigijjo gadotaga etigodawelagadi, odaa joleegatibige me jowoogotaga anodaa diitigilo nigijjo gadotaga.” <sup>21</sup>Odaa jigidaagowote, igaataga iditawece nigeladimigipitigi nagani nigotaga inaaginoa iomagaga pida idiaa ligeladi nigotaga Atenas lemaanigitibece me leegi midiaagi moyatemati codaa mowajipata okanicodaagicata gela nibodigi.

<sup>22</sup>Odaa Paulo ja dabititi liwigotigi nigijjo oko ane yatecogo anoyatigi me Areópago, odaa jeege, “Akaami iniotagodepodi ane gadigeladi Atenas jinadi nigina akaamitiwaji mawiite inoatawece mogetetigi niginoa ganiwicidi. <sup>23</sup>Nigijjo mejigoteloco nagana ganigotagatiwaji, odaa jinadi ane onitibigetiwaji matecigi mogetetigi niginoa ganiwicidi. Codaaeledi jinadi nagajo wetiga anabakenitiwaji mawenigideni nigina ganiwigo, nagani wetiga diniditeloco nidigo anee, ‘Digoina jogeegata gonoenogodi ane digicata me jowoogotaga.’ Niginiwa Gonoenogodi anogeetetalotiwaji idaagee me digicoatedi mowoogoti, joaniginiaagejitece nigina me gadiigaxinitiwaji. <sup>24</sup>Aneotedogoji eote nigina iigo codaa me inoatawece niginoa aninoa digoina iigo. Iniaaginiwa Goniotagodi Aneotedogoji iige inoatawece ane ideite ditibigimedi codaa me iigo, odaa adigeladetedigi diimigi ane loenatagi nigina oko. <sup>25</sup>Iniaaginiwa ayopotedibige nigina oko dogowo noenatagitema anigetigidi, leegodi Jiginiaageote nigina oko me newiga, me naalaga, codaa yajigotediogi nigina oko inoatawece anoyopotibige me newiga. <sup>26</sup>Yoe inoatawece ane noiika, anida aneetege licogegi nigijjo odoejegi goneleegiwa loenatagi. Odaa ja ilaagagaditedeloco me



(Atos 17.23)

nigeladeegateloco inoatawece liwailidi iigo. Jiginiaaginiwa ane nilagaditetema nokododi nigina oko, codaa me nibikota niigotedi nigijo maleedigicatibige mina me newiga. <sup>27</sup>Joanigidaa aneote, eotedibige modoletibige odaa domogoyakadi nigina modoletibige. Pida aleegitalo me yototedice oninitecibeci nigina oko.

<sup>28</sup>Jigidaa ligegitibece nigijo oko ane gadoigi mee,

‘Jiginiaaginiwa aneote me godewiga,  
eote me jitinagaga,  
codaa jiginiaa leegodi nogoko.’

Codaa ijoa notaganegecajoli nigina akaamitiwaji anodi,

‘Okotawece oko lionigipi.’

<sup>29</sup>Enice leegodi moko lionigipi Aneotedogoji leeditibige me daga jilegatibige Aneotedogoji daga liciagi okanicodaagicata niwigo noenatagi oolo, domigetaga beexo, ogoa domigetaga wetiga, loenataka nigina oko ane lixakedi me yoe, codaa me yowoogodi me dadinegenataka. <sup>30</sup>Aneotedogoji aiwi anigoteta nigijo oko nigijo jotigide nigijo me dogoyowoogodi mida libatiigi. Pida natigide iige inatawece nigina oko digoina iigo, minatawece odinilaatece libeyacegeco.

<sup>31</sup>Leegodi jegeote lakatagi noko me iwi anigotediogi inatawece oko digoina iigo, codaa meote ane igenaga nige iwi anigotediogi nigina oko. Odaa eote ibake Goneleegiwa nigijo ane ixipetedice mepaa iwi anigotiogi oko. Ikeetediogi inatawece oko mewi micota me ibake nigijoa Goneleegiwa me iwi anigotediogi nigina oko, nigijo negeote me yewigatace nigijoa Goneleegiwa.”

<sup>32</sup>Igaanogowajipata Paulo mee Aneotedogoji negeote nigijoa Goneleegiwa me yewigatace, odaa jigijo nigijo oko anoyame. Pida icaeledi oko modi, “Jemaanaga me jajipaagatagawa me enitacece nigino notaga.” <sup>33</sup>Odaa Paulo ja noditice me ideimiditaga. <sup>34</sup>Odaa onatecigijoa icoa goneleegiwadi jogotota Paulo, codaa oyiwagadi nigijoa lotaga. Liwigotigi nigidiwa goneleegiwadi, ijo ane liboonagadi Dionísio anida aneetege nigijjo lapo anodita me Areópago. Eledi dinawanagaditege Paulo aca iwaalo anodita Damáris, codaa icaagicaeledi aneniwagatakanaga.

### Paulo eo ane libakeditema Goniotagodi manitaga nigotaga Coriinto

**18** <sup>1</sup>Nigidiaagidi Paulo naga nigotini me yotaganege nigijjo lapo anodita Areópago, odaa ja noditicogi nigotaga Atenas, jigigo nigotaga Coriinto. <sup>2</sup>Joanigidiaa dakapetege ica goneleegiwa ane judeu liboonagadi Áquila, ane lanikadi nipodigi Ponto. Áquila ajaagajo lodawa ane liboonagadi Priscila, anigica dogowidi nokododi moyaladi Itália leegodi Cláudio, nigijjo ninionigi-eliodi romaanotedi, me iige iditawece nigidi noiigi ane judeutedi me noditicoaci nigotaga Roma. <sup>3</sup>Odaa Paulo jigigo dalitioigi, odaa jigidiaagi miditaga, ja libakawepodi, leegodi minaagina noenatagodi nopecetiidi digo miditaga moyoe nopecetiidi. <sup>4</sup>Odaa inoatawece saabadotedi Paulo igo liakanagaxi judeutedi doletibige me ikeetioigi judeutedi ijaagijjo ane daga judeutedi me diigaxinagatece anewi.

<sup>5</sup>Nigijjo Silas ijaa Timóteo nogoiiwidatece Paulo, moicogoticogi nipodigi Macedônia, odaa Paulo ja ika me yoe nopecetiidi, jegeo nimeditema me datematika. Ikeetioigi judeutedi me nigijjaagijjoa Jesus Nigijjoa Aneotedogoji ane nimonya meote me godewigatace. <sup>6</sup>Pida nigijjoa judeutedi jogodakapetege Paulo, odaa jogoniwotibige. Nigijjo nogodakapetege, odaa Paulo ja iticogo inoa lowoodi me iticogo amogo lodoe nigidi oko, me ikee dagadiaagica aneetege, odaa jegeetiogi, “Nige gadiloikatititewaji Aneotedogoji, agaleegica anejitagagi, igaataga ja jatematitagawatiwaji Aneotedogoji ane niigetediwa mejitagawa, pida agemaanitiwaji mabaatege yotaga. Natigide jejegijo jatematitioigi nigidi ane daga judeutedi ane niigetediwa Aneotedogoji me jao.” <sup>7</sup>Odaa ja yototicoace, jigigo noiigiwa Tício Justo ane daga judeu, pida dogetetalo Aneotedogoji. Pida nigica ligeladi one idiaagi liwai liakanagaxi judeutedi. <sup>8</sup>Odaa ica Crispo ane dowediteloco liakanagaxi judeutedi nakato Goniotagodi, codaa iditawece loiigiwepodieledi onakato Goniotagodi. Eliodieledi oko ane ligeladi nigotaga Corinto owajipatalo nigijjoa Paulo lotaga, odaaeledi onakato Goniotagodi, codaa ja dinilegetibigiwaji.

<sup>9</sup>Ica enoale Paulo jigijjo ica lakatigi micataga daga ligeedi, Goniotagodi ja dinikeeteta, meete, “Jinagadoii! Codaa jinaganotokitini, idioka limedi matematikani! <sup>10</sup>Igaataga ite Ee makaamitaga, odaa agica ane yakadi me gadatacilotiti. Igaataga nagani nigotaga eliodi oko ane jiniditioigi me inepilidi.” <sup>11</sup>Odaa jigidiaagi Paulo onidateci nicaagabi nigigo meeya, iigaxitece lotaga Aneotedogoji nigidi noiigi.

<sup>12</sup>Nigijo Gálio nogoixotio me lacilo romaanotedi me iige nipodigi Grécia, odaa icoa judeutedi ja dinatecogotee modibata Paulo, odaa jogoyadeegiticogi minitaga ijo diimigi-nelegi aneitice Gálio me iwi anigotioigi nigina oko. <sup>13</sup>Odaa jogodita Gálio, “Nigini goneleegiwa niigaxitiniwace noiigi modogetetalo Aneotedogoji nigida lakatigi lakapetegi gonajoinaganegeco.”

<sup>14</sup>Nigijo Paulo naga domaga igidi nigijoa notaga modakapetege, odaa Gálio jegeetioigi nigijoa judeutedi, “Digawini akaami judeutedi! Nigida goneleegiwa daga ninaaletiniwace oko me dinigaanyetece dinyeelo, ogoa domigetigica loenatagi ane dagaxa me beyagi, odaa daganagawini jajipatagawatiwaji. <sup>15</sup>Pida natigide jagadinotigimadenitiwaji enitece icoa boonagatedi, icoa notaga, inaaginoa ganajoinaganegeco. Enice akamagawinitiwaji, baadaga jiwi anejigota ane gadileenigitema nigida goneleegiwa.” <sup>16</sup>Odaa ja diigenatakatiogi monogaticoace nigijoa judeutedi wetice diimigi-nelegi. <sup>17</sup>Odaa nigijoa judeutedi jogodibata Sóstenes nigijo gela nowienogodi liikanagaxi judeutedi, odaa jogonalaketibige lodoe nigijo diimigi-nelegi. Pida Gálio agica meo nigijo niciagi.

### **Paulo opitacicogi nigotaga Antioquia**

<sup>18</sup>Paulo owidi nokododi midiaagi nigotaga Coriinto. Nigidiaagidi ja ibode gonioxoadipi, odaa digoida nigotaga Cencreía ja dibata aca etogo-nelegi mopiticogi nipodigi Síria. Odaa Priscila ijaa Áquila jigigotibeci mijotaga Paulo. Maleedigicatibige daga waxoditinigi nagaca etogo, odaa Paulo ja noxotegi lamodi me ikee meo ligegitege Aneotedogoji. <sup>19</sup>Igaanogotota nigotaga Éfeso, odaa jigidiaa yoyate Priscila ijaa Áquila. Paulo naga dakatiwece liikanagaxi judeutedi, odaa ja dinotigimadetege icoa judeutedi. <sup>20</sup>Odaa jogodipokota Paulo midiaaginawaanigi miditaga onatecigidiwa nokododi. Pida adibatege nodenegegi. <sup>21</sup>Odaa nigijo naga nibodetiniwace, meetiogi, “Jopotibige mejigo jixomagateetijo nalokegi digoida nigotaga Jerusalém. Pida nige yemaa Aneotedogoji, odaa бага idopitacijo makaamitagatiwaji.” Odaa ja waxoditinigi nagaca etogo-nelegi, odaa jigigo nigotaga Éfeso.

<sup>22</sup>Igaanigicoticogi nigotaga Cesaréia, naga waxoditice, odaa agica ane yopagadi odaa jigigo nigotaga Jerusalém, odaa jigidiaagi me yecoaditece loiigi Goniotagodi. Odaa nigidiaagidi jigigo nigotaga Antioquia. <sup>23</sup>Odaa Paulo jigidiaagi onatecigijoa nokododi, nigidiaagidi odaa jogopi. Odaa jigigotece nipodaga Galácia, Frígia, odaa jigidiaagi meo loniciwaga idiwatawece lapoli loiigi Goniotagodi.

### **Ica niigaxinaganaga anodita Apolo**

<sup>24</sup>Ini ica judeu ane liboonagadi Apolo ane lanikadi nigotaga Alexandria. Odaa Apolo jigigo nigotaga Éfeso. Nigini goneleegiwa ele me dotaga, codaa eliodi me yowoogodi Aneotedogoji lotaganagaxi. <sup>25</sup>Apolo yowoogodi owidi niigaxinaganegeco anoditece Goniotagodi, codaa eliodi me yoniciwadi nigina naga datematika codaa me diigaxinagatece Jesus. Idioka limedi me

diigaxinagatece anewi. Pida idoka yowoogodi ane leegodi João me nilegetiniwace oko. <sup>26</sup>Odaa Apolo abo laalegena me dotaga manitaga liiakanagaxi judeutedi. Odaa Priscila ijaa Áquila jogowajipa Apolo me dotaga, odaa nigidiaagidi jogoyadeegiticogi ligeladi. Odaa jigidiaagi negepaanaga oyenikamagaditema Apolo moyelogodita liigaxinaganegeco Aneotedogoji. <sup>27</sup>Apolo ja lowoogo me dibata etogo-nelegi migo nipodigi Grécia. Odaa gonioxoadipitigi Éfeso jogowo lidietibige nigijo anodiotibece Goniotagodi digoida nipodigi Grécia owotibige mele modibatege Apolo. Igaanigicotiogi odaa eliodi ane yaxawatibigiwaji nigijo anonakato Goniotagodi leegodi Goniotagodi meliodi meletetema nigidi gonioxoadipi. <sup>28</sup>Apolo mina ida loniciwaga me dinotigimadetege judeutedi lodoe nigina oko, codaa agoyakadi moigeke, codaa ikee Aneotedogoji lotaganagaxi me eetece Jesus Nigijaagijoa ane niige Aneotedogoji meote me godewigatace.

### Paulo igo datematika manitaga nigotaga Éfeso

**19** <sup>1</sup>Nigijo maleegidiaagi Apolo digoida nigotaga Coriinto, ijaa Paulo ja yakagiditeloco liwigotigi nipodigi aninoa wetiadi, odaa jigicoticogi nigotaga Éfeso. Jigidiaagi nigijo ane dakapetege onatecigijo anodi modiatece Goniotagodi. <sup>2</sup>Odaa Paulo ja nigetiniwace, meetiogi, “Aneotedogoji naga nikatedagalocotiwaji Liwigo me digeladetiawagaji ica naga anakatoni Goniotagodi?” Odaa jogoigidi, modita, “Nigida moko agica daga jajipaagata moyalagata ica Liwigo Aneotedogoji.” <sup>3</sup>Odaa Paulo ja nigetaciniwace, meetiogi, “Pida ica naga adinilegenitiwaji, ame liboonagadi anoibake?” Odaa modita, “Nigijo naga idinilegenaga, jiwagatece nigijo ane liigenatakanegegi João Batista.”

<sup>4</sup>Odaa Paulo jegeetiogi, “João iige nigijo oko me dinilegetibigiwaji nigijo naga odinilaatece libeyacegeco. Pida meetiogi loiigi Israel me leeditibige moyiwagadi Nigijoa anicota menagi nigidiaagidi, Nigijoa Aneotedogoji ane niige. Odaa nigini oko aneeta jigijaagijoa Jesus.”

<sup>5</sup>Nigidiaagidi nogowajipatalo nigijoa lotaga Paulo, odaa jagaga nilegetiniwace datika Liboonagadi Jesus Cristo. <sup>6</sup>Nigidiaagidi Paulo ja ipeketeloco libaagatedi, odaa Liwigo Aneotedogoji ja dinikatiogi me digeladetigi laalegenali. Odaa jogodotagatigilo eletidi iolatedi ane digicoateda moyowoogodi, oyatematitedibece lowooko Aneotedogoji. <sup>7</sup>Ejime ijoa dooze goneleegiwadi ane dinilegetibigiwaji.

<sup>8</sup>Paulo dakatiobece manitaga liiakanagaxi judeutedi codaa abo laalegena me notaganegetiniwace nigijo noiigi. Odaa jigida libakedi nigijoatigilo iniwatadigini epenaitedi. Dinotigimadetege codaa doletibige me dinigaanyetece moyowoogodi anodaagee Aneotedogoji me iige laalegenali oko. <sup>9</sup>Pida nigidi oko onatecigijo dakake laalegenali, ageniwagatakanaga, codaa beyagi modotagatibige nigijo niigaxinaganegegi aneetece Goniotagodi lodoeeledi oko. Odaa Paulo ja yototicoace, odaa ja iomagaditicoace nigijo anonakato Goniotagodi. Odaa inoatawece nokododi ini mawatege nigijo noiigi me yatecogo, codaa dinotigimadetege nigijo oko manitaga lidikonagaxi ica goneleegiwa ane liboonagadi Tirano. <sup>10</sup>Odaa yadeegi itoataale nicaagape



Paulo meo nigida libakedi negepaagicota miditawece nigijo judeutedi ijaagijo ane daga judeutedi ane ligeladi nipodigi Ásia mowajipatalo lotaga Goniotagodi.

<sup>11</sup>Aneotedogoji ibake Paulo meote loenataka ane joxicagatema aneo nigijo noiigi moyopo. <sup>12</sup>Oyadeegita Paulo leenxotedi inaaginoa nowoodi elipogo ane ibake noolaganagalo, odaa Paulo ja dibatelogo. Nigidiaagidi oyadeegitioigi nigijoa eelotaginadi magaga odibatelogo. Nigijo nogodibatelogo nigijoa leenxotedi ijaagijoa eletidi nowoodi, odaa ja nicilaga, codaa me niwicidi abeyacagaga aagaga noditicogi oko anodakatiogi.

<sup>13</sup>Onidiwa icoa judeutedi anidioka limedi me wiajeegateloco inoatawece nipodaga codaa moiticoiticoace niwicidi abeyacagaga minataga nigina oko. Nigidiwa goneleegiwadi domogonaketace moibake Liboonagadi Jesus moiige me noditicoaci niwicidi abeyacagaga, moditioigi, “Gadiigenegegi manotitice minataga nigina oko leegodi loniciwaga Jesus, Nigijoa ane yatematitedibece Paulo!” <sup>14</sup>Nigidiwa goneleegiwadi anowo nigida anee one seete lionigipi Ceva, ica judeu anijo me sacerdoti gonegegi. <sup>15</sup>Pida ica noko moibake Liboonagadi Jesus me domogoiticoitice niwigo abeyacegegi ane dakatiogi ica goneleegiwa, odaa nigica niwigo abeyacegegi ja ninigodi, meetioigi, “Nigijoa Jesus jowoogodi, codaa me Paulo jowoogodi. Bagakaami, amakaamitiwaji?”

<sup>16</sup>Odaa nigijo goneleegiwa ane dakatiogi niwigo abeyacegegi ja waxoditioigi miditaga, odaa ja igeke, eliodi me naxacogotiniwace, codaa me naagaditedini lowoodi. Odaa nigijoa seete goneleegiwadi jogoyotitice ligeladi nigijo goneleegiwa agaleegicoa lowoodi me daleditibigimoace, codaa menacilotiniwace.

<sup>17</sup>Odaa iditawece nigeladimigipitigi nigotaga Éfeso jogodibodiceta nigida niciagi, ijoa judeutedi ijaagijo ane daga judeutedi. Iditawece doibitigiwaji leegodi loniciwaga Liboonagadi Jesus, codaa moiwenigide Liboonagadi Goniotagodi Jesus. <sup>18</sup>Codaa eliodi nigijo baanogonakato Goniotagodi igotibeci dinatema lodoe eledi oko mowo ane beyagi. <sup>19</sup>Odaa eliodi oxikonagaga oyadeegi icoa notaganagaxiidi anoibake modiniigaxitece mowote noxikonegeco. Odaa jogoiladie ijoatawece notaganagaxiidi codaa niginoa eletidi najoli anoibake mowote noxikonegeco, odaa jogoyalegi lodoe eliodi oko. Nigica nogonilagadi ica ane loojedi ijoatawece nigijoa anoyalegi, odaa dibatalo loojedi me jibaaga meya-taalia miili nokododi moyedia ane loojedi noko. <sup>20</sup>Odaa jigidaagee nigijoa natematiko jegaanaga ilaagitibece, codaa loniciwaga lotaga Goniotagodi idapaga diiticogi me iigi anee lewiga nigina oko.

### Ica me dibatotioigi oko digoida nigotaga Éfeso.

<sup>21</sup>Igaanaga oigodi nigijo noiigi moyalegi ijoa loxikonagatedi, odaa Liwigo Aneotedogoji jegeo Paulo me lowoogo me digetita nipodigi Macedônia aniaa Acaia, odaa jigigo nigotaga Jerusalém. Odaa Paulo jegee, “Ejigo nigotaga Jerusalém, odaa nigidiaagidi ja leeditibige mejigotace idalita nigotaga Roma.” <sup>22</sup>Odaa ja iigeticogi nipodigi Macedônia itoataale nigijoa laxawepodi, Timóteo ijaa Erasto. Pida Paulo bagaleegidiaaginawaanigi nipodigi Ásia.



(Atos 19.19)

<sup>23</sup>Nigjjoa nokododi eliodi me dibatotiogi nigeladimigipitigi nigotaga Éfeso leegodi niigaxinaganagegi aneetece Goniotagodi. <sup>24</sup>Ini ica goneleegiwa ane liboonagadi Demétrio, libakedi me naxacogodi beexo codaa meote liwicidi ligeladi aca niwigo nigidi noiigi ane liboonagadi Diana. Odaa niginoa niwicidi nogoyaa, odaa owidi dinyeelo odinigaanyetece. <sup>25</sup>Odaa Demétrio jegeniditiogi nigidiwa anoyoe niwicidi ijaagijoeledi oko anowote eletidi loenataka anaagana beexo, elaanaga. Odaa jegeetiogi Demétrio, “Akaami yokaagetepi, owoogotitiwaji moko liicotedi leegodi me joenaga niginoa niwicidi mejaanaga. <sup>26</sup>Jaganatitiwaji codaa majipaata Paulo me dotagatibece me lakapetegi niginoa

niwicidi. Eote niginoa lotaga aginokina digoina nigotaga Éfeso. Pida eledi dotagatibece ja domaga inatawece nipodigi Ásia. Paulo mee niginoa niwicidi ane godoenataka me daga gonoenogododi leegodi aonigica Ioniciwaga. Odaa eliodi oko jogoyiwagadi lotaga, odaa agaleegodinoonetalo niginoa ane godoenataka. <sup>27</sup>Codaa diganagawini, doidetibige nigina oko me beyagi modotagatibige nigida gobakedi, codaa eledi doidetibige modiletibige me digicata niwaló nigini diimiginelegi, ligeladi gonoenogodo Diana. Odaa jigidaagee nigina oko nigodiletibige Diana me daga gonege, idaagidata me domegeliodi oko anodogeteta, inatawece nigeladimigipitigi nipodigi Ásia, codaa minoatawece ane liwailidi nigina iigo!”

<sup>28</sup>Nigijjo noiigi nogowajipatalo nigijjo Demétrio lotaga, odaa eliodi me neligideega, odaa ja napaawagateloco, modi, “Jiwenigidenaga Diana, noenogodo godoiigi efeesiotedi!” <sup>29</sup>Odaa ja dibatotigi oko anitawece nigotaga. Codaa jogodibata Gaio ijaa Aristarco, nigijjo itoataale elatibige Macedônia, lixigagawepodi Paulo me diniwaje. Odaa iditawece odinaxawatigi moixigitijo nigijjo itoataale miditaga boolagadi-nelegi nagani nigotaga. <sup>30</sup>Paulo domaga yemaa migo dotaga lodoe nigijjo noiigi, pida nigijjo anodiotibece Jesus agoika migo. <sup>31</sup>Icoa onatecigijjo anoiige nigidi nipodigi nokaagedi Paulo. Oiwakateetibige Paulo libodigi, odaa jogodipokota me digigo miditaga nigijjo boolagadi-nelegi. <sup>32</sup>Iditawece nigijjo noiiginelegi ane yatecogo ja dibatotigi. Idi napaawagateloco jegeledi lotaga, idiaageledi jegeletidi lotaga, pida nigica eledi liwai nigidi nagoodi-noiigi baadogoyowoogodi ane leegodi me yatecogo. <sup>33</sup>Odaa nigijjo judeutedi anidi liwigotigi nigijjo noiiginelegi jogoixipetice Alexandre, odaa jogoyamagatiijo migo odoe me dotaga me licaajepodi. Odaa Alexandre ja yatitigi libaagadi me dipokotiigi nigijjo noiiginelegi me notokotiniwace. <sup>34</sup>Nigijjo noiigi-nelegi nogoyowoogodi Alexandre me judeu, odaa iditawece napaawagateloco, modi, “Jiwenigidenaga Diana, noenogodo godoiigi efeesiotedi!” Odaa yadeegi iniwataale lakata midi me napaawagateloco.

<sup>35</sup>Odaa nigijjo ane iige nigotaga ja yakadi me yamaketini nigijjo noiigi-nelegi, odaa jegeetiigi, “Akaami nigeladimigipitigi nigotaga Éfeso, inatawece oko oyowoogodi nagana gonigotaga me yotete ligeladi gonoenogodo Diana aneliodi me jogeegata, codaa meledi yotete liwigo ane icogotibigimece ditibigimedi menitini. <sup>36</sup>Agica ane yakadi mee me daga icogotibigimece ditibigimedi nagada niwigo. Enice anotokitiniwacitiwaji, jinaga agowikomataa, codaa jinigica anawii anigida gadoenatagi me daga ecogotace owookoni. <sup>37</sup>Jaganadeegitetiwaji nigidiwa goneleegiwadi, pida agica lolicagadi midiwataga ligelatedi niwicidi, otegeaagaga beyagi modotagatibige gonoenogodo Diana. <sup>38</sup>Demétrio ijaagijjo libakawepodi nigica anigida anoileetema oko, niginoa nokododi ele monibikota noko me dinatecogotee goniwinogododi anonajipatogowa, codaa yakadi modinelegetiigi lacilodi romaanotedi. Odaa jigidiaagi moyakadi mowo ligegi modakapetege eledi oko me nilaagetedaga. <sup>39</sup>Odaa akaamitiwaji nigica eledi ane leegodi madinotigimadenitiwage, yakadi mawinitiwaji nigina me limedi niginoa lacilodi moniditogowa metigodatecogotee. <sup>40</sup>Igaataga doidetibige niginoa lacilodi romaanotedi dogodiletibige daantaga godakapedipi leegodi nigina me jibatooga

nigina noko. Igaataga agica ane leegodi me jatecogojogo nigina noko.”<sup>41</sup> Igaanaga nigotini me dotaga, odaa ja yakadi meo milaagitibeci nigijo noiigi-nelegi.

**Paulo eo loniciwaga nigijo anoyiwagadi Jesus  
digoida nipodaga Macedônia aniaa Acaia**

**20**<sup>1</sup>Nigijo naga ixomagatice me dibatotigi nigijo oko, odaa Paulo jegeniditigi nigijo anodiotibece Jesus, odaa jegeo loniciwaga. Odaa nigidiaagidi ja nibodetiniwace migo nipodigi Macedônia.<sup>2</sup>Odaa ja digetita nigidiwa nipodaga, odaa eliodi meo loniciwaga nigijo anoyiwagadi Jesus, codaa eliodi me najoitiniwace. Nigidiaagidi jigicota nipodigi Grécia.<sup>3</sup>Odaa jigidiaagi iniwatadigini epenaitedi. Igaanaga dinoe me dibata aca etogo-nelegi migo nipodigi Síria, odaa ja dibodicetigi icoa judeutedi modoletibige moyeloadi. Odaa ja iigi lowoogo, ja lowoogo me digetita nipodigi Macedônia opitacege lowidi.<sup>4</sup>Lixigagawepodi Sópatro, ane lionigi Pirra anelatibige nigotaga Beréia; Aristarco ijaa Segundo anelatibige nigotaga Tessalônica; Gaio anelatibige nigotaga Derbe; Timóteo, Tíquico ijaa Trófimo anelatibige nipodigi Ásia.<sup>5</sup>Idiwatawece nigijoa goneleegiwadi dinewadetibigiwaji, odaa jognibeotogogi digoida nigotaga Trôade.<sup>6</sup>Igaanaga ixomagatice lalokegi judeutedi anodita me “Lalokegi Paon ane digica labookojegi”, odaa ja jibagata ajo etogo-nelegi, odaa jiginiga nigotaga Filipos. Nigidiaagidi naga ixomagatedijo ciinco nokododi, odaa ja jiwidaagatiogi digoida nigotaga Trôade, odaa jigidiaagejonaga seete nokododi.

**Ica lioneege ane liboonagadi Êutico yeleo nigidiaagidi ja yewigatace**

<sup>7</sup>Igaanaga nexogotini me saabado, odaa ja jatecogojogo me jelicaga liweenigi nigina anonakato Goniotagodi. Paulo datematikatema nigijo ane yatecogo negepaa liwigo-enoale, leegodi lowoogo me diniwaje nige yelogotibige.<sup>8</sup>Odaa jigidiaa godatecagadi ijo diimigi-le ane dalagate, odaa catiwedi le idiwa owidi noledagaxiidi.<sup>9</sup>Odaa ini ijo lioneege ane liboonagadi Êutico. Idiaa nicote midataga ijo nawiwenegegi. Paulo egidaagee me datematika, odaa Êutico jegepaanaga ibagi, nigidiaagidi ja diote, naga leecawaanigi jegenitini, icogotibigimece ijo nawiwenegegi, leegitibigimece, icogotibigimece nigini naga iniwatadigini le nigijo diimigi. Igaanaga domogonicoogetini, pida ja yeleo.<sup>10</sup>Odaa Paulo ja dinikatini, naga dakagiteloco nigijo lioneege, odaa ja ibedotece. Nigidiaagidi jegee, “Jinaga agowikomataatiwaji, igaataga eyewigatace!”<sup>11</sup>Odaa Paulo jigigotace minitaga ijo diimigi-le ane ideitice ditibigimedi, odaa ja yeligo nigijo niweenigi, ligiwepodi nigijo eledi. Nigidiaagidi jigidaa dinanataci me datematika negepaa yelogotibige. Nigidiaagidi odaa ja noditice.<sup>12</sup>Odaa jogoyadeegiticogi nigijo lioneege ligeladi, ja yewiga, odaa nigijo noiigi eliodi me yoniciwaditibigiwaji.



(Atos 20.9)

### Paulo ijaagijoa lokaagetedi egidaagee me wiajeega

<sup>13</sup>Odaa ja idinewadenaga ja jibagata ajo etogo-nelegi, odaa jiginigaga nigotaga Assôs anei Paulo magaga dibata etogo-nelegi. Maleedigicatibige me gododitice naga ligegitogowa midegejinaga, ijigijo бага diniwajetinigi iigo. <sup>14</sup>Igaanaga jakapagatege digoida nigotaga Assôs. Odaa ja jadeegaga catinedi nagajo etogo-nelegi, ja iniwajeegeticogi nigotaga Mitilene. <sup>15</sup>Igaanaga jalataga Mitilene, negeledi noko ja inoxiwicaga lidelogo ane liboonagadi Quios. Negeledi noko jejejogota lidelogo ane liboonagadi Samos, odaa negeledi noko jejejogota nigotaga Mileto. <sup>16</sup>Odaa Paulo ja lowoogo me nawiile nigotaga Éfeso codaa anicoti dootibige daganiaditema noko digoida nipodigi Ásia, leegodi me yajolitaga eotibige me age micota nigotaga Jerusalém maleedigicatibige me nakatio nalokegi anodita “Pentecostes”.

**Paulo eo Ioniciwaga nigijoa laxokodi goneleegiwadi  
lacilodi lapo loiigi Goniotagodi anoicogoticogi Éfeso**

<sup>17</sup>Nigijjo Paulo midiaagi nigotaga Mileto, odaa ja dienagatiogi nigijjo laxokodipi lacilodi lapo loiigi Goniotagodi manitaga nigotaga Éfeso. Eniditiogi migotibeci odakapetege. <sup>18</sup>Igaanogotota, odaa jegeetiogi, “Nigida makaamitiwaji owoogoti anodaagee yewiga ijoatawece nigijoa nokododi minaagejote makaamitaga, nigijjo maleeka janoticogi nipodigi Ásia. <sup>19</sup>Ee iwikodaga, codaa eliodi me jinoetibece ane ee liotagi Goniotagodi, nigijjo naga jao libakedi Goniotagodi, eliodi me jakapetege ane dakaketomi leegotedi judeutedi modoletibige mowo anodigotiwa. <sup>20</sup>Codaa owoogotitiwaji me digicata ane jagaditagadomi, ane jakadi me gadaxawanitece, nigijjo naga jatematikatagadomitiwaji codaa me gadiigaxinitiniwace nigijjo matecigi, mawanitiwage, codaa minoataga ligelatedi gonioxoadipi. <sup>21</sup>Eliodi me jiladee nigijjo judeutedi ijaagijo ane daga judeutedi me leeditibige modinilaatece libeyacegeco, odaagodopitalo Aneotedogoji, codaa monakato Goniotagodi Jesus Cristo.

<sup>22</sup>Natigide ejigo nigotaga Jerusalém leegodi nikeetiwa Liwigo Aneotedogoji me leeditibige mejigo. Odaa ajowoogodi migica anigida ane ininyaagi. <sup>23</sup>Pida бага jowoogodi minoatawece nigotadi anejigotece Aneotedogoji Liwigo idioka limeditibece me nikeetiwa metidixotiwece niwilogonagaxi, codaa ijoo jixomagateedijoo owidi yawikodico. <sup>24</sup>Pida agica daga jao niwaló nigina midioaka limedi me idewiga, pida enegegi jao niwaló nigina me jakadi me jao nigijjo ane niigetediwa Goniotagodi Jesus me jao, codaa jema me jigodi ane ibakedi. Ibakedi ane najigotediwa Goniotagodi nigina me jelogoditedibece nibodicetedi ane anoditece Aneotedogoji meliodi meletedogodomi.

<sup>25</sup>Nigida mee jowoogodi agaleegica nigina akaamitiwaji analee yakadi me idadi, nigina akaamitiwaji ananajipaatiwa nigijjo minaagejo gadiwigotigi me jatematitibece anodaagee Aneotedogoji me yema me iige laalegenali oko. <sup>26</sup>Natigide jema mejitagawatiwaji me digica ane yakadi me dinanimagatiwa nige aniatagigi, igaataga akaamitawecetiwaji jagajipaatalo yotaga. <sup>27</sup>Leegodi agica ane jagaditagadomitiwaji, pida jatematitedagawa ijoatawece nigijjo Aneotedogoji ane yema meote mowoogotitiwaji. <sup>28</sup>Adinowetitiwaji, codaa adowetiteloco iditawece loiigi Goniotagodi ane liciagi nigina lapo waxacocoli, Liwigo Aneotedogoji anoyajigotagawatiwaji jiginaa gadaxawani madowetiteloco. Enice micoataga nigina nowienogododi waxacocoli modoweditelogo niwaxacocoli codaa moniodege, odaa akaamitiwaji jigida leeditibige me eni madowetiteloco loiigi Aneotedogoji ane ibake lawodi epaa Lionigi me dinoojetetediogi. <sup>29</sup>Jowoogodi nigidiaagidi nige gadalatitiwaji, nigina oko ane liciagi diwilecogoni ane diojo icota monota gadiwigotigitiwaji. Odaa agetigadiwikodeni anakaamitiwaji micataga nigina lapo waxacocoli. <sup>30</sup>icota noko midi nigina akaamitiwaji oditece niwitakeco, odaa jigina anoninaaletiniwace nigina anoditece Goniotagodi owotibige migotibeci mijotaga. <sup>31</sup>Pida adinowetitiwaji, codaa analakitibigetiwaji

me jaote itoatadigida nicaagape me digicata daga jika me gadiigaxinitiniwace akaamitawece, noko codaa menoale, codaa elioditibece me jinoe.

<sup>32</sup>Odaa natigide ja gadajicitalo Aneotedogoji me doweditedagalocotiwaji. Odaa nigijoa notaga anoditece anodaagee Aneotedogoji meliodi meletedagadomi akaamitawecetiwaji, nigidiwa notaga odoweditagaloco. Nigidiwa notaga yakadi mowo me ili gatiwagatakanegegi, codaa me yakadi me yajigotagawatiwaji inoatawece anopootibige me gadewikitema iniokiniwateda Aneotedogoji akaamitiwaji ijaagijo eledi Aneotedogoji ane iomagaditedicoace mepoka nepiliditeda. <sup>33</sup>Agica oko ane idocetema nibeexo oolo, domigetaga beexo, otegexaagaga lowoodagagi. <sup>34</sup>Akamagakaamitiwaji owoogoti meliodi me jiba me jakadi inoatawece ane jopotibige me idewiga, ee ijaagijoa yokaagetedipi. <sup>35</sup>Nigijoa me jao okanicodaagica nibakedi, jikeetagawatiwaji nigina me jibaaga jigidaa gonimawenegegi me jakataga me jaxawanaga nigijoa aninoa lemagamatico. Analakitibigetiawaji nigijoa lotaga Goniotagodi Jesus negee, ‘Nigina ane yedia eledi oko, joaniginiaagini anida linikegi catedi nigina ane dibatege nogeedita eledi oko.’”

<sup>36</sup>Nigijoa Paulo naga nigotini me dotaga, odaa ja yamagatedini lokotidi, codaa ijotawece nigijoa oko aagaga oyamagatedini lokotidi, odaa jigidiaagi me yotaganee Aneotedogoji. <sup>37</sup>Iditawece noenagateloco, oibedotece codaa me onapicogo Paulo. <sup>38</sup>Eliodi magecagalodipi leegodi meetiogi me dagadiaagoyakadi monadi. Odaa jogoilaajoticogi negepaa maditaga nagajo etogo-nelegi.

### Paulo igo nigotaga Jerusalém

**21** <sup>1</sup>Naga jibodenaga nigijoa lapo ijo laxokodipi lacilodi loigi Goniotagodi, naga jaxotagatinigi nagajo etogo-nelegi, odaa ja iniwiajeega. Odaa ja godegenagaticogi minitaga lidelogo ane liboonagadi Cós. Negeledi noko odaa jejegogota nigotaga Rodes, naga jalataga, odaa jiginigaga nigotaga Pátara. <sup>2</sup>Jigidiaagi naga jibagata ajo eledi etogo-nelegi anopiticogi nipodigi ane liboonagadi Fenícia digoida niigotedi Síria. Igaanaga jaxotagatinigi ajo etogo-nelegi, odaa ja gododitice. <sup>3</sup>Nigijoa me iniwiajeega inoxiwicaga lidelogo-nelegi Chipre. Codaa joleegata nigijoa lidelogo me janagagatece gonimagijegi, odaa idapaga jiigaticogi negepaajogota nipodigi Síria. Igaanejegogota nigotaga Tiro, odaa ja jaxotagatice nagajo etogo-nelegi, leegodi moyexagatedice ijoatawece nigijoa loyagaka nagajo etogo-nelegi. <sup>4</sup>Manitaga nagani nigotaga ijo jakapagatege onatecigijoa anoditece Goniotagodi, odaa jigidiaagejonagate miditaga seete nokododi. Odaa Liwigo Aneotedogoji yajigotiogi lowoogotakanegegi mowo libodigi Paulo me degele migo nigotaga Jerusalém. <sup>5</sup>Pida nigicota nigijoa noko me noditice nagajo etogo-nelegi nagani nigotaga, odaa ja gododitice, ja iniwiajeegatace. Odaa jegetigodilaajo negepaa maditaga nagajo etogo-nelegi. Ijotawece igotibeci, inoa lodawadi codaa me nigaanigipawaanigi eledi igotibeci negepaa we nigotaga. Nejegoticogi liniogotibece akiidi-eliodi, naga jamakajogotedini godokotidi, odaa ja

jotaganegenaga Aneotedogoji. <sup>6</sup>Naga inibodenagatiniwace, odaa ja jibagataca nagajo etogo-nelegi, odaa nigijo gonioxoadipi jogopiticogi inoa ligelatedi.

<sup>7</sup>Egidaagee me iniwiajeegatinigi nagajo etogo-nelegi, odaa ja jalataga nigotaga Tiro, odaa jejegogota nigotaga Ptolemaida. Jigidiaagi me godecoaditece gonioxoadipi codaa idiaagejonaga miditaga onijoteci noko. <sup>8</sup>Igaanegeledi noko naga gododitece, odaa jejegogota nigotaga Cesaréia. Odaa jiginiga ligeladi Filipe, odaa jigidiaagejonaga minitaga. Filipe yelogoditedibece nibodicetedi anele anoditece Jesus, eledi awatege nigijoa seete goneleegiwadi Goniotagodi loiigi anoixipeticoace digoida nigotaga Jerusalém. <sup>9</sup>Filipe idiwa cwaatolo lionaga awicijipi anelee digicata me nadonaga. Odaa nigidi lionigipi ida me lixakedi moyelogoditedibece Aneotedogoji lowooko. <sup>10</sup>Igaanigijoa ixomagatedijo nokododi mejonagate Filipe ligeladi, odaa jigijo goneleegiwa anenotogowa icogoticogi nipodigi Judéia, nigijo goneleegiwa liboonagadi Ágabo. Nigijo goneleegiwa inaagina ane lixakedi me yelogoditedibece Aneotedogoji lowooko. <sup>11</sup>Igaanegenotogowa, ja dibata ijo Paulo nigoenagadi. Odaa ja igoetece nigijo goenagadi libaagatedi codaa me logonaka, odaa jegee, “Aneotedogoji Liwigo nikeetiwa nigidiwa judeutedi digoida nigotaga Jerusalém moigoetini nigini ane nebi nigida goenagadi. Odaa jogoyajigotiogi nigijo ane daga judeutedi.”

<sup>12</sup>Igaanaga jajipaagatalo nigijoa Ágabo lotaga, odaa okotawece ja domaga inoliigatini Paulo, eliodi me jipokagata me digigo Jerusalém. <sup>13</sup>Pida Paulo naga godigidi, meetogowa, “Igaameni ina manoenitiwaji? Jagawiitiwaji me jilee yaalegena. Jinaganoenitibecetiwaji, igaataga ja idigo metidigoetini codaa ja idigo metideloadi digoida nigotaga Jerusalém leegodi Liboonagadi Goniotagodi Jesus.” <sup>14</sup>Igaanaga jinataga me daga jakataga me jiigaga lowoogo, odaa ja jikanaga, odaa mejinagata, “Jemaanaga Goniotagodi meote nigica anepaa yemaa meote.”

<sup>15</sup>Nigidiaagidi nigijo midiaagejonaga onatecigidiwa nokododi manitaga Cesaréia, odaa ja joenagatedini godowoodi, jiginiga nigotaga Jerusalém. <sup>16</sup>Codaa ijo anetigodilaajo nigijo anoyiwagadi Jesus nigeladimigipitigi nigotaga Cesaréia. Etigodadeegiticogi negepaa minitaga ijo diimigi ane godotokagadi. Nigijo ane nebi nigini diimigi liboonagadi Menasom. Nigini goneleegiwa elatibige lidelogo-nelegi Chipre, ja jotigide mini me diotece Goniotagodi. <sup>17</sup>Igaanaga ejogoticogi nigotaga Jerusalém, nigijo gonioxoadipi eliodi me ninitibigiwaji nigijo nogodibatogogi.

### Paulo yotaganege Tiago

<sup>18</sup>Negeledi noko Paulo ja godixigagawa igo dakapetege Tiago. Idiaagi ijotawece nigijo laxokodipi lacilodi lapo loiigi Goniotagodi yatecogo. <sup>19</sup>Odaa Paulo naga nicetiniwace, odaa ja yatematitioi ijoatawece loenataka Aneotedogoji miditaga nigijo ane daga judeutedi nigijo naga imonyatedicogi Paulo midiaa libakadi. <sup>20</sup>Nogowajipatalo nigijoa lotaga Paulo, odaa jogodogetetibigimece Aneotedogoji. Codaa modita, “Gonioxoa, akamagakaami



anati mowidi miilitedi judeutedi baanogonakato Goniotagodi. Codaa eliodi moyemaa moyiwagadi lajoinaganegeco Moisés. <sup>21</sup>Codaa odibodicetibige maniigaxinitiniwace judeutedi ane ligeladi miditaga ane daga judeutedi mone eni me dagadiaa leeditibige moyotete lajoinaganegeco Moisés. Eledi odibodicetibige maniigaxinitiniwace nigijo judeutedi me dogoyakagidi nigaanigawaanigi ane godakatigi, codaa me dagadiaagodioteci eletidi lakataga godoiigi judeutedi. <sup>22</sup>Ajawienatakanaga nigina judeutedi aninatigi digoina anonakato Goniotagodi icota me nibodicaga naganoo, odaa ja dinateogotee. Odaa ida moko, amiini ica anejinaga? <sup>23</sup>Natigide awii nigida anejinagatagawa. Etinoa cwaatolo goneleegiwadi ane gonioxoadipi anowo ligegitege Aneotedogoji modiniomagaditema, ane godakatigi. <sup>24</sup>Odaa emii mijotaga, adinawanagatitege adiniwileci, odaagedianiteta laakataka amaleegagoyakadi moyapitagadi lacilo, amanagawini inatawece oko oyowoogodi me degewi me iigaxini nigina oko me dagadiaagodioteci godakataga. Pida amaleegaga onadi maleegeemiteetigi lajoinaganegeco Moisés. <sup>25</sup>Pida nigijo ane daga judeutedi anonakato Goniotagodi, jiwakateenagatibige godidie notaganagaxi me jelogotagatiogi ane godowoogo. Jajoinagatece me dogoyeligo niweenigi niginaeledi oko anoilokotajeta niwigo, migetaga lawodi eijeegagi, otegexaagaga okanicodaagica eijeegagi anoigiwoola. Eleditace me daga noomatewa ane daga lodawa.”

<sup>26</sup>Igaanegeledi noko Paulo jigigo lixigagawepodi nigijoa cwaatolo goneleegiwadi, odaa jagawatiogi nigidaa dinanatigi me diniwilegitibigiwaji, ane lakatigi judeutedi. Nigidiaagidi odaa ja dakatiwece Aneotedogoji ligeladi mowo libodigi nigijo ane nibaagatigi nigini diimigi, oyelogoditiogi nigica noko nige nigomaga me diniwilegitibigiwaji. Igaataga nigijo noko oniniticibeci yakadi meo lokotajegitalo Aneotedogoji, liboonigi ane iigeta lajoinaganegeco Moisés.

### **Odibata Paulo minitaga Aneotedogoji ligeladi**

<sup>27</sup>Igaanaga ixomagatedijo nigijoa seete nokododi ane yadeegi me diniwilegitibigiwaji, odaa onatecigijoa icoa judeutedi ane icogoticogi nipodigi Ásia jogonadi Paulo minitaga ligeladi Aneotedogoji. Odaa jogoyetigi lacilo nigidi noiigi modakapetege Paulo, odaa jogodibata. <sup>28</sup>Odaa ja napaawagateloco, modi, “Akaami gonioxoadipi israelitatedi, godaxawanegegi! Nigida goneleegiwa joanigidaa diigaxinagatece inoatawece nipodaga me nakapetegipi godoiigi Israel, codaa modakapagateetege lajoinaganegeco Moisés codaa me ligeladi Aneotedogoji. Odaa natigide ja nadeegitiobece catiwedi Aneotedogoji ligeladi nigina ane daga judeutedi ane daga domaga yakadi me nakatiobece, odaa nigida anee jogonapioyagadi Aneotedogoji ligeladi.” <sup>29</sup>Modi nigijoa lotaga leegodi monadi Paulo manitaga nagani nigotaga lixigagawa Trófimo anelatibige nigotaga Éfeso. Odaa jogodiletibige daga yadeegiticogi Trófimo catiwedi ligeladi Aneotedogoji.

<sup>30</sup>Odaa nibodigitigi nigijo ane dibatotiogi jigilaagiteloco anitawece nigotaga, odaa ja waledi nigijo oko. Nogodibata Paulo, odaa jogoixigiticogi we Aneotedogoji

ligeladi, odaa nigijoa nowienogododi Aneotedogoji ligeladi jagonibatootece epoaco. <sup>31</sup>Nigijjo naga domogoyeloadi Paulo, nigijjo lacilo iodagawadi romaanotedi ja wajipatiogi ica me dayaagetiogi anitawece nigotaga Jerusalém. <sup>32</sup>Odaa agica ane yopagadi ja lixigagawepodi ijoo jajeentexedi ijaagijoo iodagawadi, odaa ja walokoditiogi nigijjo noiigi-nelegi. Odaa nigijjo noiigi nogonaditege nigijjo goloneegi ijaagijoo iodagawadi, odaa jogoika monaxacogotibige Paulo. <sup>33</sup>Nigicotio nigijjo goloneegi, odaa ja niwilo Paulo, ja iige nigijjo iodagawadi moigoetece Paulo iti wataale galeenatedi gapilecege. Nigidiaagidi ja nigetiniwace nigijjo noiigi, meetiogi, “Amiini ica goneleegiwa? Codaa amiida ica loenatagi ane beyagi?” <sup>34</sup>Idi ica oko nigidi lapo-nelegi napaawagateloco ida ica ligegi, idiaageledi jegeledi ligegi me napaawagateloco. Eliodi ica me dayaagetiogi negepaagicota nigijjo goloneegi me dagadiaa yowoogodi nigica anewi. Odaa ja iige nigijjo iodagawadi moyadeegiticogi Paulo minitaga ligeladi iodagawadi ane dotete. <sup>35</sup>Odaa jogotota negepaa midataga liwekaladi anigo mida lapoagi nigini diimigi ane dotete. Nigijjo iodagawadi odowediteloco Paulo moyoyagaditijo, leegodi nigijjo noiigi-nelegi me domogodoletibige monaxacogotibige. <sup>36</sup>Odaa nigijjo noiigi-nelegi jogoigaalatece nigijjo iodagawadi, napaawagateloco, modi, “Eloati nigijjo goneleegiwa!”

### Paulo notaganeggetiniwace ica noiigi-nelegi

<sup>37</sup>Odaa nigijjo iodagawadi naga domaga oixotio Paulo catiwedi nigijjo ligeladi ane dotete, odaa jegeeta nigijjo goloneegi, “Domigetaga yakadi me gadotaganegeni?” Odaa nigijjo goloneegi ja ige, meeta, “Ida makaami otaganitigi ioladi greego? <sup>38</sup>Ida makaami, anagakamagakaami ijo goneleegiwa egípcio ane yadeegi ijoo cwaatolo miili oko anodiotibeci miditaga nipodigi ane yadilo ane digicata nigeladimigipi? Ijotawece nibo likanaganagatedi domogodoletibige metigodidelege anoko romaanotedi.” <sup>39</sup>Pida Paulo meeta, “Ee begee judeu, yanikadi nigotaga Tarso, nigotaga ane dagaxa me gonege digoida nipodigi Cilícia. Jipokotagawa madikani me inotaganeggetiniwace nigidi noiigi-nelegi.”

<sup>40</sup>Nigijjo goloneegi ja ika Paulo me dotaga. Naga dabiditini midataga nigijjo liwekaladi diimigi, odaa ja datikata libaagadi dipokotiogi nigijjo noiigi-nelegi me notokotiniwace. Igaanaga notokotiniwace, odaa ja notaganeggetiniwace Paulo yatitiogi ioladi hebraico.

### Paulo notaganeggetiniwace nigijjo noiigi-nelegi

**22** <sup>1</sup>Odaa Paulo jegeetiogi nigijjo noiigi-nelegi, “Akaami iniotagodepodi me inioxoadipi, ajipaatiwaji ane igegitiogi nigijjo anodakapetigi me notaganagateloco.” <sup>2</sup>Nigijjo noiigi nogowajipata Paulo me dotagatiogi ioladi hebraico, odaa jegepaanaga notokotiniwace.

Odaa jegee Paulo, <sup>3</sup>“Ee judeu. Yanikadi nigotaga Tarso aneiteloco nipodigi Cilícia. Pida iliidagadi digoina nigotaga Jerusalém, codaa iniigaxinogodi Gamaliel. Gamaliel eliodi me idiigaxitece lajoinaganegeco codaa ane lakataga

jotigide godaamipi. Eliodi me joletibige me jao ane yemaa Aneotedogoji, digo makaamitagatiwaji, akaamitawece anoletibige mawii nigina noko. <sup>4</sup>Ee ijo me jiatetibece nigijo anodiotete liigaxinaganegeco Jesus. Iniwilotiniwace goneleegiwadi codaa me iwaalepodi, odaa ja jokoletiwace niwilogonagaxi. <sup>5</sup>Nigijo lacilo-sacerdotitedi ijaagijoa laxokodi godacilodi yakadi moditagawatiwaji mejitece anewi. Onajigotediwa notaganagaxiidi me yodoeje anoiwakateetigi gonioxoadipi judeutedi metidikeetigi digoida nigotaga Damasco. Odaa jegejigo nigotaga Damasco me domaga iniwilotiniwace nigijo anodiotete liigaxinaganegeco Jesus codaa me domaga inigoetiniwace jatitioigi galeenatedi, odaa domaga jinadeegiticogi nigotaga Jerusalém moiloikatiditibigiwaji.”

### **Goniotagodi dinikeeteta Paulo**

*(Atos 9.1-19; 26.12-18)*

<sup>6</sup>Odaa Paulo egidaagee me dotaga, meetiogi, “Nigijo naga nipegi me yaxogonoko, ja jipegita nigotaga Damasco. Codaagidata naga jinadi ijo natalaga ane dagaxa me yoniciwadi me datale icogotibigimece ditibigimedi. Odaa nigijo natalaga ja naloteloco nigijo anejotice. <sup>7</sup>Odaa ja janitinigi iigo, codaa jajipata ijo ane dotaga, meetiwa, ‘Saulo, Saulo, igaamee ina madiatenitibece?’ <sup>8</sup>Naga ininigodi, mejita, ‘Amakaami, Iniotagodi?’ Odaa jegeetiwa, ‘Ee Jesus, anelatibige nigotaga Nazaré, Nigijoa ane iatenitedibece.’ <sup>9</sup>Odaa nigijoa goneleegiwadi ixigagawepodi me iniwaje onadi nigijo natalaga, odaa eliodi me dootibigiwaji, pida agowajipatalo nigijoa lotaga Nigijoa ane idotaganege. <sup>10</sup>Odaa ja jige, mejita, ‘Iniotagodi, amiini ica ane leeditibige me jao?’ Odaa Goniotagodi jegeetediwa, ‘Adabititini, odaagakaatiwece nigotaga Damasco. Odaa jigidiaagi nigoditagawa inoatawece Aneotedogoji ane yemaa mawiite.’ <sup>11</sup>Odaa agalee jakadi me joletibece leegodi nigijo natalaga meo me dagadiaa jatetibece. Odaa nigijoa yokaagetedi nenaga onibatigi, odaa jegetidadeegiticogi catiwedi nigotaga Damasco.

<sup>12</sup>Digoida nigotaga Damasco ini ijo goneleegiwa ane liboonagadi Ananias, anidioka limedi meyiwaagadi ijoatawece lajoinaganegeco Moisés, codaa me iwenigide Aneotedogoji. Iditawece judeutedi digoida nigotaga Damasco ele modotagatibige nigijo goneleegiwa. <sup>13</sup>Odaa Ananias jegenagi dabiditi meetaga, meetiwa, ‘Inioxoa Saulo, atenitacibece!’ Odaa agica daga leegi ajaagajo lakata, ja jatetacibece, odaa ja jiwita Ananias. <sup>14</sup>Odaa jegeetiwa, ‘Aneotedogoji, Noenogodi godaamipi gadiomagatitedice eotedibige mowoogoti ane yemaa, eledi eotedibige manati nigijoa Liotagi ane igenaga, codaa majipaatalo nigijoa Liotagi me gadotaganegeni. <sup>15</sup>Odaa jagakaami nakataganaga menitioigi inatawece oko nigijoa ananati codaa majipaatalo. <sup>16</sup>Odaa natigide, jinagaleegadinopagati. Onitibige, odaa adinilegeni! Codaa ipokitalo Goniotagodi me gadaxawani me gadiwilecitetema gabeyacegeco.’

<sup>17</sup>Odaa ja idopitijo manitaga nigotaga Jerusalém. Odaa ijo noko idiaagejo Aneotedogoji ligeladi me jotaganege, odaa jigijo ijo yakatigi me micataga daga igeedi. <sup>18</sup>Jinadi Goniotagodi, odaa meetediwa, ‘Adinageni manotitice nagani

nigotaga, igaataga nigina nigeladimigipitigi agodibatege gadotaga nigina me enitici.’<sup>19</sup>Odaa ja ininigodi, mejitalo, Iniotagodi, idiaagidi oyowoogodi me jakatiwece niginoa liiakanaagaxiidi judeutedi, eliodi me inaxacogotiniwace codaa me jokoletiwace niwilogonagaxi nigijo anetigadinakatonni. <sup>20</sup>Nigijo nogonadoogodi lawodi Estêvão, nigijo ane gadadiwagati codaa me eetagadici, odaa nogoyeloadi, ee eledi idiaagejo codaa me jemaatibige nigijo anodigota Estêvão. Nigijo noko idiaagejo jowie nicaapatedi nigijoo aijekaga idiaagidi maleegonigidatice Estêvão moyeloadi.’<sup>21</sup>Odaa jegeetediwa Goniotagodi, ‘Pida emii, gadimonyaatocogi ditigedi. Gadieniticogi memii miditaga noiigi ane daga judeutedi.’”

### Nigijo nigoloneegi romaanotedi yotaganege Paulo

<sup>22</sup>Nigijo noiigi-nelegi owajipata Paulo negepaagicota me yalagata me Goniotagodi imonyatediogi nigijo ane daga judeutedi. Odaa ja napaawagatelo, modi, “Ageniti nigida goneleegiwa! Eloati! Agalee yakadi daga yewiga!”<sup>23</sup>Napaawagatelo oiticogo inoa nicaapatedi, codaa olojietibigimece ditibigimedi. <sup>24</sup>Odaa nigijo goloneegi ja iige iodagawadi monogatice Paulo, odaagoixotiwece catiwedi nigijo diimigi ane dotete, odaa ja diigenatakata monalaketibige domegeotibige Paulo me yelogodi ane



(Atos 22.24)

leegodi nigijoa judeutedi me napaawagateloco modakapetege. <sup>25</sup>Odaa egidaa diiticogi nigijoa iodagawadi moigoetini Paulo monalaketi bige, odaa Paulo jegeeta nigijo jajeentegi anida me ipegitege, “Lakapetege lajoinaganegeco romaanotedi monalaketi bige nigina oko anida aneetege noiigi romaanotedi, maleedigica me dinige minitaga goniwinogodi me iwi anigota.”

<sup>26</sup>Odaa nigijo jajeentegi naga wajipata nigijo Paulo ligegi, jigigo minitaga nigijo goloneegi, odaa jegeeta, “Amina daganidakita nigida gadoenatagi, igaataga nigida goneleegiwa ida aneetege noiigi romaanotedi.” <sup>27</sup>Odaa nigijo goloneegi jigigo midataga Paulo, odaa ja ige, meeta, “Jemaa manelogotitiwa! Ida makaami ida anenitege godoiigi romaanotedi?” Odaa Paulo ja ninigodi, meeta, “Ee ida anejitege noiigi romaanotedi.” <sup>28</sup>Odaa nigijo goloneegi jegeeta Paulo, “Ee ida anejitege noiigi romaanotedi igaataga owidi dinyeelo ane jediatece nigijoa lacilodi romaanotedi.” Odaa Paulo jegeeta, “Ee ida anejitege noiigi romaanotedi leegodi yanikadi nigotaga romaanexe.” <sup>29</sup>Odaa agica anoyopagadi nigijoa iodagawadi ane domogonalaketi bige Paulo ja dinogaticoace. Odaa nigijo goloneegi ja doi leegodi me diigenatakata moigoetini codaa me domogonalaketi bige nigijo anida aneetege noiigi romaanotedi.

### Paulo dinige lodoe nigijoa seteenta lacilodi judeutedi

<sup>30</sup>Odaa nigijo goloneegi ja doletibige me yowoogodi nigica anewi me leegodi nigijoa judeutedi modoletibige me nilaagedi Paulo. Igaanegeledi noko ja iige me yatecogo nigijo anoiige sacerdotitidi ijaagijoa seteenta laxokodi goneleegiwadi lacilodi judeutedi. Odaa ja diigenatakata monoga nigijoa Paulo liwixetedi galeenatedi, odaa ja diigenatakata moyadeegi me dinige lodoe nigijoa lacilodi.

**23** <sup>1</sup>Odaa Paulo watacotece me iwitiogi nigijoa seteenta lacilodi judeutedi, odaa jegeetiogi, “Inioxadipi, idioka limedi me jao ane yemaa Aneotedogoji, codaa agica ane jeemitetece daga iwaagadi catiwedi yaalegena.” <sup>2</sup>Nigijo negeo Paulo nigijo ligegi, odaa Ananias, nigijo lacilo-sacerdotitidi, ja notaganetetiniwace nigijoa goneleegiwadi anodipegitege Paulo, odaa ja iige moyabaketiwece nioladi Paulo. <sup>3</sup>Odaa Paulo jegeeta Ananias, “Aneotedogoji icota me gadabakeni, leegodi mokawii makaami ele. Etakaami digoina mawini anemiitiwa, domigica yoenatagi ane dakapetege gonajoinaganegeco? Pida nigida makaami jagawii ane dakapetege gonajoinaganegeco nigina me iigenatakanitiwa metidaxacogotigi.”

<sup>4</sup>Odaa nigijoa goneleegiwadi anodipegitege Paulo modita, “Nigida makaami ja beyagi motaganegeni lacilo-sacerdotitidi.” <sup>5</sup>Naga ninigodi Paulo, meetiogi, “Inioxadipi, ajowoogodi nigini goneleegiwa me lacilo-sacerdotitidi. Igaataga jowoogodi Aneotedogoji lotaganagaxi me godajoi, ‘Jinaga beyagi motaganitibige lacilo gadoiigi.’”

<sup>6</sup>Pida Paulo naga nadi midi nigidiwa lacilodi judeutedi, saduceutedi, idegeledi бага fariseutedi, odaa ja dapaawe me dotaga, meetiogi, “Inioxadipi, nigida me ee, ee fariseu, ee lionigi fariseutedi. Nigida

makaamitiwaji awini anemiitiwa nigina noko leegodi me inibeotege nigica noko Aneotedogoji nigeote émagaga me newigatace.”

<sup>7</sup>Nigijjo Paulo negeote nigijjoa lotaga, odaa nigijjoa fariseutedi ijaagijjoa saduceutedi ja dinotigimadetiwage, codaa nigijjoa seteenta lacilodi jagaga dawalace. <sup>8</sup>Leegodi nigijjoa saduceutedi moditibece ica Aneotedogoji me degeote émagaga me newigatace, codaa agoyiwagadi minoa aanjotedi codaa me niwicidi. Pida nigijjoa fariseutedi bogoyiwagadi minoa. <sup>9</sup>Odaa jegepaanaga dawice me napaawagateloce, odaa nigijjoa niigaxinaganadi ane fariseutedi ja dabiditiniwace, odaa ja dawice modinotigimadetege, modi, “Agica ane jakataga libatiigi nigida goneleegiwa. Ate jowoogotaga, pida ijoategewi mica aanjo domige niwigo ane yotaganega.”

<sup>10</sup>Odaa ja domagaleedi ina midiaa dilokotiwage, odaa nigijjo goloneegi ja doitiibige digica anodigota Paulo. Odaa ja iige nigijjoa niidagawadi moibake loniciwaga monogatice Paulo me ide i liwigotigi nigijjo noiigi. Odaa jogoyadeegiticogi minitaga nigijjo iodagawadi ligeladi ane dotete. <sup>11</sup>Nigijjo enoale Goniotagodi ja dinikeeteta Paulo, idiaa dabidite liwai, odaa jegeeteta, “Paulo, eloodagateeni gadaalegena. Igaataga leeditibige me enitici digoina nigotaga Jerusalém. Codaa nigidiaagidi leeditibige me enitici digoida nigotaga Roma.”

### Icoa judeutedi dinilakidetiwage moyeloadi Paulo

<sup>12</sup>Igaanaga yelogotibige, onatecigijjoa ijoo judeutedi ja yatecogo me dinilakidetiwage lowoogo. Codaa owo ligegitege Aneotedogoji me daga niidaga otegeaagagicata anowacipeta nigepaagicota makati moyeloadi Paulo. <sup>13</sup>Onidiwa catedi me cwareenta goneleegiwadi ane dinilakidetiwage. <sup>14</sup>Odaa jigigotibeci midiwataga nigijjo anoiige sacerdotitidi ijaagijjoa lacilodi nigidi noiigi, moditio, “Nigida moko ja idinilakidenagatiwage codaa ja jaoga gogegitege Aneotedogoji me daga jiniodaga nigepaagicota me jakataga me jeloataga Paulo. <sup>15</sup>Odaa natigide, akaamitiwaji idiaagidi seteenta lacilodi yoiigi iwakateeni gagegi mipokita goloneegi me nadeegitace Paulo digoina makaamitaga. Enita goloneegi memaanitiwaji me yenikamaga majipaata nigicoa Paulo loenataka. Odaa idiaagejonaga inibeonagatege digoida naigi. Nige ixomagatijo Paulo, odaa ja jeloataga, maleedigicatibige digicotio.”

<sup>16</sup>Pida ijo lionigi nagajo niwaalo Paulo ja yowoogodi ane domogodigota Paulo moyeloadi. Odaa jigigo minitaga iodagawadi ligeladi ane dotete, odaa ja yatematita Paulo nigijjo ane leedi modigota. <sup>17</sup>Odaa Paulo jegenidita onijoteci nigijjoa jajeentexedi, odaa jegeeta, “Adeegita goloneegi nigida lioneeega. Igaataga ida latematigota.” <sup>18</sup>Odaa nigijjo jajeentegi ja yadeegi nigijjo lioneeega minitaga goloneegi, odaa jegee nigijjo jajeentegi, “Paulo, nigijjo niwilogojegi, eniditiwa, odaa ja nipokotiwa me jinadeegitagawa nigida lioneeega. Igaataga onida ica latematigotagawa.”

<sup>19</sup>Odaa nigijjo goloneegi ja dibatigi libaagadi nigijjo lioneeega, odaa ja ixipetice me ige, meeta, “Amiida ica gadatematigotiwa?” <sup>20</sup>Odaa nigijjo lioneeega jegee,

“Idiwa judeutedi ane dinilakidetiwage modipokotagawa madeegitacicogi Paulo lodoe nigijoa seteenta lacilodi judeutedi. Nigenagitibeci, odaa jonogokanice oyemaa me igenaga mowajipata nigica Paulo ane loenatagi. <sup>21</sup>Pida jinaga domaga aniwotitema nigida ane lipoketegi, igaataga idiwa catedi me cwareenta judeutedi dinagaditiniwace digoida naigi ane onibeotege Paulo me ixomagatijo. Nigidi owo ligegitege Aneotedogoji me daga niodaga otegexaagawa nacipaga nigepaagicota moyakadi moyeloadi Paulo. Nigidiwa goneleegiwadi ja nigomaga moyeloadi, odaa idokaanaga onibeotibigege magiti ane lipoketegi.”

<sup>22</sup>Odaa nigijo goloneegi jegeeta nigijo lioneege, “Jinaga domigica ane enita manatematiitiwa nigida ane lowoogo.” Odaa ja iige nigijo lioneege mopi.

### **Ijoa iodagawadi oyadeegiticogi Paulo digoida nigotaga Cesaréia**

<sup>23</sup>Odaa nigijo goloneegi jegeniditioigi itoataale jajeentexedi, odaa meetioigi, “Iomagatitedice iniwata-taalia iodagawadi ane ewaligi, seteenta iodagawadi ane icoogolatedaga, idiaa eletidi iniwata-taalia iodagawadi anoibake apocenigi me nidelaga, anenyagati migotibeci nigotaga Cesaréia. Leeditibige me noditicoaci nige noove lakata menoale. <sup>24</sup>Codaa eledi oenitema apolicaganadi Paulo menicoogolatedi, odaa gadeegiticogitiwaji madowetiteloco minitaga Félix, ane lacilo romaanotedi ane iige iditawece nipodigi Judéia.” <sup>25</sup>Odaa nigijo goloneegi jegeo lidie notaganagaxi anee,

<sup>26</sup>“Ee Cláudio Lísias.

Jiditibigagaji nagadi notaganagaxi, iniotagodi Félix, anakaami goneegi lacilo romaanotedi digoida nigotaga Cesaréia. Eliodi me idecoaditibigagaji.

<sup>27</sup>Judeutedi odibata nigini goneleegiwa domogoyemaa moyeloadi.

Odaa naga jajipatibece mida aneetege godoiigi romaanotedi, odaa ja jadeegi iodagawadi me inogatice me idei libaagadi nigidi noiigi.

<sup>28</sup>Odaa nigidiaagidi ja domaga jemaa me jowoogodi nigica ane leegodi menegegi odakapetege. Joanigidaa leegodi me jadeegita lodoe nigijoa seteenta laxokodi goneleegiwadi lacilodi nigidi noiigi judeutedi.

<sup>29</sup>Odaa ja jowoogodi me digicata loenatagi ane beyagi aneo me leeditibige me jiigenatakata moyeloadi, domigetaga jokolenagatiwece niwilogonagaxi. Domogodoletibige me nilaagedi leegodi modi ica me daga dioteci inoa ane lakataga nigidi noiigi. <sup>30</sup>Pida ijo oko aneo yeemidi me dinilakidetiwage odoletibige moyeloadi. Odaa ja yowoogo me digicata ane jopagadi me jimonyatagawa. Codaa jagaga jimonya nigijo anodoletibige me nilaagedi nigijo goneleegiwa migotibeci gadodoe moyelogodi ica ane leegodi modakapetege.

Odaa jigidokida.”

<sup>31</sup>Odaa nigijoa iodagawadi jogowo nigijo ane liigenatakaneegegi nigijo goloneegi. Odaa jogoyadeegi Paulo nigijo enoale digoida nigotaga Antipátride.

<sup>32</sup>Negeledi noko nigijoa iodagawadi anokewaligi ja dopitijo minitaga ligeladi ane

dotete digoida nigotaga Jerusalém, odaa jogoika nigijoa apolicaganagademaga midapaga diiticogi moilaajo Paulo. <sup>33</sup>Igaanogototicogi nigotaga Cesaréia, odaa jogoyajigota nagajo notaganagaxi nigijo lacilo romaanotedi, odaa jagagoikée Paulo. <sup>34</sup>Igaanaga yalomegeteloco nagajo notaganagaxi, odaa nigijo lacilo romaanotedi ja ige Paulo eotibige me yowoogodi nigica nipodigi anelatibige. Odaa ja yowoogodi Paulo melatibige nipodigi Cilícia. <sup>35</sup>Odaa jegeeta Paulo, “Amina nigenotibeci nigica anakaami nilaagedi, odaa jema me jajipatagawa nigica anemaani me gagegi.” Odaa ja iige niodagawadi moyowie Paulo minitaga diimigi-nelegi, Herodes ligeladi, nigijo lacilo-nelegi judeutedi nigidi nipodigi.

### Icoa judeutedi odoletibige me nilaagedi Paulo

**24** <sup>1</sup>Igaanaga ixomagatedijo ciinco nokododi, odaa Ananias, nigijo lacilo-sacerdotiedi, jigigo nigotaga Cesaréia. Igotibeci me lixigagawepodi onatecigijoa nigijoa laxokodipi lacilodi judeutedi ijaagijo notaganegecajo ane liboonagadi Tértulo. Odaa jigigotibeci lodoe Félix, nigijo lacilo romaanotedi, odoletibige me nilaagedi Paulo. <sup>2</sup>Igaanogoyoodi Paulo lodoe nigijoa lacilodi, odaa Tértulo jigidaa dinanatigi me dotaga me dakapetege Paulo, odaa jegee, “Iniotagodi Félix, leegodi makaami godacilo aneliodi gadixakedi, ja leegi agica gaantigijo ane godidelege, codaa owidi gadoenataka aneletema godoiigi judeutedi. <sup>3</sup>Iniotagodeegatagawa, anakaami godacilo, anakaami romaano, ane dagaxa mele. Iniotagodeegatagawa leegodi nigijo anidioka limedi mawiite anawiitogodomi inatawece nigina nipodigi. <sup>4</sup>Pida ajema degenegegi gadigiwocitice leegodi dogowidi yotaga. Enice jipokotagawa mawii makaami eletedogodomi, enice ajipaata ane jemaanaga me gogegi. Ejitece onatecigino a yotaga. <sup>5</sup>Jowoogotaga nigini goneleegiwa me nigina goneleegiwa ane doide. Inoatawece nipodaga anigotece, eo lacilo nigino judeutedi mowo ane degele, ibatooogoditigi, codaa lacilo nigijo lapo ane liboonagadi ‘nazareenotedi’. <sup>6</sup>Nigini goneleegiwa nake meo Aneotedogoji me dagadiaa iwiteta ligeladi me yapidi. Naga iniwilogojogo odaa ja domaga jemaanaga me jiwina nigica ane inigata anodaa liigenatakanegegi gonajoinaganegeco. <sup>7</sup>Pida Lísias, nigijo goloneegi, jegenagi ijaagijoa niodagawadi, odaa jogoibake loniciwaga me onogaticogi mokotaga. <sup>8</sup>Odaa Lísias ja niigeticogi me dinikee gadodoe nigijo anoyema me notaganaga modakapetege Paulo. Diandaga agee nigida goneleegiwa, odaa jogowoogoti mewi ijoatawece nigijoa anejinagatece ane leegodi me jakapagatege.” <sup>9</sup>Odaa nigijoa judeutedi anidi aagaga notaganaga, odaa oniwoditema nigijoa lotaga Tértulo.

<sup>10</sup>Odaa nigijo lacilo romaano ja datikata libaagadi eotibige Paulo me dotaga. Odaa Paulo jegee, “Iniotagodi, jowoogodi nogowidi nicaagape makaami niwinogodi godoiigi judeutedi. Odaa ja idinitibeci me jakadi me jigidi nigidi ane notaganaga modakapetigi digoina gadodoe. <sup>11</sup>Icota mowoogoti naga ixomagatedice onexaa dooze nokododi me jicogoticogi nigotaga Jerusalém me jogetetalo Aneotedogoji. <sup>12</sup>Nigijoa judeutedi agica degetidadi digica oko ane



idinotigimadetege minitaga Aneotedogoji ligeladi, otegexaagaga etidadi daga jao lacilo nigijjo oko mowo layaagegegi naga dibatotiogi minoataga niginoa liiakanagaxiidi, otegexaagaga ganigetaga digetigi eledi liwai nigotaga Jerusalém. <sup>13</sup>Odaa nigidiwa goneleegiwadi agoyakadi dogoikee migewi niginoa lotaga modakapetigi, pida nigidi domogodoletibige me ee nilaagedi. <sup>14</sup>Odaa natigide jatematitagawa mewi me jitece niginoa niigaxinaganegeco Naigi ane igenaga, nigijjoa niigaxinaganegeco anodita nigijjoa judeutedi me degewiteda. Odaa jigidaa me jogetetalo Aneotedogoji, Noenogodi jotigide godaamipi. Ejiwagadi inoatawece ane diniditelo lotaganagaxi Aneotedogoji anoditece gonajoinaganegeco, codaa ejiwagadi ijoatawece nigijjoa anoiditedini nigijjo anoyelogoditedibece lowooko Aneotedogoji nigijjo jotigide. <sup>15</sup>Idaageji digo miditaga monibeotege micota nigica noko Aneotedogoji nigeote me newigatace nigina ane igenagatibigiwaji inaagina ane daga igenagatibigiwaji. <sup>16</sup>Leegodi Aneotedogoji meote nigida anejita, odaa idioka limedi me idinoniciwagadi me digicata ane jeemitece catiwedi yaalegena ane beyagi lodoe Aneotedogoji codaa me nigina eledi oko.

<sup>17</sup>Jegeote owidi nicaagape me digicata daga idalita nigotaga Jerusalém. Nigidiaagidi jegejigo jadeegi dinyeelo me jaxawa nigijjoa madewetedi liwigotigi emaga yoiigi, codaa me jajigo ilokotajegitalo Aneotedogoji me iniotagodetalo. <sup>18</sup>Nigidiaagidi naga jao nigida yoenatagi, odaa nigijjoa judeutedi jogonotiwa minitaga Aneotedogoji ligeladi. Onatecigidiwa judeutedi onotiwa nigidiaagidi naga jigodi me jaote ijoatawece ane niigetedogowa gonajoinaganegeco me idinapitagataga. Agica degeliodi oko meetaga, otegexaagaga icata daga japaawetibece. <sup>19</sup>Pida ijoa onatecigijjoa judeutedi ane icogoticogi nipodigi Ásia eledi idiaagite. Enice leeditibige menagitibeci nige odinibootagawa moyelogodi ica ane leegodi modoletibige me ee nilaagedi. <sup>20</sup>Pida nige dogoyakadi menagitibeci, odaa niginoa goneleegiwadi baaniginaa jogoyakadi modi domige nogoikee ica me jaote okanicodaagica ane beyagi nigijjo naga idinibootiogi nigijjoa seteenta lacilodi godoiigi mepaagoiwi anodigotiwa. <sup>21</sup>Digawini ane jaote. Nigijjo midiaa idabidite lodoe nigijjoa seteenta lacilodi, dawice me jotağa, meji, ‘Nigina nokotiwaji awini anemiitiwa leegodi mejiwagadi Aneotedogoji micota meote me newigatace niginoa émagaga.’”

<sup>22</sup>Nigidiaagidi Félix ayemaa me yelogodi nigica ane lowoogotece Paulo, odaa ja neliwagaditini me yatecogo. Eliodi me yowoogoditece anodaageeteda niigaxinaganegeco anoditece Naigi ane igenaga. Odaa jegee, “Nigeno goloneegi Lísias, nigeji domige ilaagedi Paulo, ogoa domige ailaagedi.” <sup>23</sup>Félix iige ica jajeentegi ane nowienogodi Paulo mecogotace ikanawaanigitice micataga daaditaga niwilogojegi, codaa me ikatiobece niginoa lokaagetedipi Paulo modalita codaa moyadeegita ane yopotibige.

### **Paulo yotaganegé Félix aniaa lodawa ane liboonagadi Drusila**

<sup>24</sup>Igaanaga ixomagatedijo onatecigijjoa nokododi, odaa Félix jigigo miditaga aneite Paulo lixigagawa ajo lodawa ane liboonagadi Drusila, ane loiigi

judeutedi. Odaa ja dienagata Paulo menagi eetece anodaagee oko monakato Jesus Cristo. <sup>25</sup>Igaanaga yelogodi Paulo Aneotedogoji me yemaa nigina oko me igenagatibigiwaji, codaa me leeditibige me dinajacagaditema niginoa lidagataka ane beyagi, codaa Aneotedogoji me iwi anigote oko codaa me iloikatidi leegotedi niginoa libeyacegeco. Odaa Félix eliodi me dawigice, odaa jegee, “Natigide ja yakadi memii anetigadadani. Nigicatibece, odaa jiniditacagawa.” <sup>26</sup>Codaa domaga nibeotibigege Paulo daga yediatece dinyeelo liikoa me ikatice. Joanigidaa leegodi melioditibece menidita Paulo me dinotaganegetege.

<sup>27</sup>Igaanaga ixomagatedijo itoataale nicaagape, Pórcio Festo ja waxodi limedi Félix, odaa ja gela lacilo romaanotedi. Félix domaga yemaa meote me ninitibigiwaji nigijoa judeutedi, joanigidaa leegodi me daga ikatice Paulo me diniwilo.

### Icoa judeutedi odoletibige me nilaagedi Paulo lodoe Festo

**25** <sup>1</sup>Nigicoticogi Festo nigotaga Cesaréia, odaa ja iige nigidi nipodigi. Nigidiaagidi naga ixomagatedice itoatadigida nokododi, odaa ja noditicogi nigotaga Cesaréia, jigigo nigotaga Jerusalém. <sup>2</sup>Odaa nigijo anoiige sacerdotitedi ijaagijoa onatecigijoa lacilodi judeutedi jigigotibeci minitaga, oyotaganegetece Paulo me nilaagedi. <sup>3</sup>Odipokota Festo me nigiwatece me imonyaticogi Paulo nigotaga Jerusalém, igaataga me lowoogo moyeloadi Paulo digoida naigi. <sup>4</sup>Pida Festo naga ninigodi, meetiogi, “Paulo etini diniwilo digoida nigotaga Cesaréia, pida aidinopagadi, odaa ja jopitijo. <sup>5</sup>Iigeni migotibeci ixigagawepodi nigina akaamitiwaji anida nagatetigi migotibeci nilaagedi nigini goneleegiwa, codaa moyelogodi nigica ane beyagi loenatagi, amina nigica loenatagi.”

<sup>6</sup>Festo idiaagi oito ogoa domige deez nokododi digoida nigotaga Jerusalém, odaa nigidiaagidi jogopita nigotaga Cesaréia. Negeledi noko ja nicoteloco aca nibaanco gonege me goniwinogodi, odaa ja dienagata Paulo. <sup>7</sup>Igaanaga oyoodi Paulo, odaa nigijoa judeutedi anoicogoticogi nigotaga Jerusalém jogoyawiile Paulo, odaa jogodi ica Paulo mowidi loenataka ane beyagi. Pida agica nimawenegegi dogoikee moditece anewi. <sup>8</sup>Pida Paulo ja ninigodi nigijo ligegi, meetiogi, “Nigida me ee agica daga jao ane beyagi daga jakapetege lajoinaganegeco Moisés, domigetaga ligeladi Aneotedogoji, otegeaagagicata yoenatagi daga jakapetege César, ninionigi-eliodi romaanotedi.”

<sup>9</sup>Festo domaga yemaa me docagatiogi nigijoa judeutedi. Odaa ja ige Paulo, meeta, “Agemaani memii nigotaga Jerusalém midiaa jelite me jiwi ica anejigotagawa? Odaa jigidiaagi nige agiti nigina ane doletibige makaami nilaagedi.” <sup>10</sup>Naga ninigodi Paulo, odaa jegeeta, “Nigina diimigi anejonagatigi jiginaagi mawini anemiitiogi oko nigeladimigipitigi nigina nipodigi mawini domigica loenatagi ane lakapetegi najoinaganegeco romaanotedi. Jiginaagi mabakeni nagatetigi César, nigijo ninionigi-eliodi romaanotedi, mawini anemiitiogi oko. Enice leeditibige minaagadelii mawini anemiitiwa. Eliodi

mowoogoti me digicata yoenatagi ane beyagitema judeutedi. <sup>11</sup>Nigicatibece yoenatagi ane beyagi ane dakapetege najoinaganenegeco romaanexedi aneo me leeditibige me iigenatakanitiwa metideloadi, odaa iigenatakanitiwa metideloadi, igaataga ajelodi daga joletibige metidiwoko. Pida amina nige niwitakaga nigina me notaganaga me leedi me ee nilaagedi, odaa agica oko ane yakadi daga idajigotogi. Odaa natigide jipokota César me iwi anigotiwa.” <sup>12</sup>Odaa Festo jigigo yotaganene ijoa lilokagawadi, nigidiaagidi ja igidi, meeta, “Ipokita César mepaa iwi nigica anigotagawa, odaa ja gadimonyaatocogi minitaga César!”

### Paulo diniboota inionigi-eliodi Agripa

<sup>13</sup>Onatecigijoa epenaitedi ixomagatedijo, odaa Agripa, lacilo-nelegi judeutedi nigidi nipodigi, jigicoticogi nigotaga Cesaréia, lixigagawa aca lodawa ane liboonagadi Berenice, igotibeci modalita codaa moyecoaditece Festo. <sup>14</sup>Igaanaga ixomagatedijo owidi nokododi, Festo ja yotaganene nigijo lacilo-nelegi judeutedi yatematita anodaageeta Paulo mini, meeta, “Ini goneleegiwa digoina Félix inaageyaticce manitaga niwilogonagaxi. <sup>15</sup>Nigijo mejigo nigotaga Jerusalém, nigijo anoiige sacerdotitedi ijaagijoa laxokodi goneleegiwadi lacilodi judeutedi enagitibeci meetaga. Etidotaganene modakapetege Paulo domogodoletibige me nilaagedi, codaa domogonipokotiwa me jiloikatidi. <sup>16</sup>Pida mejitigi me daga godakatigi anoko romaanotedi daga jajicaga oko moiloikatidi nigaleedaga dakapetege nigijo oko codaa leeditibige mecogotace igidi nigica anodoletibige me nilaagedi. <sup>17</sup>Odaa nigijo nogonotiwa nigijo anodoletibige me nilaagedi Paulo, odaa agica ane jopagadi, negeledi noko ja idicoteloco nagajo inibaanco gonege anejo me jiwi anejigota oko. Odaa ja jienagata Paulo. <sup>18</sup>Odaa nigijo nelogododipi idi dabiditiniwace, odaa ja notaganagateloco modakapetege. Pida agica dogodoletibige me nilaagedi daga leegodi gaantiginoa loenataka ane beyagi ane jiletibige daantigidaa leegodi me nilaagedi. <sup>19</sup>Pida odinotigimadetege leegotedi epaa lakataga judeutedi. Eledi odinotigimadetigi icoa goneleegiwa ane liboonagadi Jesus baanaga yeleo, pida Paulo mee nigicoa goneleegiwa naga yewigatace. <sup>20</sup>Ee ajowoogodi nigica gaantaga inimawenegegi me yenikamaga me jowoogodi nigica anodinotigimadetigi. Joanigidaa leegodi naga jige Paulo domige yemaa migo nigotaga Jerusalém me domigidiaa jelite me jiwi anejigota. <sup>21</sup>Pida Paulo ja nipokotiwa mepaa César iwi anigota, nigijo ninionigi-eliodi romaanotedi. Dipokota minaagi me diniwilo nigepaagicota me jimonyaticogi minitaga César. Odaa ja jiige iodagawadi moyowie, odaa etini dotete me diniwilo nigepaagicota limedi me jimonya.”

<sup>22</sup>Odaa Agripa jegeeta Festo, “Ee jemaa me jajipata nigica goneleegiwa.” Odaa jegee Festo, “Natiinigoi, odaa jagajipaata.”

<sup>23</sup>Negeledi noko Agripa ajaa Berenice jigicotibece anei me yatecogo odinixotinigilo nowoodi ane dagaxa mele, odaa iditawece nigijo oko oiwenigide. Naga dakatiobece minitaga ica le nelegi nigini diimigi ane latecagaditibece nigina oko. Me dakatiobece lixigagawepodi icoa lacilodi iodagawadi ijaagijoa

goneleegiwadi ane dagaxa me gonegagatigi nagani nigotaga. Odaa Festo ja dienagata Paulo, odaa nigijoa nowienogododi jogonadeegi. <sup>24</sup>Odaa jegee Festo, “Iniotagodi Agripa, anakaami lacilo-nelegi nigina nipodigi, codaa akaamitawecetiwaji anakaami digoina mokotaga, digawini nigida goneleegiwa. Eliodi oko nakapetegi nigida goneleegiwa, inoa judeutedi aninaa ligeladi, codaa me iditawece judeutedi ane ligeladi digoida nigotaga Jerusalém. Nigidi oko odoletibige me nilaagedi codaa me napaawagateloco, modi me leeditibige me jiigenatakata moyeloadi. <sup>25</sup>Pida agica ane jinaditece loenatagi ane leegodi daga leeditibige me jiigenatakata moyeloadi. Codaa idaagida Paulo dipokota mepaa César, nigijo ninionigi-eliodi romaanotedi me iwi anigota. Odaa ja yowoogo me jimonyaticogi minitaga César. <sup>26</sup>Pida ajowoogodi nigica ane jiditini me idalagata nigida goneleegiwa me jajigota goninionigi-eliodi romaano. Joanigidaa leegodi me jinadeegi nigida goneleegiwa digoina gadodoe akaamitawecetiwaji. Pida anenegegi ida ane jaoga me inadeegita gadodoe nigida goneleegiwa, iniotagodi Agripa, akaami anakaami godacilo-nelegi ane iigeni inatawece nigina nipodigi. Inadeegi nigida goneleegiwa jaotibige makati magee, amanagawini jakadi me jiditibige notaganagaxi César, codaa amanagawini jakadi me jelogodita ane leegodi modakapetege nigida goneleegiwa. <sup>27</sup>Igaataga ajakadi me igenaga daga jimonya oko minitaga César me iwi anigota, pida agotaga jelogodita ane leegodi nigina oko modoletibige me nilaagedi.”

**Paulo yatematita Agripa anodaagee malee iatetibeci  
nigijo oko anonakato Goniotagodi**

**26** <sup>1</sup>Odaa Agripa jegeeta Paulo, “Yakadi maninigoti makapetege lotaga nigijo anodoletibige makaami nilaagedi!” Odaa Paulo ja nawacetibige libaagadi me yecoaditece nigijo lacilo-nelegi nigidi nipodigi, odaa jigidaa dinanatigi me ninigodi nigijoa lotaga nigijo anodoletibige me nilaagedi.

<sup>2</sup>Odaa jegee, “Iniotagodi Agripa, anakaami lacilo-nelegi nigina nipodigi. Nigina noko idinitibeci leegodi me jakadi me jotaga gadodoe, codaa me jakadi me ininigodi inoatawece ane lotaga nigijoa judeutedi ane leedi me ee nilaagedi. <sup>3</sup>Igaataga jowoogodi me igenaga mowoogodi ane lakataga judeutedi, codaa anodinotigimadetigi. Enice jipokotagawa me adinatiitalo yotaga.

<sup>4</sup>Inoatawece judeutedi oyowoogodi anodaagee yewiga nigijo maleege nigaanigawaanigi codaa nigina natigide. Eledi oyowoogodi anodaagee yewiga miditaga emaga inipodigi, codaa me digoida nigotaga Jerusalém. <sup>5</sup>Nige yemaa me notaganaga, yakadi modi moyowoogodi midioka limedi me jioteci lajoinaganegeco nigijo lapo fariseutedi, nigijo anepaga eliodi mowote loniciwaga modocagatibigo Aneotedogoji. <sup>6</sup>Odaa natigide jogoleetibigetiawaji mawini anemiitiwa leegodi me inibeotege Aneotedogoji micota meote nigijo ane ligegi meote aneetediogi godaamipi nigijo jotigide. <sup>7</sup>Aneotedogoji eote ligegitediogi nigijo dooze dinoiigiwepodi godaamipi jotigide. Odaa natigide nigina anida aneetege licogegi aagaga onibeotege Aneotedogoji

meote nigijio ane ligegi, codaa eliodi modogetetalo noko codaa menoale monibeotibigege. Iniotagodi Agripa, niginoa judeutedi odoletibige me ee nilaagedi idoka leegodi me ee eledi inibeotibigege Aneotedogoji meote nigijio ane ligegitediogi jotigide godaamipi. <sup>8</sup>Natigide, igame leegoditiwaji ina makati me dakake me iwagati Aneotedogoji meote émagaga me newigatace?

<sup>9</sup>Emegeeta jiletibige degele me jaote inoatawece ane jakadi me jaote me jakapetege Liboonagadi Jesus anelatedibige nigotaga Nazaré. <sup>10</sup>Jaoo nigida ane idalagata digoida nigotaga Jerusalém. Nigijio anoiige sacerdotitedi onajigotiwa inagatetigi, odaa ja jixotiobece niwilogonagaxi eliodi nigijio ane nepilidi Goniotagodi. Odaa nigidiaagidi nigijioa lacilodi nogodiigenatakatiogi monigodi, ee eledi jotaga me jakapetege nigijio ane nepilidi Goniotagodi. <sup>11</sup>Elioditibece me jaoga lawikodigi, jametibigo minoataga niginoa liikanagaxiidi judeutedi, codaa me jiedege me beyagi modotagatibige Goniotagodi. Eliodi me idelatema codaa ejigo minoataga niginoa nigotadi ane ideitedice we nigidi nipodigi me jiniatetiniwace.”

### **Paulo yatemati anodaagee Jesus naga dinikeete**

*(Atos 9.1-19; 22.6-16)*

<sup>12</sup>Odaa Paulo egidaa diitigi me dotaga, mee, “Nigijio anoiige sacerdotitedi onajigotiwa inagatetigi, odaa jegetidiigetigoci nigotaga Damasco mejigo iniwilotiniwace nigijio anonakato Goniotagodi. <sup>13</sup>Iniotagodi Agripa, naigitinece naga yaxogo-noko, odaa ja jinadi ijo natalaga ane icogotibigimece ditibigimedi. Nigijio natalaga dagaxa me datale caticedi me liciagi aligege, naloteloco iditawece anejonaga nigijio ane iniwiajeega. <sup>14</sup>Odaa okotawece janiigatinigi iigo, odaa ja jajipata ijo ane dotaga, dotagatigi ioladi hebraico, meetiwa, ‘Saulo! Saulo! Igame leegodi ina madiatenitibece? Nigida makaami ja gadinanacilotiti micataga nigina godinaga ane nipoditege limigo nojocaganagadi.’ <sup>15</sup>Igaanaga jige, odaa mejita, ‘Amakaami, Iniotagodi?’ Odaa Goniotagodi jegeetediwa, ‘Ee Jesus, ane iatenitedibece. <sup>16</sup>Pida adabititini! Idinikeetagawa igaataga jagakamagakaami ane jao makaami iotagi, codaa jagakamagakaami nakataganaga. Emii elogotitiogi nigina oko nigijio ananatitici nigina noko, codaa atematiitibece nigida anicota me jikeetagawa nigidiaagidi. <sup>17</sup>Idoweditagaloco me digicata anodigotagawa nigijioa judeutedi idiaagidi ane daga judeutedi anicota makaami nakapetegi miditaga ane gadimonyaatiogi. <sup>18</sup>Emii omokeni ligecoogeli amaleegaga epaa dinadi anodaageetibigiwaji, codaa me anogaaticoace me ide i nexocaga aneo nigijio ane beyagi catiwedi laalegenali, odaagadeegitiobece manitaga nilokokena Aneotedogoji. Anogaaticoace me iteloco loniciwaga Satanás, odaaganadeegitalo Aneotedogoji, amaleegaga ixomagateetedice Aneotedogoji niginoa libeyacegeco leegodi metidinakato, odaa jigida aneetege nigina lapo oko nigina Aneotedogoji ane iomagaditedice mepaa nepilidi leegodi metidinakato.’

### Paulo yalagata libakedi

<sup>19</sup>Enice iniotagodi Agripa, ejiwagadi nigijo Goniotagodi aneetediwa nigijo me jinadi nigijo natalaga ane icogotibigimece ditibigimedi, codaa me jinadi Goniotagodi micataga daga igeedi. <sup>20</sup>Odaa ja jatematikatibece odoejegi digoida nigotaga Damasco, nigidiaagidi jegejigo nigotaga Jerusalém, odaa nigidiaagidi jagagejigoteloce iditawece nipodigi Judéia codaa me miditaga ane daga judeutedi. Jatematitibece me leeditibige nigina oko modinilaatece niginoa libeyacegeco modopitalo Aneotedogoji, codaa leeditibige me gela lakataga ane ikee mewi nogodinilaatece libeyacegeco. <sup>21</sup>Odaa joanigidaa leegodi judeutedi nogodibatiwa nigijo midiaagejo minitaga Aneotedogoji ligeladi, domegetideloadi. <sup>22</sup>Pida codaa nigina noko egee idaxawa Aneotedogoji, idapaga jiiitoci me jelogoditiogi yatematiko nigina oko ane daga gonegegipi inaagina anepaga gonegegipi. Jatematitibece ijokijota nigijo anodita nigijo anoyelogoditedibece Aneotedogoji lowooko nigijo jotigide, codaa ijokijo nigijo aneeta Moisés micota me jinataga. <sup>23</sup>Oyatematitibece me leeditibige me dawikode Nigijo Aneotedogoji ane niige meote me godewigatace, codaa jigijaagijoa odoejegi me yewigatace, codaa me yatematitedibece Aneotedogoji lotaga, ane liciagi lokokena, minataga judeutedi codaa me minataga eledi noiigi ane daga judeutedi.”

<sup>24</sup>Nigijo Paulo me dotagatibece, dotaga me ninigodi lotaga nigijo ane domogodoletibige me nilaagedi, odaa Festo ja dinigetagatee me dapaaweta, meeta, “Paulo, nigida makaami jagakaami yetole! Eliodi midikoni negepaagicota gadacilo me beyagi, odaa jagakaami yetole!” <sup>25</sup>Pida Paulo naga ninigodi, meeta, “Iniotagodi Festo, agee yetole. Ele me jowooko codaa ejitece anewi. <sup>26</sup>Igaataga Agripa nigini godacilo-nelegi yowoogodi nigida anejita. Joanigidaa leegodi mabo yaalegena me jotaga digoina lodoe. Igaataga nigida niciagi adineli nigina nipodigi ane dinagaditini ane dogoyakadi oko mowajipata. <sup>27</sup>Iniotagodi Agripa, domige iwagati lotaga nigijo anoyelogoditedibece lowooko Aneotedogoji nigijo jotigide? Jowoogodi me iwagati!”

<sup>28</sup>Odaa Agripa jegeeta Paulo, “Domigaleetibige daga agotaga leegi oditaga jagawii magaga ee nigina ane nakato Cristo?” <sup>29</sup>Odaa Paulo jegeeta, “Nige leeditibige monatecigidiwa yotaga, ogoa domige leeditibige mowidi yotaga, jema Aneotedogoji meote manakatoni Goniotagodi digo meetaga, pida agakamokakaami, pida inatawece nigina oko anowajipatalo niginoa yotaga nigina noko. Jema minatawece iciagepodi, pida baadaga jema dogoniwilotiniwace oyatitiogi galeenatedi!”

<sup>30</sup>Nigidiaagidi Agripa nigijo lacilo-nelegi nigidi nipodigi ja dabititini. Odaa jagaga dabititini Festo, nigijo lacilo romaanotedi ane dowediteloco nigidi nipodigi, Berenice, codaa me ijotawece nigijo anidiaagiticoace miditaga me yatecogo. <sup>31</sup>Igaanaga noditicoaci nigijo diimigi-le nelegi, odaa ja dinotaganegetiwage, modi, “Nigijo goneleegiwa agica loenatagi ane beyagi degeo ane leegodi modiigenataka moyeloadi migetaga oyokoletiwace

niwilogonagaxi.”<sup>32</sup> Odaa Agripa jegeeta Festo, “Nigida makaami akatigikanitice nigida goneleegiwa daaditaga epaa dipokota me César iwi anigota.”

**Paulo waxoditinigi ajo etogo-nelegi me diniwiajeticogi nigotaga Roma**

**27** <sup>1</sup>Nigijo aninoa nagatetico naga lowoogo me leeditibige me jibagata ajo etogo-nelegi me iniwiajeegaticogi nipodigi Itália, odaa Paulo ijaagijoa onatecigijoa eletidi niwilogojedi jogoyajigota Júlio nigijo jajeentegi anida aneetege nigijo lapo iodagawadi anodibatema César, nigijo ninionigieliodi romaanotedi. <sup>2</sup>Odaa ja jibagata ajo etogo-nelegi ane icogoticogi nigotaga Adramítio. Odaa nagajo etogo ja igo migo midiwataga nigotadi miditaga nipodigi Ásia, odaa ja iniwiajeega. Ijo me godixigagawa Aristarco anelatabige nigotaga Tessalônica aneiteloce nipodigi Macedônia. <sup>3</sup>Igaanegeledi noko jejegogota nigotaga Sidom. Odaa Júlio eliodi meletema Paulo, odaa ja ikatice migo dalitioyi lokaagetedipi anidiaa ligeladi, odaa oyediatece nogetedi ane yopotibige. <sup>4</sup>Odaa naga jaxotagatacinigi nagajo etogo-nelegi, odaa ja gododitice nagani nigotaga Sidom. Odaa ja inoxiwicaga lidelogo-nelegi Chipre, nigijo liwai ane daga yoniciwadi niocodi, igaataga nigijo eledi liwai бага yoniciwadi niocodi ane jakapagatege. <sup>5</sup>Naga jigeegatita akiidi-eliodi lodoe nipodaga Cilícia aniaa Panfília, odaa jejegogota nigotaga Mirra aneiteloce nipodigi Lícia. <sup>6</sup>Jigidiaagi nigijo jajeentegi naga dakapetege ajo eledi etogo-nelegi ane icogoticogi nigotaga Alexandria. Odaa ajo etogo ja igo me noditice, migo nipodigi Itália, odaa Júlio ja godiige me jilatigatinigi nagajo etogo.

<sup>7</sup>Idinilonagatijo me iniwiajeega onatecigijoa nokododi leegodi nigijo niocodi ane jakapagatege. Dakake mejogota lipecagadi nigotaga Cnido. Odaa ijo niocodi agalee godika miniga odoe, Odaa jegejamagajogotice, ja jiiigata liwai lidelogo Creta ane icogotigi niwetaga. Odaa ja inoxiwicaga limigotice nigijo lidelogo, limigotice ane liboonagadi Salmona. <sup>8</sup>Inoxiwicaga nigini lidelogo, pida idokee me dakake goniwiajegegi negepaagejogota nipodigi ane liboonagadi Bons Portos, anipegitege nigotaga Laséia.

<sup>9</sup>Odaa jogowidi me jiniatagatema nokododi, codaa ja doide me iniwiajeegatinigi etogo leegodi niwocotaga. Leegodi nipegi limedi niwetaga (codaa agaleegewi mica ane diniwiaje nigijoa nokododi) igaataga ja ixomagatijo ijo nalokegi anodita “Lalokegi me idiniwilecaga lodoe Aneotedogoji.” (Odaa leecawaanigi me ixomagatice nigida nalokegi, ja limedi niwocotaga.) Joanigidaa leegodi Paulo me domegeo leemidi, meetiogi, <sup>10</sup>“Akaami iniotagodepodi, niginoa nokododi ja diiticogi me doide malee iniwiajeega. Nigina nigalee iniwiajeega, doidetibige nagadi etogo me domololetini, odaa doidetibige maniatitema gadoyagaka codaa nigina oko doidetibige me ocegaga.” <sup>11</sup>Pida nigijo jajeentegi ijapaga watacocece lotaga nigijo ane dowediteloce nagajo etogo-nelegi ijaagijo ane nebi, pida ijoa Paulo lotaga meo leemidi baadigica meote daga yowoogodi. <sup>12</sup>Agewi mele nigijo anei moigoetini nagajo etogo leegodi nigijo niwocotaga ane yoniciwadi ijaa ebekadi, nigina me limedi niwetaga. Joanigidaa

leegodi meliodi oko odiletibige daga dagaxa mele me noditicoaci, oditaga onake motota nigotaga Fenice oditaga idiaagiticoaci minitaga lidelogo-nelegi Creta midiaagoixomagateetijo limedi niwetaga. Liniogotibece nigidi akiidi-eliodi inoa golicoli ane digetege gocodi ane degewi ina me dibata niocodi ane yoniciwadi.

### Ica niwocotaga catinedi akiidi-eliodi

<sup>13</sup>Odaa ijo niocodi agica daga yoniciwadi icogoticogi niwetaga. Odaa nigijo anoyawaligege nagajo etogo-nelegi jogodiletibige dogoyakadi migotibeci okanicodaagica ane yemaa me dowiceticogi. Odaa jogonawacetedibige nigijoa gapilecege ane ideite catinedi ninyogodi anonoliti nagajo etogo-nelegi. Odaa jogoyadeegi nagajo etogo midioka limedi monoxiwigi nigijo lidelogo Creta. <sup>14</sup>Pida agica daga leegi odaa jigidaa dinanatigi ijo niwocotaga ane yoniciwadi anidokoyatigi me “Wajenaga” ane icogoticogi minitaga nigijo lidelogo. <sup>15</sup>Odaa nigijo niwocotaga ja yadeegi nagajo etogo-nelegi, agalee jakataga me jajacagataga nagajo etogo me jadeegaga ane domaga jiigaticogi. Odaa ja jikanagatece niocodi mepaa yadeegi nagajo etogo agalee jinakenaga me jajacagataga. <sup>16-17</sup>Inaaginigatece inoxiwicaga ijo lidelocawaanigi ane liboonagadi Cauda analee yoliawaanigitege nigijo niwocotaga. Adi aca niwatece anidioka limedi madi me dinigoetece liwai nagajo etogo-nelegi. Odaa nigijo ane nibaagatigi nagajo etogo-nelegi jogodibata nagajo niwatece. Odaa jogoyexagatinigi nagajo etogo-nelegi monolitini. Pida dakake monolitini, odaa ja jaxawanaga. Nigidiaagidi jogoilipaditece leejetedi ane yoniciwadi nagajo etogo-nelegi owotibige mepaanaga yoniciwadi. Odoitibige nigijo niocodi daga yadeegiticogi nagajo etogo miditaga dotiwadi liniogotibece akiidi-eliodi digoida nipodigi Libia. Odaa jogoipiciadi nigijoa lipegetege eloodoli owotibige me dibateloco niocodi, odaa jogoikatece niocodi mepaa yadeegi nagajo etogo. <sup>18</sup>Pida aixomagatijo nigijo niwocotaga, igaaneeledi noko odaa jogoyokoletedinigi ninyogodi ijoo loyagaka owotibige nagajo etogo mepaanaga noxadi. <sup>19</sup>Igaaneeledi noko jogoyokoletedinigi inoa nagapilecege inaaginoa najoli me dibaagatinigi le nagajo etogo-nelegi. <sup>20</sup>Odaa owidi nokododi me dagaca me jinataga aligege otegexaagaga yotetitedi nigina menoale. Codaa nigijo niwocotaga aixomagatijo idapaga diiticogi negepaagicota me dagadiaa inibeonagatege me godewiga.

<sup>21</sup>Nigijoa goneleegiwadi nogoixomagateetedijo owidi nokododi me digicata me niodaga, odaa Paulo ja dabiditini liwigotigi, odaa jegeetiogi, “Akaami iniotagodepodi, domegeletiwaji dogokaaga anajipaatiwa nigijo me gadiladeeni me daga gododiticogi lidelogo Creta. Daganagawini agotigica godawikodigi otegexaagagicata ananiadi niginoa ane gonepilidi. <sup>22</sup>Pida natigide jipokotagawatiwaji meloodagateeni gadaalegenali. Igaataga agica nigina akaamitiwaji ane yeleo. Pida idokidata бага jiniatagatema nagadi etogo-nelegi. <sup>23</sup>Igaataga jotigi-noko menoale ijo dinikeetiwa niaanjo Aneotedogoji. Igaataga nigida me ee ida anejitege Aneotedogoji codaa jibatema. <sup>24</sup>Odaa nigijo aanjo meetiwa, ‘Paulo, jinagadooi! Igaataga



leeditibige metigadadeegita lodoe nigijo ninionigi-eliodi romaanotedi. Odaa Aneotedogoji aneliodi meletedagadomi akaamitawecetiwaji wajipateta nigijo ane gadipoketegitalo, odaa agica ane ika me yeleo nigina gadixigagawepodi maniwiaje.’ <sup>25</sup>Odaa jipokotagawa, iniotagodepodi, meloodagateeni gadaalegenali! Igaataga jinakato Aneotedogoji, codaa ajawienataka Aneotedogoji meote ijoatawece nigijoa aneetediwa. <sup>26</sup>Pida leeditibige nigina niocodi me yadeegi nagadi etogo, odaa jigidiaagodaladite minitaga lidelogo.”

<sup>27</sup>Igaanaga ixomagatedijo catooze nokododi, odaa negenoale, nigijo niwocotaga egidaagee me godadeegiticogi miditaga akiidi-eliodi anodita me Mediterrâneo. Ejinaga ipegiteloco me liwigo-enoale, odaa nigijo ane nibaagatinigi nagajo etogo-nelegi jogodeemiteta naga jipecatagita iigo. <sup>28</sup>Odaa jogoyokoletinigi ninyogodi ijo gapilecege anijo leejedi ocagataga moibikota ane leegitinece migo catinedi me yaladi nagajo etogo. Odaa nogoibikota ijoa trinta-seis meetilo migo catinedi. Naga leecawaanigi, odaa jogoibikotatace, odaa jigijoa vinte-seete meetilo me leegitinece. <sup>29</sup>Odaa jogodoitibige nagajo etogo-nelegi daga dibateloco wetiga nelegi liniogotibece ninyogodi. Odaa jogowote onikatedini cwaatolo gapilecege nelecoli ane dileejetede, odaa jogonikatini lowidi nagajo etogo-nelegi me nolitini. Odaa jogoyotaganeege inoa anodi me noenogododi domogowotibige me age me yelogotibige. <sup>30</sup>Pida nigijo ane nibaagatinigi nagajo etogo jogodoletibige nimawenegegi me ialetibigiwaji, domogoyaladi nagajo etogo. Odaa jogonokanice onikatedini eletidi gapilecege nelecoli lodoe nagajo etogo monolitini. Pida igotibeci me domogonikatini nagajo niwatece. <sup>31</sup>Pida Paulo jegeeta nigijo jajeentegi ijaagijoa niodagawadi, “Nigidiwa goneleegiwadi ane nibaagatinigi nagadi etogo-nelegi nige diginaagite maditaga nagadi etogo, codaa makaamitiwaji aiwoko me gadelewi.” <sup>32</sup>Odaa nigijoa iodagawadi jogonakagidi nigijoa leejetedi nagajo niwatece, odaa jogoikatece niocodi me yadeegi.

<sup>33</sup>Igaanaga yelogotibige odaa Paulo ja dipokotiogi ijotawece nigijo oko me niodaga, moyeligo anigidi liawogo, odaa jegeetiogi, “Ja ixomagatedijo catooze nokododi maliitatiwaji me ixomagatice nigina niwocotaga me digicata daganioditiwaji. <sup>34</sup>Natigide, jipokotagawa manioditiwaji. Igaataga leeditibige manioditiwaji amaleegaga gadoniciwati, amanagawini agica ane yeleo. Igaataga akaamitawecetiwaji otiginitece ananiaditema otigidatece lamodi.” <sup>35</sup>Igaanaga nigotini Paulo me dotaga, odaa ja dibata ijo paon, odaa ja diniotagodetalo Aneotedogoji lodoe iditawece nigijo oko. Naga yawalace ijo paon, odaa ja yeligo. <sup>36</sup>Odaa iditawece ja yoniciwaditacibigiwaji, odaa jagaga niodaga. <sup>37</sup>Okotawece nigijo ane idejonaga maditaga nagajo etogo, ejimoko 276 oko. <sup>38</sup>Nigidiaagidi nigijotawece niodaga, moyeligo anidi me niweenigi, odaa jogoyokoletinigi ninyogodi nigijo leyeema ane iigotice, owotibige me noxadi nagajo etogo-nelegi.

### Ijtawece nigijo oko laxedi nagajo etogo jogototicogi daato

<sup>39</sup>Igaanaga yelotibige, nigijo anodibatini nagajo etogo-nelegi agoyowogodi nigijo nipodigi anotota. Pida jogonadi ijo ninyogodi liwigotigi ijo dotiwadi, odaa jogodoletibige nimawenegegi mowote nagajo etogo micoticogi oditigidiaagite miditaga dotiwadi. <sup>40</sup>Odaa jogonakagidi nigijoa leejetedi nigijoa gapilecege ane iwaagadi anonoliti nagajo etogo, odaa jigidiaagoyaladite catinedi ninyogodi. Odaa jogoyowilece nigijoa nileejetedi onoga nigijoa lolaakanagatedi, owotibige moyakadi moyawaligege nagajo etogo-nelegi migotibeci anoyemaa moyaticogi. Odaa jogoipiciadi nagajo lipegetege nelegi owotibige me yakadi niocodi odaa ja yamaga nagajo etogo-nelegi. <sup>41</sup>Pida nagajo etogo-nelegi ja dibateloco dotiwadi catinedi ninyogodi, odaa ja naxi. Nigijo lodoe nagajo etogo ja naxi, ijaa nigijo lowidi jagaga dawalace leegodi loniciwaga nigijoa ebekadi.

<sup>42</sup>Odaa nigijoa iodagawadi ja domogoyemaa monigodi ijtawece nigijo niwilogojedipi, adomogoyemaa mica anoiwokotice digicota iigo oditaga jigialetibigiwaji. <sup>43</sup>Pida nigijo jajeentegi aika dogonigodi, igataga ayemaa Paulo dogoyeloadi. Odaa ja iige odojedipi nigijo anoyowogodi me nalokonaga me waxoditiniwace ninyogodi, odaa ja nalokonaga negepaa digetita miditaga dotiwadi. <sup>44</sup>Nigidiaagidi jagaga iige nigijo eledi me waxoditini ninyogodi, owaxoditelogo inoa taabotedi liwailidi nagajo etogo owotibige me yaxawa mototicogi miditaga dotiwadi, odaa jigidaagee okotawece jigeegatita miditaga dotiwadi, agicoa anetacilo.

### Lidelogo ane liboonagadi Malta

**28** <sup>1</sup>Igaanaga nixomagatice godaadi negejogota iigo, odaa nigidiaagidi jowoogotaga nigijo lidelogo-nelegi me liboonagadi Malta. <sup>2</sup>Nigijo nigeladimigipi eliodi meletogodomi. Nigijo noko datiode, codaa me diwete, odaa jogoyelotiogi noledi eliodi. <sup>3</sup>Odaa nigijo Paulo me nioda iwokodi me yokoletiotigi noledi, ijo lakeedi ane diniweneene ja noditice deloditema lapicagaga noledi, odaa ja igojatigi Paulo libaagadi, nanyotinece. <sup>4</sup>Odaa nigijo nigeladimigipi noganadi nigijo lakeedi me nanyotinece Paulo libaagadi, odaa idiaagiditiwage modi, “Nigini goneleegiwa ejime aijekegi! Igaataga ja iwoko daga yeloadi ninyogodi, pida nigica noenogodi ane igenaga aika dagalee yewiga.” <sup>5</sup>Pida Paulo naga iticogotice libaagadi, odaa ja yokoletiotigi noledi nigijo lakeedi, odaa agica lidonagi. <sup>6</sup>Nigijo noiigi jogoigoadita, ja domogonibeotege me nadedi libaagadi, domigetaga codidigidata degenitini me yeleo. Pida negeliodi moigoadi, odaa jogonadi me digicata lidonagi Paulo. Odaa jogoiigi lowoogo, modi, “Nigini ejime gonoenogodi!”

<sup>7</sup>Linigotibece nigidi akiidi-eliodi ani ajo bajendawaana ane nebi Públio, lacilo romaanotedi ane iige nigini lidelogo. Públio eliodi mele me dibatogogi, codaa godode midiaagejonaga ligeladi itoatadigida nokododi. <sup>8</sup>Pida nigijo eliodi Públio deelotika, iwoteloco lipe. Dilice, codaa me dapicogo-lolaadi. Paulo naga dakatio miditaga ane liotagadi, odaa ja yotaganega Aneotedogoji. Nigidiaagidi



(Atos 28.3)

ja ipekoteloco libaagatedi, odaa ja icilatidi. <sup>9</sup>Odaa nigijo nigeladimigipi nogodibodiceta nigida niciagi, odaa jagaga oyadeegi eletidi eelotaginadi, odaa Paulo ja nicilatiditiniwace. <sup>10</sup>Odaa jegetigodediatece owidi gonogetedi metigodiwenigide, iganaga limedi me jibagata eledi etogo-nelegi me gododitice, odaa jogonajigotedogowa inoatawece ane jopoogatibige me iniwiajeega.

### Naga wiajeegaticogi nigotaga Roma

<sup>11</sup>Idiaagejonagate iniwatadigini epenaitedi minitaga lidelogo Malta, nigidiaagidi ja jibagata ajo etogo-nelegi ane icogoticogi nigotaga Alexandria. Nagajo etogo-nelegi anowo me liboonagadi, “Gonoenogododi owatitidi”. Jigidiaagi nagajo etogo-nelegi me ixomagateetedijo limedi niwetaga minitaga nigini lidelogo. <sup>12</sup>Naga jalataga nigini lidelogo, odaa jejejogota nigotaga Siracusa, odaa jigidiaagejonagate itoatadigida nokododi. <sup>13</sup>Pida egidaa jiigaticogi me iniwiajeega, odaa jejejogota nigotaga Régio. Negeledi noko jigijo niocodi niwetaga, ja godaxawa, odaa nigidiaagidi naga ixomagatedijo itoataale nokododi, odaa jejejogota nigotaga Pozuoli. <sup>14</sup>Naga jaxotagatice nagajo etogo-nelegi, odaa ja jakapagatege onatecigijo gonioxoadipi, odaa jгонipokotogowa midiaagejonaga miditaga onidateci semaana. Nigidiaagidi jigidaa jiigatacicogi me iniwiajeegaticogi

nigotaga Roma. <sup>15</sup>Igaanogoyowoogodi gonioxoadipitigi nigotaga Roma midaa jiiigaticogi Roma, odaa jegenagitibeci negepaa manitaga ajo nigotakawaana ane liboonagadi Praça de Ápio, odaa jejegogota negepaa miditaga ane liliacagaditibece nigina ane wiajeega anodita Três Vendas. Nigijjo Paulo naga nadi nigijjo gonioxoadipi, odaa ja diniotagodetalo Aneotedogoji, odaa ja yoniciwaditace.

### Paulo datematika digoida nigotaga Roma

<sup>16</sup>Igaanejegogoticogi nigotaga Roma, odaa nigijjo jajeentegi ja yajigo nigijjoa eletidi niwilogojedi, yajigota ijo lacilo iodagawadi. Pida Paulo bogoika me nadila ijo diimigi, odaa jigidiaagi ijo nowienogodi onijoteci iodagawa.

<sup>17</sup>Igaanaga ixomagatedijo itoatadigida nokododi, odaa Paulo jegeniditiogi ijoo lacilodi judeutedi me yatecogotee. Igaanaga yatecogo, odaa jegeetiogi, “Inioxoadipi, agica yoenatagi daga jakapetege godoiigi, otegeaagaga daga jakapetege ane lakataga jotigide godaamipi. Pida ijoo judeutedi jogodibatiwa, odaa jegetidajigotiogi romaanotedi. <sup>18</sup>Odaa ijo lacilodi romaanotedi jogoiwi ica anodigotiwa, odaa ja domogoyemaa metidikatice, igaataga moyakadi me digicata yoenatagi ane beyagi aneo me leegodi modiiigenatakatiwa metideloadi. <sup>19</sup>Pida nigijjoa judeutedi baadogoyemaa metidikatice nigijjoa lacilodi romaanotedi. Odaa ja yowoogo me jipokotiogi romaanotedi metidimonyaticogi minitaga César, mepaa iwi anigotiwa. Pida ajemaa daga jao igegi daga jakapetege yoiigi daga ilaagetedipi. <sup>20</sup>Joanigidaa leegodi me jipokotagawatiwaji manootiwa, jaotibige me jakadi me gadatecogoteeni me gadotaganegenitiniwace. Ite ee etidigoetece niginao galeenatedi leegodi Nigijjoa Aneotedogoji anicota me nimonya, Nigijjoa anonibeotibigege loigi Israel micota meno.”

<sup>21</sup>Odaa jogodita Paulo, “Nigida moko agaca jibagatege notaganagaxi ane icogotigi Judéia aneetagadice. Codaa agica otiginitece nigijjo gonioxoadipi ane icogoticogi Judéia agica dogoditagadici, otegeaagaga beyagi modotagatibigagaji. <sup>22</sup>Pida natigide jemaanaga me jajipaagata nigica ane gadowoogo, igaataga jowoogotaga mewi nigina oko inoatawece nigotadi odotagatibige modakapetege nigina oko anida anenitege.”

<sup>23</sup>Odaa jogowo lakatagi noko me yatecogo minitaga Paulo. Igaanaga icota nigijjo noko lakatagi, eliodi judeutedi ja yatecogo minitaga ijo diimigi ane lotokagadi Paulo. Odaa ja diiticogi Paulo me notaganegenitiniwace, nigoitijo negepaagenoale. Iigaxitice codaa me yelogoditiogi anodaagee Aneotedogoji me iige laalegenali oko. Doletibige nimawenegegi me ixotiwece lacilo anijoo icoa Jesus. Eledi ikeetiogi nigijjo liwai lotaganagaxi Aneotedogoji Moisés ane iditini aneetece Jesus, codaa me nigijjo liwai anoiditedini nigijjo anoyelogoditedibece lowooko Aneotedogoji nigijjo jotigide. <sup>24</sup>Onatecigijjo judeutedi oyiwigadi nigijjoa Paulo lotaga, pida ijo eledi baadogoyemaa moyiwagadi. <sup>25</sup>Naga dinotigimadetiwege, odaa jogopitibeci. Maleedigicatibige me noditicoaci, odaa Paulo jegeo ligegitiogi, meetiogi, “Aneotedogoji Liwigo eetece ane igenaga

nigijo me ibake Isaiás me yelogoditedibece lowooko Aneotedogoji. Isaiás meetiogi jotigide gadaamipi nigijo ane ligegi Aneotedogoji, nigijo negee,

<sup>26</sup> ‘Emii enitiogi nigidi noiigi,

“Nigida makaamitiwaji eliodi majipaata,

pida agowoogoti ane diitigi!

Eliodi mawinitiwaji,

pida ağanati!”

<sup>27</sup> Igaataga dakake laalegenali nigidi noiigi.

Odaa jogonoxoco napaagate,

odaa agaleegowajipatalo yotaga,

onoxoco ligecoogeli owotibige me dagadiaagonadi ane yoenataka.

Daaditaga owote laalegenali me dakake,

daganagawini ligecoogeli oyakadi me doletibigiwaji,

napaagate tagaga oyakadi me najipaaga,

codaa daganagawini oyakadi me oyowoogoditece niginoa yotaga,

oditaga jogodopitiwa, codaa niginoa leelotika taga jicilatidi.”

<sup>28</sup> Odaa Paulo ja nigomagaditedini nigijoa lotaga nigijo negee, “Enice ele mowoogotitiwaji Aneotedogoji me iige liotaka modatematikatema nigijo noiigi ane daga judeutedi anodaagee Aneotedogoji meote nigina oko me newigatace. Odaa icota moyiwagadi nigida latematigo.”

<sup>29</sup> Igaanaga nigotini Paulo meote nigijoa lotaga, odaa nigijoa judeutedi ja noditicoaci, codaa eliodi me dinotigimade idiaagiditiwage.

<sup>30</sup> Odaa Paulo eote itoataale nicaagape midiaagi minitaga nigijo diimigi ladiligi, codaa dibatibigege inatawece oko anigotibeci odalita.

<sup>31</sup> Yatematitibece anodaagee Aneotedogoji me yakadi me iige laalegenali oko, codaa me diigaxinagatece anodaageeteda Goniotagodi Jesus Cristo.

Codaa abo laalegena nigina me dotaga, codaa agica ane yolitema me dotaga.